

**NATIONAL ASSEMBLY OF
SEYCHELLES**

Tuesday 08th October 2024

The Assembly met at 0900 am

National Anthem

Moment of Reflection

Mr Speaker in the Chair

MR SPEAKER

Bonzour Manm Onorab. Bonzour nou zofisyé Lasanble ki pe asiste nou. Bonzour tou nou piblik ki pe swiv nou e byenveni pou nou travay lasemenn ankor enn fwa. Mersi pou zot fidelite.

E bonzour bann viziter ki dan Galeri ki en group sorti Grand Anse Mahe. Mon konpran i annan etidyan e osi lezot rezidan. Byenveni, fotespere zot pas en bon letan avek nou.

Zis en pti komunikasyon dan mon kote. Minister Lasante, in demann mwan pou eksprim ankor enn fwa son sipor – son lapresyasyon pou bann Manm ki'n asiste zot prezantasyon lo, 'leta lasante' Vandredi. Zot in byen apresye

partisipasyon e bann kestyon ki Manm in poze.

E mwan menm lo mon kote mon krwar poudir sa in ede pou fer Manm Lasanble pli byen konpran sityasyon dan en sekter ki vreman tre enportan pou zot.

Mon a osi donn laparol Onorab Lemiel, pou pas en mesaz solidarite lo en size ki pe tous son distrik. Onorab Lemiel ou annan laparol.

HON SYLVANNE LEMIEL

Mersi Mr Speaker. Bonzour Mr Speaker. Bonzour tou mon bann koleg, Manm Onorab. Tou nou bann evite ki dan Galeri ozordi, byenveni.

Mr Speaker mersi pou permet mwan pou pas en pti mesaz solidarite avek lafanmir Rico Josias e Dario Sanguillon ki sa 2 zenn peser dan distrik Anse Royale ki'n perdi lo lanmer. E ki ziska la laresers i ankor pe fer pou sey vvar zot.

Mon ti a kontan dir avek lafanmir dan mon non personnel koman MNA pou Anse Royale. Nou lapriyer, zot dan nou lapriyer e nou la avek zot an sipor.

E permet mwan Mr Speaker osi petet mon ti a kontan anmenn sipor Lasanble osi e solidarite. Ki Lasanble

petet i pas a sa 2 fanmir ki pe pas dan sa moman difisil e dan en moman enserten ki nou pa vreman konnen kwa ki pou arive.

E nou met Rico Josias e Dario Sanguillon dan nou lapriyer. E ki nou priye ki petet byento zot ava ganny revwar e ki zot ava troun dan lakour kot zot fanmir sen e sof. Mersi Mr Speaker.

MR SPEAKER

Mersi Onorab. E mon espere nou eksprim santiman, sipor Lasanble dan ou parol. Nou ava prosede avek nou *Order Paper*. E nou annan en Prezantasyon Dokiman Madanm Deputy Clerk.

MADAM DEPUTY CLERK

Bonzour Mr Speaker. Bonzour tou bann Manm Onorab. Bann envite dan Galeri e tou manm piblik a lekout. Prezantasyon Papye i *comme swivan*; -

S.I. 77 of 2024 Beneficial Ownership (Commencement of Regulation 13) Notice, 2024.
Mersi Mr Speaker.

MR SPEAKER

Mersi Madanm Deputy Clerk. Nou ava prezan apel Minis pou Zafer Etranzer Mr Sylvestre

Radegonde pou partisip dan *Private Notice Question*.

Onorab William, ou pe demann mon laparol normalman. Annou gard lareg ki letan oule pran laparol avan nou komans biznes, ou demann mwan avan koumsa mon a kapab *acknowledge*.

Mon sipoze oule fer en byenveni pou ou bann dimoun ki dan Lasanble. Mon a envit ou ler ou pran laparol pou adres zot. Mersi.

Bonzour e byenveni Minis pou Zafer Etranzer e Touris Mr Sylvestre Radegonde. E egalman mon dir en byenveni Anbasader Gervais Moumou ki Anbasader Repiblik Sesel Abu Dhabi e Ms Mena Hoareau ki Direkter Zeneral pou *Consular Affairs and Diaspora Division* dan Minister Zafer Etranzer.

Byenveni zot tou e mersi pou zot partisipasyon. E letan nou pe komanse mon konnen Minis ou annan en lasemenn tre enportan avek miting bann Anbasader, bann Konsil Onorer. E mon swet ou tou de bon dan sa bann demars. E ou delegasyon osi.

Mersi, e aprezan al lo *Private Notice Question* Onorab Leader Lopozisyon mon apel ou pou met ou kestyon.

HON SEBASTIEN PILLAY

Mersi Mr Speaker. Bonzour Mr Speaker. Bonzour tou bann envite ki dan Galeri, bann viziter. Bonzour tou koleg Onorab e byensir bonzour Minis e Anbasader avek bann lot Manm ou *panel*.

Mr Speaker, avan ki mon komans demann mon kestyon mo oule zis pas mon senser senpati avek lafanmir Mrs Solange Bonnelame ki'n kot nou.

I en dimoun ki lo nou kote latab nou konn li tre byen, zot dan nou lapriyer e zot annan nou bann mo rekonfor.

Mr Speaker, prenon kont Minis i annan en azanda sarze sa semenn, parey ou'n dir sa kestyon i osi enportan parey sa azanda ki Minis i annan e mon kestyon i lir koumsa; -

Eski Gouvernman i kapab klarifye si zot satisfe avek sityasyon sekirite bann Seselwa ki *Liban* swivan lager ki'n deklare ant *Israel* e *Hezbollah*, e eski Gouvernman pe fer okenn zefor pou rapatriy sa bann dimoun? Mersi Mr Speaker.

MR SPEAKER

Mersi Onorab. Minis, ou larepons silvouple.

MINISTER**RADEGONDE**

Mr Speaker mersi. Mersi *Leader Lopozisyon*. *Leader Zafer Gouvernman*. Bann Manm Onorab, bann envite dan Galeri e tou dimoun ki pe swiv sa sesyon nenport ki landrwa ki zot ete.

Mr Speaker, mon ti a kontan komanse par osi eksprim en panse pou sa 2 peser ki'n perdi lo lanmer dan Distrik Anse Royale. E mon swet lafanmir kouraz dan sa bann letan e difisil. E mon osi swete ki zot ganny retrouve sen e sof.

Mr Speaker, an sa ki konsern sa kestyon i annan 2 parti; - Eski Gouvernman i kapab klarifye si zot satisfe avek sityasyon sekirite bann Seselwa ki *Liban* swivan lager ki'n deklare ant *Israel* ek *Hezbollah*?

Larepons senp Mr Speaker non, nou pa satisfe. Parey nou konnen sa sityasyon sirtou sid Liban i en sityasyon ki pe dire depi plizyer mwan e in akselere la dan sa dernyen zour.

I en sityasyon enkyetan pou Seselwa me osi pou tou bann dimoun ki viv dan sa rezyon sirtou rezyon *Beirut*.

SYLVESTRE**RADEGONDE**

Mr Speaker mersi. Mersi *Leader Lopozisyon*. *Leader Zafer Gouvernman*. Bann Manm Onorab, bann envite dan Galeri e tou dimoun ki pe swiv sa sesyon nenport ki landrwa ki zot ete.

Mr Speaker, mon ti a kontan komanse par osi eksprim en panse pou sa 2 peser ki'n perdi lo lanmer dan Distrik Anse Royale. E mon swet lafanmir kouraz dan sa bann letan e difisil. E mon osi swete ki zot ganny retrouve sen e sof.

Mr Speaker, an sa ki konsern sa kestyon i annan 2 parti; - Eski Gouvernman i kapab klarifye si zot satisfe avek sityasyon sekirite bann Seselwa ki *Liban* swivan lager ki'n deklare ant *Israel* ek *Hezbollah*?

Larepons senp Mr Speaker non, nou pa satisfe. Parey nou konnen sa sityasyon sirtou sid Liban i en sityasyon ki pe dire depi plizyer mwan e in akselere la dan sa dernyen zour.

I en sityasyon enkyetan pou Seselwa me osi pou tou bann dimoun ki viv dan sa rezyon sirtou rezyon *Beirut*.

Dezyenm parti; - Eski Gouvernman pe fer okenn zefor pou rapatriy sa bann dimoun? Mr Speaker mon bezwen dir ki Gouvernman i sertennman angaze pou rapatriy Seselwa kot Seselwa i dan danze.

Me nou bezwen konnen kote zot ete enn, e si zot oule ganny rapatriye, sa i tre enportan. Ler mon pe koz la bomaten avek Lasanble mon oule dir ki nou, nou'n fer zefor, en kantite zefor.

Nou'n kree en seksyon *Diaspora* dan Minister, kot nou ankouraz Seselwa ki deor pou anrezistre avek nou. En zefor volonter ki zot anrezistre, zot donn nou en kontak. Pa selman pou nou ler nou annan petet *vacancy*, lenformasyon ki nou kapab *reach out to them*.

Me osi dan bann letan *emergency* koumsa ki nou kapab *reach out* gete ki led zot bezwen. An sa ki konsern Liban Mr Speaker, napa Seselwa vreman ki'n vini vreman pou anrezistre.

So ofisyelman lo sa lalis *Foreign Affairs*, lalis *diaspora* napa Seselwa ki'n anrezistre lo la. Sepandan nou, nou'n fer zefor pou nou *reach out* sirtou avan ler nou, nou'n war konmsi sityasyon pe komans deteryore dan larezyon.

Nou'n *reach out* pou sey rode konbyen Seselwa i annan Liban posib e kote zot ete. E pou vwar si i annan ki a bezwen led.

In en legzersis ki'n tre difisil, Lanbasader i kapab koz lo la, me nou'n ganny kontak ek en madanm ki li in konn enn de dimoun in sey *reach out*.

Lenformasyon ki'n donn nou se ki sa bann dimoun pa oule donn zot kontak, me *they were safe*. Nou nepli annan en Konsil Onorer Liban. I annan en kandida ki nou pe entervi, me Anbasader i an kontak avek 'a', sa Konsil ki i nepli Konsil *outgoing*. Anfen i nepli *outgoing*, in fini son manda.

E sa enn ki nou pe entervi pou li vin nouvo Konsil i an kontak regilye pou vwar ki lenformasyon nou kapab gannyen.

Me apre ki nou'n fer depi mwan Avril, Lanbassad *UAE* ki responsab pou sa rezyon. In kontakte lotorite Libane pou ganny en lalis Seselwa ki zot annan Liban.

E mon bezwen dir ki sa dan tou pei *data protection*. Annandler zot pa pou donn ou menm non, zot pa pou donn ou sertennman pa adres okenn kontak.

Me sa enn safwasi zot in ase zenere, Lotorite Liban in donn nou en lalis e lo la ler nou konte i annan 88 dimoun, en lalis 88 dimoun.

Ler nou regard sa lalis i annan bann non *obviously* ki i pa non ki nou konnen isi. Me sa i posib parske i annan maryaz, i annan non zanfan ensidswit e non petet on sanze.

Zot in osi al pli lwen in donn nou serten limero *passport*. Me okenn kontak, okenn *contact details*. Non, limero *passport* e dat nesans.

Sa lalis dimoun lo la i annan dimoun ki aze depi 4an ziska 95an mon war. Alor kler ki i annan dimoun ki'n etablis, Seselwa ki'n etablis Liban ki nou, nou pa okouran.

Ki nou'n fer prezan pou nou rafin sa lalis nou'n al kontakte Imigrasyon pou kapab ladan, eliminien lekel ki annan *passport*, vreman *passport* Seselwa e lekel ki pa devret lo sa lalis.

Sa prosedir i ankor pe ganny fer parske nou fek ganny sa lalis sa mwan Septanm avek Libane, Lotorite Libane. E Limigrasyon ziska konmela in dir ki sa lalis 88, i annan zis 52 ki dapre zot rikord zot in *issue passport*. Me zot napa kontak.

So vwala kot nou ete Mr Speaker pou mwan dir mon asir Lasanble. Ki nou annan en prosedir evakyasyon, parske dan ka Liban nou'n fer sa lannen.

Ti annan 2 dimoun ki ti vin, ki ti apres nou, ki pa'n zanmen vin Sesel. Zot in ne e grandi Liban mon krwar zot dan 30enn, 40enn lannen. Ki finalman zot dir nou manman in mor, zot pa oule reste Liban *anymore* zot anvi reste Sesel zot pa konn personn Sesel napa fanmir ensidswit.

Nou ti fer atraver *International Migration Organisation*. Nou'n fer laranzman avek bann lazans isi nou'n fer zot vin isi. So zot isi zot in enstale e mon konpran enn ladan pe travay *and ok as far as we know ok*.

So pou mwan dir ki nou annan en prosedir si Seselwa i vini i dir nou zot bezwen led, pour evakye zot, ede pou sorti kit en pei ki an danze nou annan en prosedir pou nou fer li.

Dan ka Liban malerezman Mr Speaker, sa pa'n leka. E ler mon pe koze la napa okenn rikord ki okenn lezot Seselwa ki'n kontakte nou direkteman, kontakte Konsil. Ouswa kontakte enn nou Lanbasad

pou dir ki zot bezwen led pou sorti Liban. Mersi.

MR SPEAKER

Mersi Minis. Bon, parey labitud nou a pran kestyon siplemanter lezot Manm e apre nou a retourn lo kestyon loter Mosyon. Mon annan Onorab Labrosse siplemanter.

HON RICHARD LABROSSE

Mersi Mr Speaker. Dabor mon ti a kontan dir bonzour bann dimoun ki isi dan Galeri e bann dimoun ki pe ekoute. E Minis avek ou delegasyon.

Mr Speaker, mon'n ekout Minis atantivman bann larepons ki in donnen lo sa kestyon. E enn parti sa kestyon i demande ki Gouvernman pe fer okenn zefor pou rapatriy sa bann dimoun.

Minis, i annan bann dimoun dan mon distrik ki'n fer mon demann sa kestyon. Nou rapel dan bann letan kot bann travayer Seselwa ti pe al travay dan sa bann pei parey, Liban i enn. Kot ti annan en kontribisyon ki zot ti fer tou le mwan.

E sa kontribisyon dapre konpran ti vin koman en sekirite si demen zot ganny okenn difikilte laba kot sa li

menm ti kapab ganny servi pou reparti zot.

Mon rapel dan en sesyon FPAC sa ti monte selman mon pa vreman mazinen ki departman ki sa larzan li menm ti ete.

E mon kestyon i ozordi ler nou pe koze, eski ou Minister oubyen ou Gouvernman zot annan okenn Polisi an mars, ouswa zot pe travay lo okenn Polisi.

Ki bann travayer Seselwa ki al travay dan bann pei parey in ganny mansyonnen, ouswa bann pei eksatera. Zot annan en kontribisyon kekfwa zot kapab fer avek Gouvernman isi.

Ki demen si i ariv bann sityasyon parey ouswa bann lezot sityasyon zot ava kapab *facilitate* zot pou zot kapab retour dan pei. Dan plas kekfwa nou kapab vvar nou pe servi larzan *taxpayer's money* ankor enn fwa pou bann loperasyon parey? Mersi Mr Speaker.

MR SPEAKER

Mersi Onorab. Minis.

MINISTER SYLVESTRE RADEGONDE

Mr Speaker, mersi. Mersi Onorab, pou ou kestyon. Non, nou napa en prosedir parey me

i pa vedir ki nou pa kapab konsidere.

Mwan dan mon bann letan ki mon'n travay koman Anbasader e dan sa bann dernyen lannen ki mon'n isi. Bann ka kot Seselwa ki'n oule ganny led pou antre, in toulstan espekte ki Gouvernman i pey zot pasaz pou antre, pou zot retournen.

E nou ki nou fer koman en premye lyen, nou napa en Bidze. *Foreign Affairs* napa en Bidze ki met la pou rapatriy Seselwa, nou bezwen al rode si zot annan fanmir, regarde si fanmir i kapab kontribye. E annandler nou donn zot davans si oule ki apre ler zot ava retournen isi zot rann.

Mon konn enn de ki an partikilye ki ziska konmela apre plizyer lannen i annan dimoun ki ankor pe esper ranboursman larzan ki zot in peye pou rapatriy dimoun.

Ki pa neseserman ti dan kad danze *as such*, me dimoun ki pou en rezon ou en lot deside pou antre Sesel.

Me Onorab, sa lide si i kapab petet ganny dekante. Nou a regarde *Foreign Affairs* si nou kapab met en keksoz an plas pou en tel sityasyon. Si Seselwa pou oule peye, met en

deposit ler i pe ale an ka ki i bezwen rapatriye.

Akoz mon krwar tou dimoun ler pe ale parey ler ou marye *you're wishing for the best* ou pe marye pou lavi, ou pa pe met okenn garanti ki petet pa pou marse. Mersi.

MR SPEAKER

Mersi Minis. Onorab Algae, ou kestyon.

HON EGBERT AGLAE

Mersi Mr Speaker. Mon ava dir bonzour Minis avek ou *panel* e bann viziter Grand Anse ki dan Galeri. Mr Speaker si ou a permet mwan pou pas mon mesaz kondoleans osi avek lafanmir Bistoquet ki'n perdi zot manman, mon konn li koman madanm Antyan ki'n arive granmaten.

Minis dan ou larepons mon ti a kontan petet demann ou. An vi ki depi an Out plizyer pei ti lans en lapel sirtou parey *La France*, Lanmerik, Langleter pour ki zot sitwayen i sorti *Lebanon* o pli vit posib an vi sityasyon ki ti pe *worsen* dan larezyon.

Akoz ki nou petet Sesel nou pa'n servi en form parey ki nou'n pran letan pou nou kapab ariv lo sa ki nou'n arive ozordi la, pou nou kapab ganny

nou bann Seselwa petet ki kapab sorti? Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Onorab, pou ou kestyon. Onorab mwan mon a dir akoz sakenn antre nou osi pa pran son responsabilite?

Ou konnen nou pour demann Seselwa kit Liban or kit okenn pei ki nou pou fer? Nou napa kontak, nou pou bezwen met en lanons lo radyo ou konpran.

Nou, mon pa ekskli sa mwan, me selman mon pe dir osi *it's a two-way traffic*. Nou pe dil avek ban adilt, sakenn antre nou osi nou bezwen osi pran son responsabilite ou konpran?

Si ou santi ou an danze ou bouze ou pa bezwen Gouvernman met en lanons pou dir ou kite. Ou konnen si bonm pe tape gos, drwat ou annan posibilite sove, ou sove. Me vwala ki mon kapab dir. Mersi.

MR SPEAKER

Mersi. Onorab Henrie, ou kestyon.

HON GERVAIS HENRIE

Mersi Mr Speaker. Mon ava dir en bonzour tou dimoun dan Lasanble bann ki a lekout. Mon premye kestyon Mr Speaker mon pe regarde ki depi 1990 in annan pa mwens ki 9 konfli Liban, parmi lekel 5 in avek Israel.

Alors eski Minister Zafer Etranzer in annan rikord ki depi 1990 ler sa bann konfli in deklare, ti annan en zefor lo lapar Lotorite Seselwa pou fer sa bann dimoun vini? Sa i mon premye kestyon.

E dezyenm kestyon an vi ki dan larepons Minis in dir sa prosedir kot Minister Zafer Etranzer i envit bann Seselwa libremain pou deklar zot lekor kote zot ete dan lemonn e Liban napa rikord.

Eski ou ti ava dir la i en loportinite pou bann Seselwa zisteman *wherever* zot ete dan lemon touzour gard sa kontak avek Sesel.

E donn zot bann detay kot zot ete an ka, an ka zot konnen kot zot pe ale. Me zot pa konnen ki pou arive laba e ki mannyer zot pou vini pour ki nou pei e zot fanmir i kapab asiste zot? Mersi.

MR SPEAKER

Mersi Onorab. Minis.

**MINISTER SYLVESTRE
RADEGONDE**

Mersi. Mersi Mr Speaker. Mersi Onorab, pou ou kestyon. Non Onorab nou napa okenn rikord si in annan evakyasyon or kwa ki'n pase dan bann konfli presedan.

Parske parey ou menm ou'n dir sa konfli pa dat la avantyer. Petet i vin en pri pe pli *worse* la me i en konfli ki pe dire depi *des année*.

An sa ki konsern Seselwa vin devan pou zot anrezistre. Ou konnen mon konpran retisans dimoun, mon a dir ou. Mon krwar nou tou, nou annan fanmir deor, nou tou nou annan en lide konbyen Seselwa ki pe viv deor.

Si mon dir ou ozordi bann ki'n vin devan ki'n anrezistre avek *Foreign Affairs* ki'n pare pou anrezistre, donn zot kontak zot non, i annan zis aepre 2mil, se sa 2mil.

Mon pa pou konmen ki poursantaz, me mon krwar i en pti poursantaz. I annan retisans dimoun, mon trouve ler ou koz ek zot, dimoun pa oule ou konnen kote i ete.

I dir ou i an France a la *rigueur* i a dir ou ki lavil i ete me la ou bezwen vreman lapes. Me i pa pou donn ou en non lari, i pa pou donn ou en limero son

lakaz i pa pou donn ou son limero telefond.

Ou donn mwan, Minis donn mwan pou ou, mwan mon a kontakte ou. I annan en retisans e sa retisans nou bezwen konpran.

I annan en pe nou bezwen konpran lepase nou listwar lepase, nou bezwen aksepte. Me nou pa kapab fors dimoun, nou ankouraze, nou ankouraze nou pa pe rod neseserman ki nou le vey zaksyon kote zot ete.

Me nou oule ki Seselwa i kontinyen angaze avek Sesel. Nou le ki ler i annan bann *vacancies*, bann posibilite travay ki donn nou priorite bann Seselwa, *regardless* kote zot ete.

Me apre pli enportan se ler i annan *emergency* koumsa ki nou kapab ganny kontak regarde ki nou kapab fer pou ede. Mersi.

MR SPEAKER

Mersi Minis. Onorab Spiro, ou kestyon.

HON RACHEL SPIRO

Mersi Mr Speaker. Bonzour Minis avek ou *panel*. Bonzour tou koleg Onorab e bonzour bann viziter dan Galeri. Bonzour tou dimoun osi ki a lekout.

Minis, prenon kont larepons ki ou'n donn nou, ou'n dir nou ou napa en Konsil Liban. E nou, nou konnen poudir la deor i annan en kantite nou bann frer, ser Seselwa ki Liban, malgre ou, ou rikord i donn ou 88, me nou konnen i annan preski en pros 200.

Eski ou satisfe avek zefor ki ou Minister in fer pou rapatriy bann Seselwa? Parske lo kote lokal nou'n pa'n tann naryen.

Kekfwa i kapab annan fanmir isi ki annan kontak zot bann pros. Me si sa lenformasyon ki Minister pe fer en keksoz pa ariv la deor nou pou krwar ki naryen pa pe ganny fer. Mersi.

MR SPEAKER

Onorab mon oule dir ou poudir mon krwar Minis in adrese sa kestyon son premye larepons dan sans ki zefor i pe fer. Selman mon a les laparol pou Minis pou gete si li i annan okenn keksoz pou azoute.

MINISTER SYLVESTRE RADEGONDE

Mersi Mr Speaker. Mersi Onorab. Onorab, avek tou respe si i annan bann fanmir, mon pa dir si, i annan bann fanmir ki

isi Sesel ki zot fanmir i Liban, ki zot panse i bezwen led, be oli zot? Akoz zot pa vini?

Kontakte, kontakte Lotorite, kontakte *Foreign Affairs*. Dir vwala nou annan en problem. Mon annan en fanmir x, y nou bezwen led. Be vini, zot pa kapab zis asiz laba, espekte konmsi nou, nou pou devinen, nou pou annan en baget mazik nou konnen kot tou dimoun i ete, kote ki bezwen led.

Ou bezwen led ou bezwen tap laport vini, nou, nou ouver nou, nou pare pou nou ed tou dimoun. Parey mon'n dir ou ti annan 2 ki'n vini nou'n fer tou.

Pa ti fasil ti de 2 dimoun ki reste Liban tou dilon zot lavi, *passport* Libane in fini ekspire, *passport* Seselwa in ekspire pandan lannen pou nou fer tou bann modalite pou zot retournen, nou'n fer li.

So mon ankouraz ou Onorab mon ankouraz tou Onorab si zot konn dimoun ki annan fanmir silvouple les nou konnen. Mersi.

MR SPEAKER

Mersi Minis. Onorab Lemiel, ou kestyon.

HON SYLVIANNE LEMIEL

Mersi Mr Speaker. Bout - en pe mon kestyion Mr Speaker, in reponn akoz mon sipoze pe demann Minis petet prenon kont ki nou vvar sa sityasyon i pe agrave e i kapab i pou agrav plis.

Petet mon ti pou kontan Minis li i dir nou be dan sa ka baze lo diferan larepons ki Minis ou'n donn nou. Dan sa ka ki en lapel spesyal ki ozordi ou dan Lasanble ou pe mazinen fer avek pep Seselwa?

Akoz bokou dimoun i ekout Lasanble, Liban mon pa konnen si zot pou pe tann nou dan sa bann problem ki zot ladan.

So ki i a vin en zefor an plis petet ki ou Minister pou pe fer ki en lapel ki ou pou pe lanse la deor. Pour ki si i annan sa bann dimoun ki dan sa bann problem e ki ou pou sey dir zot fer pou zot *reach out* e ki Gouvernman zot menm zot a kapab ed sa bann dimoun? Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker. Onorab, mersi pou ou kestyion. Mon krwar i en kestyion tre valab,

mon pa dir ki lezot pa valab, tre valab.

Regard mwan, sa ki nou konnen dan sityasyon seren parti *Beirut* pa *Beirut* antye me seren parti nou konpran ki komunikasyon in *disrupt*. So menm si nou ti annan en limero telefonn ti pou difisil pou nou ganny kontak.

E mon krwar enn sa dimoun ki Anbasader ti avek i an kontak avek in perdi menm sa madanm li menm, nou'n perdi komunikasyon avek li.

So me sa ki mon oule dir mwan, mon oule – si bann Seselwa ki kapab ganny SBC ouswa medya sosyal kot zot ete Liban zot dan en problem zot oule lasistans. Be zot bezwen oule sorti. Si zot oule lasistans silvouple *reach out to us*, nou a donn en limero telefonn *on air* si i neseser.

Apre sa mon demann bann Seselwa isi, ki annan zanmi, ki annan paran ki zot konnen, ouswa ki zot doute i riske annan problem kot zot ete. *Please* kontakte nou donn nou en kontak parske nou se sa ki nou pe rode.

Plis ki nou pe fer se ki nou pe demann Imigrasyon pou *refine* sa lalis. Prezan nou, nou pou bezwen rod kontak sa bann

dimoun, nou al regarde si tou zafer i ok.

Me pou nou fer sa nou bezwen annan limero. E se sa mon'n dir ki nou bezwen kontinyen fer sa.

Plis ki fer sa lapel koumsa Onorab, mon pa konnen kwa dot ki mon kapab fer. Mersi.

MR SPEAKER

Mersi Minis. Onorab Loze, ou kestyon.

HON JOHAN LOZE

Mersi Mr Speaker. Bonzour Minis, bonzour tou dimoun al lekout. Minis, ki m on ti pe oule demann ou, eski nou kapab pran sa koman en *learning moment* si oule, ki nou a kapab *going forward* met an plas akoz nou pa ekspekte bann konfli mondal, nou pa ekspekte nou bann konfli mondal i bese ler ki kwa kan militer.

Ouswa parey nou'n eksperyanse dan *COVID* met an plas bann modalite kot dimoun i kapab *check in* swa elektronikman swa parey ou'n dir donn en limero telefonn; swa met an plas en zofisyé, ouswa en departman ki pe spesyaliz dan nou bann resortisan aletranze letan zot dan bann moman kriz – mon krwar i apel kriz sa.

So si ou, ou kapab anvizaze annan en *way forward* avek ou Minister, vi ki mon pa krwar ki sa bann keksoz pou bese dan sa monn ki nou pe viv ladan ozordi. Mersi Mr Speaker.

MR SPEAKER

Mersi Onorab. Minis?

MINISTER

SYLVESTRE RADEGONDE

Mersi Mr Speaker. Onorab, mersi pou ou kestyon. Nou annan deza en sistem - mon pa dir i parfe mwan – nou sistem se sa *diaspora*, kot nou pe ankouraz Seselwa kontakte nou e donn nou zot bann kontak, anrezistre avek nou.

Nou'n pran lokasyon sa renyon sa Konsil Onorer la mon pa konnen kan sa – pou nou pran sa - pou nou fer en *centre spread* dan *NASYON call* zot tou bann kontak Lanbasad ek bann Konsila aletranze i deza lo *website*, me dimoun annandler i kontan en bout papye.

Nou'n pibliye *NASYON* kan – Sanmdi kontak tou nou bann Konsil Onorer atraver lemonn dan en manyer ki Seselwa kot zot ete, ki bezwen led zot kapab annan en kontak pou fer li.

Apre i en pratik komen ki Sesel in adopte depi lendepandans, ler dan bann pei

kot nou napa en Lanbasad Sesel, kot nou napa en Konsila Sesel, me kot i annan en Lanbasad Britanik ouswa en Konsila Britanik, nou demann zot pran kontak avek - annandler menm Franse osi.

Me dan lepase letan mon get dan letan *COVID*, sa i mars tre byen, kot Seselwa in ale in tap laport e sa bann pei in toultan ede. So vwala, mon ankouraz zot. Yes, Onorab, nou a fine tune nou sistem e fer li pli bon pou ki dimoun i kapab anrezistre e si zot pa anrezistre annan en posibilite kontakte nou dan ka bezwen. Mersi.

MR SPEAKER

Mersi Minis. Onorab Woodcock, ou kestyon?

HON WAVEL WOODCOCK

Mersi Mr Speaker. Bonzour Minis ek ou lekip. Minis, ou'n dir en keksoz vreman enportan. Ou'n dir ki i annan en retisan parmi bann diaspora menm Liban e lezot parti dan lemonn kot i annan bann diaspora - e ou'n dir ki i annan neseserman 2 mil *diaspora* ki'n vin devan pou donn zot lenformasyon, tou zot detay. E ou'n osi eksplike pou dir le rezondet, akoz zot pa pe - akoz leksperyans sa bann dimoun lepase bokou zot ti

bezwen sov zot pei - zot ti ganny forse an egzil. E zot annan sa lafreyer - sa krentif.

So mon kestyon i ki mannyer - konmsi kwa ki nou kapab ki ou Minister pe sey fer, ouswa kwa ki zot kapab fer pou sey *breakdown* sa *barrier*? Konmsi pou ed dimoun *overcome* sa *phobia*, sa *trauma* ki zot in passe dan lepase sey *convince* zot vreman pou donn zot bann lenformasyon e bann detay ou Minister. Mersi bokou.

MR SPEAKER

Mersi Onorab. Minis?

MINISTER SYLVESTRE RADEGONDE

Mr Speaker, mersi. Mersi Onorab, pou ou kestyon. Ki nou pe fer - byensir ledikasyon. Nou kontinyen koze e nou dir be sa bann letan. Sa bann letan I en bann letan sonm dan listwar - in fini pase. Nou bezwen prezan tourn en paz e get plito ver lavenir e ankouraz sak Seselwa pou santi li par dan sa pei ki pou nou e fer li.

Donk, nou ankouraz zot *apply* pou bann *job* par egzanp ki zot ganny *interview* parey en Seselwa ki rezidan isi. Prezidan dan tou son deplasman I fer sir ki i zwenn Seselwa. Annandler petet nou annan kontak en

fanmir kekpar dan en landrwa, nou kontakte sa fanmir e sa fanmir I kapab zwenn Prezidan.

Pou nou etabli sa konfyans, e se la napa politik la en? Pou nou etablir sa konfyans ki sa paz in tournen zot devret santi zot en parti. E sa en lapel ki mon oule fer, mon le servi sa lokasyon pou mwan fer ankor Seselwa – Sesel in sanze.

Bann letan dan plizyer lannen pase i pa pou retournen - *regardless* ki arive demen, i pa pou arive. So santi zot parti sa pei ki pou zot – ki pou nou zwe zot rol a plen. Mersi.

MR SPEAKER

Mersi. Nou a pran kestyon siplemanter Onorab Pillay?

HON SEBASTIEN PILLAY

Mersi Mr Speaker. Mon'n ekout byen bann larepons ki Minis in donnen, Minis pa blyie ou ti parti sa leta Sesel avan ou osi ou en?

(murmurings off-mic)

HON SEBASTIEN PILLAY

Ki ou'n dir in sanze la, en? Zis mon *remind* ou. Mr Speaker, mon pe met lo rikord Lasanble ki avan mon demann sa *PNQ*, Minister Zafer Etranzer oubyen Gouvernman ... pa'n vin devan

ditou pou fer okenn *statement*, fer okenn nanryen.

Ozordi atraver sa *PNQ* ki zot in ganny sa loportinite pou zot vin fer sa avek tou respe ki mon annan pou ou Minis, sa i en moman pou ou sezi loportinite pou pas ou mesaz avek bann Seselwa la deor, pou dir zot vin devan.

Akoz zot pa pou kapab vin devan si zot pa konnen ou pe fer en keksoz. So, ou pa kapab blanm dimoun pou pa vin devan!

E dezyenmman Mr Speaker, Minis in met lo rikord ki poudir mon oule zis repet lo son larepons ki in dir, poudir ler Prezidan in al vizit ou kontakte en fanmir, me nou fer parey. Akoz pou ler Prezidan nou kas tou – nou fer tou pou li kapab zwenn dimoun, la pa kapab fer parey pou sa bann dimoun ganny lenformasyon? So, i enportan.

So kestyon pou Minis, prenon kont bann lenformasyon ki ou pe donn nou dan Lasanble ozordi, ou dir nou poudir sa bann dimoun pa pe kontakte ou, me sa kestyon in vini zisteman akoz i annan dimoun ki konsernen e zot pa pe war Gouvernman pe fer nanryen en zot oule konnen kwa ki Gouvernman pe fer.

Atraver sa kestyon ou'n ganny loportinite ozordi pou eksplike kwa ki pe fer.

So ou'n dir poudir Anbasader ti an kontak avek en dimoun ki'n perdi son lavi – pa perdi son lavi me perdi kontak avek - *ok?* E zot pa kapab ganny kontak personn. Ou ti annan en former Konsil Onorer *Lebanon*, me akoz zot pa rod sa former Konsil, rod lenformasyon avek li ki li I annan ki i paret zot pa'n fer, rod lenformasyon avek li e lalis bann dimoun ki li i ti annan koman bann former Konsil e koman pran kontakte sa bann dimoun pou vwar si zot *ok*.

Akoz mannyer sityasyon Liban i ete personn pa pe ganny kontak avek personn e se pour sa rezon ki Langleter, Lanmerik bann pei pli gran pe menm anvoy avyon pou tir zot bann sitwayen Liban. Sa i mon premye kestyon.

Mon 2 enm kestyon, Mr Speaker, ou'n koz lo 80 dimoun e nou, nou konnen atraver bann lenformasyon ki nou'n sey rode i bokou plis ki 80 dimoun. Me ler nou regard sa destriksyon ki pe arive Liban – konfli avan sa pa ti sitye dan Liban, ti annan en landrwa lokalize, me la i nepli lokalize. Ler ou pe gete - ankor yer swar

mon'n gete, i pe ouver partou dan larezyon e destriksyon i terib, lopital pe ganny atake.

So kestyon ki mon annan pou ou, eski ou pa kapab servi bann lezot mezir par egzanp atraver *Médecins Sans Frontières*, atraver bann lezot lorganizasyon ki etabli bann lalis, ki si i etabli bann serten baz donnen pou vwar si atraver zot osi ou pa kapab met en alert pou si i annan avan, i *either* i annan Seselwa ki ganny trouve in ganny dimal, oubyen in ganny en problem, Sesel i kapab ganny kontakte pou sa bann Seselwa.

E Mr Speaker, mon oule met lo rikord an se ki konsern repatriyasyon, sa kestyon in vin dan Lasanble, akoz nou annan en lirzans dan lemonn ozordi pou Gouvernman dir nou kwa egzakteman ki zot pe fer? Pa ti neseser si...zot dir nou zot pe fer

MR SPEAKER

Mersi Onorab. Bon, ou demann ou 2 kestyon. Minis, ou a adres son 2 kestyon silvouple?

MINISTER SYLVESTRE RADEGONDE

Mersi Mr Speaker. Mersi Onorab, pou ou kestyon e pou ou komanter. Mr Speaker,

Onorab – ou a permet mwan reponn Onorab, lo detrwa keksoz. Mon ti parti sa sistenm - mon pa kasyet, me apre mon'n kite sa sistenm. Mon pa pou...

(APPLAUSE)

MINISTER SYLVESTRE RADEGONDE

... mon pa pou al dan zistwar parske ozordi mwan mon'n tournen sa paz. Mon anpe avek, mon lekor avek lemonn. *Are you?*

Mr Speaker, sa sityasyon...

(comments off-mic)

MR SPEAKER

Les Minis reponn.

MINISTER SYLVESTRE RADEGONDE

Mr Speaker, sa sityasyon-sa sityasyon i tro grav pou nou zwe politik avek. Onorab, e sa i aplik pour tou dimoun. E mon redir ankor, nou isi Sessel i ptipi – *limited resources*. Dimoun ki dan bezwen i apros ou i demann led e nou ede.

E Onorab, ou annan mon telefonn ou – kantite Onorab la tou le de kote latab i annan mon telefonn. Si i annan bann ka ki zot konnen vin devan les mwan

konnen e mon a fer le neseser. Mwan mon pa devinen mwan - mon pa devinen. Ou dir konmsi ki nou pa pe fer nanryen si ti napa kestyon nou Opa Ope fer nanryen.

Nou depi Avril- depi Avril nou pe fer demars pou nou gete kote Seselwa I ete, rod kontak, rod lalis ensidswit. I pa la Onorab- I pa yer-i pa yer. Konmsi mwan mon dir annou tir politik ladan, annou tir bann lemosyon, annou *focus* lo proteksyon non bann Seselwa kot zot ete, regardless kot i ete.

Prezidan ler i zwenn bann dimoun ki aletranze, i zwenn dan son kapasite koman Sef Deta, pa koman *Leader LDS*, koman Sef Deta. Lekel ki nou envite? Nou envit tou Seselwa ki nou konnen nou annan en kontak – tou.

An zeneral tou bann ki nou kontakte i vini. Mon le fer annan sa pwen. An sa ki konsern Konsil Onorer ki'n sorti, Anbasader i an kontak avek. Mon ti devret les Anbasader dir kwa ki i pe fer li. i an kontak mon'n dir pli boner – i an kontak avek sa Konsil ki'n sorti ki annan serten lenformasyon li menm parey i an kontak avek sa enn ki nou pe interview pou ranplas li.

I annan en *open door* ki i pe fer avek li pou nou ed dimoun. *Médecins Sans Frontières*, wi-wi. E mwan mon bezwn al kot *Médecins Sans Frontières* avek en pe lenformasyon pou mwan dir be regarde, nou annan 5 Seselwa dan sa rezyon ouswa dan sa enn rezyon-dan sa enn rezyon. Pour mwan al dir ki nou annan Seselwa an Liban pa pou ed personn sa. Mazinen *Médecins Sans Frontières* parey Lakrwa Rouz, parey lezot, zot pe dil ek en kantite nasyonalite. Nou bezwen zone in. Mon le lenformasyon pou mwan kapab zone in Onorab.

Alor lenformasyon ki ou annan – si ou annan silvouple partaz avek mwan mon a partaz avek mon tim avek bi pou nou attend menm lobzektif ki oule ki nou osi nou le, protez nou bann dimoun. Mersi.

MR SPEAKER

Mersi Minis. Mon pou termin sa sesyon kestyon la, Onorab Pillay, les mwan dir ou, mon ti pou permet en kestyon ankor ekspekte ki ou bann kestyon i ranpli avek lakizasyon kont Minis, ki'n sa - ki i pe mal fer e sa pa'n byen fer....

(*comments off-mic*)

MR SPEAKER

Onorab Pillay, silvouple-silvouple setou. Minis ek ou delegasyon, mersi bokou e mon swet ou...

(*comments off-mic*)

MR SPEAKER

Onorab, mon pe demann ou komansman lasemenn aret enteronp Lasanble, avek enteronp mwan ler mon pe koze. Mersi Minis. Bonn kontinyasyon.

(*The Minister and his delegation were excused from the House*)

MR SPEAKER

Onorab William, mersi. Ou ti annan laparol si oule adres labyenveni pou ou bann rezidan.

HON WAVEN WILLIAM

Mersi Mr Speaker. Mon ti ava kontan swet labyenveni sa bann zoli dimoun sorti dan distrik Grand Anse Mahe. E Mr Speaker, parey ou'n dir *across the board* zenn, mwayenn-az, avek trwazyenm az, labyenveni. Fotespere zot pas en bon moman letan ki zot isi. Mersi.

MR SPEAKER

Mersi. Nou annan en sityasyon en pti pe spesyal e mon bezwen sey kanmenm demen adapte en pe prosedir Lasanble. Minis in fer mwan konpran, pou dir bann zofisyen ki konsernen avek *Question Without Notice* i byen bezwen ganny latansyon lo *landfill* akoz sityasyon dife.

E in demann mwan si mon kapab pas Kestyon *Without Notice* akoz i konsern salte relye pou sa bann zofisyen. So mon pe fer en leksepsyen pou sa voyaz akoz i annan defwa kestyon pou ozordi mon krwar.

Alor lo papye, Minis pou kestyon e pour ki i kapab apel bann zofisyen ki i bezwen. Yes, Onorab Pillay, ki ou pwen?

HON SEBASTIEN PILLAY

Mersi Mr Speaker. Mr Speaker, mon pa le ganny vvar pe enteronp Lasanble. Mon ti a kontan klarifye sa fwa si anba *Order 8 Standing Order* si safwasi ou pou les kestyon siplemanter lo *Question Without Notice* parey ou'n fer...

MR SPEAKER

Non-non...

HON SEBASTIEN PILLAY

... dan serten ka. Savedir ou pa pou les kestyon safwasi?

MR SPEAKER

Non. Vi ki nou pe fer sa spesyal pou permet sa bann zofisyen partisipe, mon pou pran kestyon – dimoun ki'n soumet kestyon e son siplemanter e pa lezot. Mersi.

HON SEBASTIEN PILLAY

Be ou'n fek dir nou annan letan pou kestyon, Mr Speaker!

MR SPEAKER

Mersi.

(*Interruptions*)

MR SPEAKER

Wi, Onorab Vidot, ki ou pwen?

HON AUDREY VIDOT

Mon ti oule zis en anba *Order 8* en pti klarifikasyon avek ou, eski sa prosedir ki nou pe swiv la ozordi parey Onorab Pillay i dir ou, pou aplik li pou tou bann *Question Without Notice* oubyen i zis ler *United Seychelles*...?

MR SPEAKER

Mon pou aplik li an zeneral, me si mon deside ki i merit en leksepsyen, mon a fer leksepsyen. Mersi.

Bonzour Minis, pou Lagrikiltir, Sanzman Klima e Lanvironnman Mr Flavien

Joubert. E mon konpran Minis ou annan zofisyen ki pou reponn kestyon *Question Without Notice* avek ou la e alor mon a dir bonzour e byenveni Mr Shane Emilie *CEO Land Waste Management Agency* e Mrs Brigitte Roucou, *Chief Inspector Land Waste Management Agency*.

Mon annan zis CEO ek Minis, *sorry*. Nou a pran Kestyon *Without Notice* Onorab Spiro, poz ou kestyon.

HON RACHEL SPIRO

Mersi Mr Speaker. Bonzour Minis, bonzour CEO. Mon kestyon i koumsa,

Eski Minis i kapab eksplik sa Lasanble, ki bann difikilte ki son Minister i fer fas avek, an relasyon avek koleksyon salte an zeneral e ki zot anvizaze fer pou remedye sa sityasyon? Mersi.

MR SPEAKER

Mersi Onorab. Minis?

MINISTER JOUBERT

Bonzour Mr Speaker. Bonzour bann Manm Lasanble Nasional ki la bomaten. Bonzour tou bann dimoun ki pe ekoute. E Onorab, mersi pou sa kestyon.

FLAVIEN

Mr Speaker, parey nou tou nou konnen se Lazans LWMA ki responsab pou zesyon salte dan pei. Lazans i annan en programm koleksyon salte byen striktire e organize atraver 9 kontrakter pou kolekte salte. Sa 6 lo Mahe, 1 lo Praslin en 1 lo La Digue. Sa i atraver en kontra 6 an depi lannen 2019. I pou eksplike an Avril 2025.

Programm koleksyon salte i konm swivan; salte i ganny trouve dan bin sa ki nou apel bann salte kot lakour. I ganny kolekte toulezour lo tou *bin site* to tou le 3 zil. E kot i annan nesesite pou fer en 2enm koleksyon, Lazans i fer provizyon avek sa kontrakter kot i vin en kou an plis lo Lazans e sa pe ganny fer dan plizyer landrwa aktyelman.

Salte i ganny trouve an deor bin e la nou pe koz bann gro debri; salte vezetal ensi ki feray. Sa i ganny ranmase 1 fwa tou le semenn kot bin site.

Bann pli gran defi ki Lazans pe fer fas avek i konm swivan ;

Dan Lendi sirtou par egzanp Lendi lafen dimwan bann lakaz dan kominote, kot bokou plis salte ki debord lakantite bann bin ki annan dan bann landrwa piblik. Sa i

met bokou retar ek koleksyon salte an zeneral.

I osi ankouraz bann vermin parey lisyen, ek lera, pou fer pa mal dezord pandan lannwit.

Akoz salte i debord bann striktir. I debord bann bin. Me sa i koz bann problem estetik dan lakominote.

Lo defi rankontre, se akimilasyon bann gro debri salte vezetal e feray ki manm piblik i zet malapropo kot bin. Malgre i annan en ler e en zour strik pou met sa bann – plas sa bann kalite salte lo bor bin, i domaz ki dimoun pa respekte konsiny ki Lazans i mete.

Parfwa zis apre ki kontrakter in retir sa bann kalite salte obor bin, dimoun i pase par deryer e zot ranpli li avek bann debri sorti kot zot lakaz e sirtou nou vvar ki dimoun i met bokou bann debri vezetasyon.

E nou'n met bokou lanfaz lo la pou dimoun arete met debri vezetasyon acoz sa i kapab koz en problem polisyon e i kapab ganny debarase avek dan en lot fason apropriye.

I osi sa problem kot i annan biznes komersyal e i zet salte kot bann piblik e sa i overload kapasite. I anpes sa

bann kontrakte fer zot travay. Zefor pe kontinyelman ganny fer pou rod levidans pou sa bann ki koupab pou fer sa bann aksyon e pou zot fer fas avek Lalwa.

Me dan lenstans ki napa okenn laprev, i kout Lazans ankor depans ek zefor ekstra pou remedye bann sityasyon. Pou remedye sityasyon Mr Speaker, Lazans pe fer sa bann demars swivan; kontinyen met plis bann *sign board* e fer lanons e sansibilizasyon pou edik lapopilasyon lo bann bon pratik zet salte, koman pou servi bann bin e osi pou triy zot salte pou anpeste ki pou ede dan koleksyon.

Fodre rekonnet ki ledikasyon lanvironnman sirtou pa pou zet salte partou, servi bin byen e osi resikle salte i dan laporte piblik pou bokou lannen, me i domaz ki sa move mantalite e konportman dimoun pe kontinyen afekte zefor nasyonal lo kote salte.

Lazans in fini komans travay de pre avek Lazans Lenfrastruktir e Gouvernman Lokal pou agrandir e aranz tou bann *bin site* e mon krwar bokou bann Onorab, zot in war dan bann distrik kot bann *bin site* pe ganny aranze, pe ganny fer pli prezantab.

E i pran plis bin me i osi annan ase lespas kot bann salte i ganny kolekte 1 fwa par semenn tel ki *bulky waste*.

Sa i bann linisyativ pou ede anmenn lord ek nouvo vizaz kot bann *bin site* afen ki manm piblik i ava servi bin pli byen. E si sa bann *bin site* i dan en kondisyon bokou pli prop.

En lot linisyativ, se en travay; pilotaz kot en kontrakter i retir zis salte dan bin e en lot i retir bann gro debri ki mon'n deza mansyonnen, afen ki nou ava war plis lord ek lapropte kot bin site.

Sa i en demars pou Lazans konnen ki modalite ki pou mars pli byen dan konteks Sesel. I fer 5 mwan ki sa travay pilotaz i anmars e i deza pe donn nou serten lendikasyon pozitiv e Lazans pou kontinyen eksplor sa bann opsyon an mezir ki letan I ale.

Lazans pe osi eksplor posibilite etabli bann stasyon lo en baz rezyonal ki pou resevwar bann salte ki pa sipoze dan bin, ver, prensipalman bann *bulky*, salte vezetal e osi bann feray.

Sa linisyativ pou ganny realize depandan lo disponibilite later e osi siper finansyel ki Lazans i gannyen. E Lazans i reste angaze e determinen pou rod solisyon

pratikab ki kapab pran kont nou topografi defayans operasyonnel, me a lafen i enportan ki popilasyon i egzers zot devwar sivik pou gard nou pei prop e servi tou nou bann fasilité Leta parey ki en bin site dan en fa son ki apropiye. Mersi Mr Speaker.

MR SPEAKER

Mersi Minis. Onorab Spiro, nou a pran ou siplemanter?

HON RACHEL SPIRO

Mersi Mr Speaker. Mr Speaker, permet mwan petet demann en pti pe plis kestyon, lefe ki i annan leksepsyon i ganny fer serten fwa pour *LDS*. E la nou lo nou kote nou pa pe kapab demann serten kestyon. So, mon kestyon siplemanter i koumsa;

Tenan kont ki i annan plis konstriksyon dan pei e i annan plis volim salte ki pe akimile partou dan pei, eski letan sa kontra ki sa bann dimoun i annan an 2025 i ekspire, zot pou revwar lakantite dimoun ki fer koleksyon salte ki zot mete, e lakantite letan osi? Si petet i pe fer zis en fwa dan en lazournen, met plis letan?

E eski zot kapab osi donn nou en pti pe lenformasyon lo

kantite larzan ki pe ganny depanse dan zesyon salte?

E anpasan mon ti a kontan osi fer remarke ki nou pe souvandfwa war *landfill* pe pran dife. E eski zot annan en problem dan zesyon lo *landfill* ki pe koz sa sityasyon, tenan...?

MR SPEAKER

Mersi Onorab. Ou'n ariv 3 kestyon.

(*Interruption*)

HON RACHEL SPIRO

Mr Speaker, mon pa ankor fini eksplik mon kestyon.

MR SPEAKER

Ou'n ariv 3 kestyon!

(*Interruption*)

MR SPEAKER

Minis? Minis, ou a pran kestyon Onorab, silvouple.

(*Interruption*)

MINISTER JOUBERT

Mersi Mr Speaker. Mersi Onorab pour 3 kestyon ki'n ganny demande. Mr Speaker, mon pou pas sa kestyon konsernan *tendering* e osi *cost* avek *CEO*. E apre osi *CEO* i ava

donn en kontrandi Lasanble, vi ki tou dimoun pe demann kestyon lo dife *landfill*.

Me selman mon ti a voudre fer kler avek Onorab, ki sa peryod ki nou ladan la *right now*; Septanm, Oktob, Novanm, ou a realize ki dan bann lannen ki'n pase letan nou ganny bann lensidan dife, in ariv dan sa peryod. I letan ki nou ganny kondisyon sek.

E risk dife la aktyelman i pa zis *landfill*. Risk dife i partou. E menm risk dife lafore i ase enportan *right now*. Alor i enportan ki nou pran kont sa.

E - me selman, annou note ki dife in arive kot *landfill*. Me selman i annan en sityasyon kot dife pa'n propaze, akoz kouvertir in ganny fer bokou plis ki avan. En kantite kouvertir later rouz lo *landfill* ozordi, ki fer ki dife pa pe propaze. I pa pe sape parey in arive dan lepase.

Alor, mon a pas laparol avek mon koleg Mr Speaker, avek ou permisyon, pour li kontinyen lo sa size *tendering*, *cost* e osi donn en *update* lo dife *landfill* kot i ete ozordi. Mersi.

MR SPEAKER

Mersi Minis. *CEO*, ou annan laparol.

CEO LWMA SHANE EMILIE

Mr Speaker, mersi. Bonzour tou bann Onorab avek tou lezot dimoun ki pe ekout nou la bomaten.

Onorab, mersi pour ou kestyon. Pour mwan fer resorti ki nou'n fini pran kont tou sa bann faktor ki ou'n mansyonnen la *actually*, kot tou bann devlopman ki pe arrive. Nou'n deza annan diskisyon avek Gouvernman Lokal.

E osi *LWMA* i asiz lo sa komite itilite - *Utilities committee* parey nou dir an Angle, ki pe ganny ase lenformasyon. E menm la nou'n fini *setup* en komite ki nou pe diskrit lo *scope*, pou fer sir ki *next year* nou kouver tou sa bann landrwa. E fer sir ki nou pe *provide additional bins*.

Parey nou konnen, *bin* in fini ariv dan pei. Nou pe al angrav zot la pour nou met nimerou *hotline*. So tousala nou deza pe pran kont, pour nou kapab fer sir ki nou *capture the scope* pour *tender next year*.

An term sif konmyen kot *LWMA*, mon kapab anvoy sa lenformasyon par *email* Mr Speaker, avek ou permision. Pour ou kapab ganny tou bann sif an term konbyen i pou kout nou lo Mahe, lo Praslin avek La

Digue pour koleksyon salte. Mersi.

MR SPEAKER

Mersi. Bon, mon a permet *CEO* fer son depar. E si i bezwen donn latansyon *landfill*, mon swet li bon kouraz. Mersi bokou.

HON RACHEL SPIRO

Mr Speaker, an pasan mon note ki nou pa ti ankor reponn kestyon lo *landfill* egzakteman.

(Interruption)

MR SPEAKER

Bon, mon'n fini. Mersi. Nou a apel lot delegasyon silvouple.

(comments off-mic)

MR SPEAKER

Bann Onorab, sesyon i *on* silvouple. Aret bann komanter. Tou lede kote.

Bonzour. Nou annan Mr Keven Nancy Sekreter Prensipal pour Lagrikiltir e Mr Roy Govinden *Principal Agricultural Scientist* pou asiste Minis pou reponn kestyon. Nou konmans avek kestyon 207 dan non Onorab Richard Labrosse.

HON RICHARD LABROSSE

Mersi Mr Speaker. Minis, mon a dir ou bonzour ek ou delegasyon. E ankor en bonzour pour bann dimoun ki a lekout. Kestyon nimero 207 i lir konm swivan;

Eski Minis i kapab enform Lasanble ki travay ki son Minister pe fer, ou anvizaze fer ansanm avek fermye, pou fer sir ki lakantite langre kemikal ki ganny servi i ganny kontrole prenan kont lasante bann dimoun ki travay avek sa bann prodwi? Mersi.

MR SPEAKER

Mersi Onorab. Minis, repons?

MINISTER

JOUBERT

Mersi Mr Speaker. Mersi Onorab pour ou kestyon. Mr Speaker, Departman Lagrikiltir atraver Stasyon Resers i annan en gid dozaz pour lakantite langre ki ganny aplike pour bann diferan kalite plan, kalite later e osi metod plante.

Sa i en gid ki evite ki lakantite langre ki pe ganny aplike pa koz domaz pour lanvironnman. E osi pou evit gaspiyaz anvi ki i annan zis en serten kantite langre ki ganny abzorbe par bann plan.

Laboratwar Later e Plant Grand Anse, i enn bann servis

a laporte fermeye ki ede pou etablir nivo bann eleman dan later pou endike ki kantite langre i bezwen ganny aplike.

Departman atraver Seksyon Resers ek Ekstansyon, in komans fer Sesion Formasyon avek bann fermeye pour zot pli kapab konpran sa bann rekomandasyon sorti kot Laboratwar Later. Ki an retour i ava ed zot konnen ki kantite langre zot pou aplike dan zot plantasyon.

Mr Speaker, mon prezimen ki Onorab son kestyon i osi konsern lezot kemikal, apard langre ki ganny servi dan lagrikiltir. Alor mon a pas lo la.

Departman atraver son servis ekstansyon ek resers an kolaborasyon avek bann lezot partener, par egzanp Proze *Ridge to Reef*, in komans fer serten travay avek lakominote fermye. E sa i enkli Sesion Formasyon e zouti ki zot kapab servi pou etabli si zot plan i bezwen langre, dan en bi pou ede pou kontrol kalite e kantite langre ki pe ganny aplike.

Identifikasiyon e metod kiltirel pou kontrol pes; bann bon pratik pou servi pestisid; dozaz apropriye pou aplik diferan pestisid. E osi formasyon lo bann prodwi

alternativ pou kontrol pes pou evite ki nou ganny rezistans parmi bann pes.

Tou sa i avek bi pou edik bann fermye, lo lefe pestisid ek langre lo lasante imen ek lanvironnman, ki pou ankouraz zot pou servi bann opsyon ki pli senp.

Par egzanp, nou annan Metod Entegre pou Kontrol Pes, ki an Angle nou apel *IPM* (*Integrated Pest Management*), ki i pran kont tou bann lezot metod ki kapab ganny servi pou kontrol popilasyon pes ek lentansite malad. Maladi lo laferm, kot lizaz pestisid i vin dernyen opsyon.

E dan tel ka; bann opsyon biolozik ek bann *biopesticide* i ganny ankouraze. I enportan pou note osi Mr Speaker, ki anba Lalwa Pestisid, i obligatwar ki tou bann dimoun ki travay avek pestisid, i bezwen annan en Sertifika Konpetans pou pratik en tel aktivite.

Anliny avek sa Lalwa, selman bann kliyan ki annan en Sertifika Konpetans ki kapab aste kemikal lo nou bann *Store* Departman Lagrikiltir. E an adisyon, lo *store* i osi annan ozordi en dokiman ki donn lenformasyon lo bann prodwi alternativ, ki mwen toksik ki deza pe ganny stoke lo *store*.

E parey nou ti enform Lasanble dernyen fwa, nou'n deza travay lo en brosir ki fermye i kapab aksede nenport ki moman pour zot kapab ganny sa lenformasyon.

An plis ki sa, resaman i annan formasyon ki'n ganny fer avek travayer *store*, pou osi evite ki zot osi zot pa ganny ekspoze avek sa bann kemikal dan lagrikiltir. Mersi.

MR SPEAKER

Mersi Minis. Onorab Labrosse, ou siplemanter?

HON RICHARD LABROSSE

Mersi Mr Speaker. Mersi Minis. pour ou larepons byen detaye. Mr Speaker, mon'n tann Minis dan son larepons, in fer resorti ki i annan en Lalwa an plas. E mon kestyon i pou konm swivan;

Minis, eski ozordi ler nou pe koze, eski i annan bann travay ki'n ganny fer pou - dan sa Lalwa li menm, oubyen si i annan enn an plas, oubyen si zot pe mazin travay lo enn?

Eski i annan bann travay ki zot pe fer ansanm avek Minister Lasante pou fer sir ki Minister Lagrikiltir, ler nou pe koz lo nou bann kemikal ki pe ganny servi dan lagrikiltir - nou pe koz lo lasante osi in ganny

resorti. Eski i annan sa travay antour Minister ek Minister Lasante pou revwar sa en pe sa Lalwa pou fer li vin *up to date*? Mersi Mr Speaker.

MR SPEAKER

Mersi Onorab. Minis?

MINISTER

JOUBERT

Mersi Mr Speaker. Mersi Onorab. Mr Speaker, wi, i annan en travay revizyon ki pe ganny fer ansanm ek Minister Lasante pou get dan bann nouvo rekomandasyon konsernan bann diferan prodwi lo *market*.

Pou osi entrodwi serten restriksyon lo serten sibstans anliny avek bann rekomandasyon enternasyonal. E menm pou anpes lilitizasyon serten sibstans ki ozordi in ganny konsidere konman danzere dan lagrikiltir.

E osi sa Lalwa i bezwen ganny met azour, pou fer ki son bann preskripsyon lo lafason ki keksoz i ganny servi lo bann diferan kalifikasyon ki dimoun i bezwen annan, i ganny amelyore, pour ki nou war en pli bon kontrol dan lafason ki nou servi pestisid ek lezot kemikal dan pei.

Alor Mr Speaker, wi, i annan en revizyon dan sa Lalwa e i pe ganny fer konzwentman par Minister Lasante ki prezid – ki *Chair* ouswa prezid sa Lalwa. Me avek tou bann partener ki enplike dan son laplikasyon. Mersi.

MR SPEAKER

Mersi Minis. Onorab Labonte, ou kestyon?

HON ANDY LABONTE

Mersi Mr Speaker. Bonzour Minis avek ou *panel*. Minis, parti mon kestyon in ganny demande dan Kestyon Siplementer Onorab Labrosse an relasyon avek lafason ki langre i ganny vann avek bann fermye.

Eski sa i vedir ki zis lotorite konsernen ki annan drwa enporte e vann bann langre, pestisid e kemikal ki ganny servi pour lagrikiltir, pou anpeste ki bann lezot endividé i ganny akse avek sa bann kemikal, e zot servi li san ki zot in ganny en *training* pou servi li apropiye? Mersi.

MR SPEAKER

Mersi Minis, repons?

MINISTER

JOUBERT

FLAVIEN

Mersi Mr Speaker. Onorab, sa kestyon lenportasyon i en kestyon ase enportan pour nou. Nenport ki enportater i kapab fer vini diferan kalite prodwi ki ganny servi dan lagrikiltir. Me selman nou bezwen fer sir ki nou pe fer li avek kontrol pour bann ki poz en danze.

Par egzanp, konmela ou annan bann formilasyon pestisid ki tre danzere. E alor, serten enportater si i pou deside pou enport sa bann prodwi, nou bezwen verifye byen.

E nou bezwen asire ki li koman enportater i kapab egzerse sa bann kontrol, pou fer sir ki i pa pe koz danze pour son lekor, son travayer ek bann ki pou vin aste avek li. E i kapab prezant sa prodwi avek lenformasyon ek bann dimoun ki vin aste.

Me laplipar prodwi, nenport ki dimoun i lib. Nenport ki enportater i lib pour li fer vini. Me parey mon'n dir i pou annan kontrol.

Me i annan serten prodwi ki nou krwar i bezwen toulstan reste en serten kontrol strik lo la. Akoz, danze ki kapab poze pour lanvironnman, pour imen. Sirtou risk anpwazonnman avek serten sa bann prodwi.

MR SPEAKER

Mersi. Ou pe eklersi en pwen Onorab Labonte?

HON ANDY LABONTE

Mr Speaker, mon zis anvi eklersi en pwen lo larepons ki Minis in donne.

MR SPEAKER

Ale.

HON ANDY LABONTE

Zis – Minis, mon apresye larepons ki ou'n donne. Me vi ki nou konnen poudir sa bann kemikal i annan en vreman en – si nou pa servi li byen, i annan en lefe advers lo lasante piblik. Parey ou'n dir pou dir i annan endividé ki kapab enport sa bann kemikal ou pestisid.

Me ki mannyer nou kontrole ki sa bann dimoun pa vann sa kemikal avek bann endividé ki kapab mal servi li e kree en danze lo nou lasante piblik? Mersi.

MR SPEAKER

Bon, mersi. Minis, ou le azout en leksplikasyon?

MINISTER JOUBERT

Ok. Mersi Mr Speaker. Mr Speaker, nou annan lalis ki travay avek. I annan lalis dimoun ki annan konpetans, ki

FLAVIEN

bezwen kapab ganny akse avek sa bann prodwi. Ki sipoze kapab ganny akse avek sa bann prodwi.

Me sa bann ki napa konpetans i pa kapab vin aste ouswa fer okenn aktivite avek. Par egzant bann *pest control operators*. Son bann dimoun ki fer sa bann aktivite i bezwen annan son sertifika konpetans.

E apre osi nou annan lalis *registered farmers*. Alor en dimoun i pa pou kapab zis vini aste nenport ki kalite prodwi danzere e nou pa konnen lekel li. Nou bezwen kapab konnen lekel li.

E dan ka *pest control operators* nou bezwen konnen si son bann dimoun i annan sa konpetans. E fermeye osi i bezwen annan dimoun ki annan konpetans pou aplik sa bann prodwi.

Me si nou retourne en pe an aryer osi, sa bann prodwi i pa zis ganny enporte koumsa. Ou pa kapab zis vini enport li dan pei. I lo en lalis restrikte. Alor i pou pas dan en prosedir aprouvasyon li. I pa pou zis ganny-

Parey nenport ki marsandiz ki ou fer vini dan pei, i annan en sistem kot letan i al kot SRC ek *import laba*, zot pou demann bann lotorite pou

sertifye konmkwa sa dimoun i annan sa konpetans, i annan sa kapasite, i annan sa permision pour li kapab enporte e fer komers ek egzers kontrol lo sa prodwi.

Alor i pa - mwan mon pe dir tou dimoun i kapab enportan akoz nou pa kapab anpes en dimoun enporte si i satisfer sa bann kondisyon. Me selman, i pou bezwen pas dan en sistem kontrol pour li kapab anmenn dan pei. Mersi.

MR SPEAKER

Mersi. Onorab William, ou kestyon.

HON WAVEN WILLIAM

Mersi Mr Speaker. Bonzour Minis avek ou lekip. Minis, par lefe ki ou'n dir ki bann fermeye zot annan bann gid ki gid zot pou kapab servi sa bann kemikal ek langre. An menm tan zot ganny *training*.

Mon anvi demann avek ou si apard ki bann dimoun zot ganny sa bann *training* e ganny bann gid, me lo kote lasante konsonmater, eski i annan bann *random test* ki ganny fer lo bann legitim a en serten moman, pour zot vwar si vreman nivo kemikal dan sa bann prodwi napa?

E dezyenmman; par lefe ki zot pe ankouraz osi bann *backyard farmers*, eski sa bann *backyard farmers* osi zot pe ganny enkli dan sa bann *training?* Mersi.

MR SPEAKER

Mersi. Minis?

MINISTER JOUBERT

Mersi Mr Speaker. Mersi Onorab, pour sa de pwen tre enportan. Onorab, kot i konsern bann *residue* dan manze, i annan travay ki pe ganny fer avek Minister Lasante. E *Public Health* pe agrandi son kapasite pour li teste plis bann rezidi dan manze.

Akoz i enportan pou ki nou fer sa parey ou pe dir, *randomly* lo marse, pour nou vwar si vreman bann ki pe aplike pe swiv bann konsey lo lakantite letan ki bezwen garde avan ki kapab eksposz en konsonmater avek sa bann prodwi ki'n ganny trete.

Lot keksoz se bann *backyard farmers* ek bann dimoun ki vin rod prodwi lo *store*. Laplipar ditan nou pe pouz zot ver bann prodwi ki mwen toksik e bann prodwi bio.

E sa i en prensip ki nou pe plizanpli adopte.

Bann dimoun ki nou konnen zot nivo konpetans ouswa lafason ki zot pou servi sa bann prodwi i kapab, si zot mal servi, poz en risk. Nou donn zot bann prodwi ki nou konnen i mwen danzere si petet zot fer en fot avek.

E laplipar bann prodwi ki pli danzere ouswa ki pli kapab poz en danze. Sa i ganny vann avek bann profesyonnel, bann fermye ki *registered*. Bann dimoun ki annan konpetans pou aplik sa bann prodwi. Mersi.

MR SPEAKER

Mersi. Onorab Pillay, kestyon?

HON SEBASTIEN PILLAY

Mersi Mr Speaker. Mr Speaker, mon ti a kontan demann Minis; apre ki sa bann kemikal in ariv dan pei, zot in ganny servi e zot *shelf life* in fini, ki mannyer zot ganny *disposed of*, vi ki ou pe - lenpresyon ki ou pe donn nou ki i annan ki ekstrememan danzere?

So, ki mannyer zot ganny *disposed of?* Lekel ki ansarz son *disposal* e lekel ki *monitor* son *disposal* pou asire ki okenn dimoun pa reganny akse avek

sa bann kemikal pou al fer en lezot keksoz avek? Mersi.

MR SPEAKER

Mersi Onorab. Minis?

MINISTER
JOUBERT

Mersi Mr Speaker. Mersi *Leader Lopozisyon* pour ou kestyon. Mr Speaker, kot i konsern prodwi ki'n ganny antre dan pei e son *disposal*, aktyelman la, Departman Lagrikiltir i pe – in fer en resansman. E i annan en *container* ki'n fini stok sa bann prodwi pou fer *disposal* atraver en proze avek FAO.

Akoz, bokou sa bann prodwi nou pa kapab *dispose* li lokalman. Nou bezwen anvoy li dan en facilite kot i kapab ganny ensinere a en o tanperatir pour li kapab ganny disposed dan en fason korek.

Me selman anba *Pesticide Act* pour bann lilitizasyon toulezour, i annan bann prosedir ki bann itilizater i servi, pour zot *maximise* lakantite prodwi ki zot tire dan sa bann *containers*, par egzanp *triple rinsing* eksetera, ki ou bezwen kapab fer.

I annan bann prosedir de kontaminasyon pour serten prodwi ki rann li non-toksik en fwa ki sa prosedir in fini fer. E

ki sa bann *containers*, sa bann bwat, boutey eksetera, i pa poz en risk pour dimoun ki pou kapab ganny ekspoze avek plitar. E sa i ganny *disposed* lokalman.

Me bann akimilasyon stok ek bann – par egzanp dan bann *store* bann differan fermye. Dan bann *store* departman. Dan bann landrwa ki fer *pest control* ki annan bann stok ki'n reste, sa i ganny retournen e nou fer en *disposal* aletranze atraver en proze.

Akoz nou bezwen met tou ansanm pour nou kapab eksporte. I pa kapab ganny anmennen par pti morso. E i bezwen annan bann permisyon spesyal ki swiv, pour nou kapab ganny Lakor avek sa pei ki pe resevwar, avan ki nou fer ale sa bann prodwi.

Me aktyelman la i annan en resansman ki nou pe fer, pour nou anmas tou bann stok *expired* pour nou kapab fer al dan en facilite aletranze. Mersi.

MR SPEAKER

En klarifikasyon, Onorab?

HON SEBASTIEN PILLAY

Wi Mr Speaker. Zisteman, sa ki ou'n mansyonnen se pour sa rezon mon'n demann sa kestyon - *how long* – kantite

letan sa pou pran ankor avan sa i materyalize? I pe pran en pe letan la. Kantite letan sa pou pran pou sa materyalize?

Akoz akimilasyon sa bann kemikal – ankor enn fwa, dan en *container*, pou osi kapab poz en lot problemm si i pe reste tro bokou letan. Mersi.

MR SPEAKER

Mersi. Minis?

MINISTER

JOUBERT

Mersi Mr Speaker. Konbyen letan i pou pran pour nou kapab fer ale sa bann prodwi? I pou tou depan lo – aktyelman nou'n fer en proze an 2023 kot ti annan en resansman, e bann prodwi in ganny anmennen ansanm. E *store* lagrikiltir li in fer son kontrol lo son *store*. In met tou keksoz dan en *container*.

Nou pa pou kapab annan en dat egzakt kan nou pou fer ale sa *container*. Akoz nou bezwen ganny en lagreman ek en pei. Nou bezwen ganny lagreman ek en fasilité. E nou bezwen ganny en lagreman ek en pei. E aktyelman pou fer sa bann prosedir i pran en ta letan.

E an menm tan, FAO osi ki pe vin avek finansman pour

nou fer sa proze. I anba nou *Country Support Program*. E alor, mon pe prezimen an 2025. Me selman, mon pa pou kapab donn ou en dat egzakt kan sa *container* pou kit pei pou ale pou al ganny *disposed* en lot landrwa. Mersi.

MR SPEAKER

Mersi. Onorab Loizeau, ou kestyon.

HON NORBERT LOIZEAU

Mersi Mr Speaker. Bonzour Minis. Minis, mon pe ekout bann – ler mon get kestyon e ler mon pe ekout bann larepons osi e lezot kestyon ki pe ganny demande. Mon per. Akoz ki mon per?

Kestyon i relye lo langre avek bann kemikal. Mon per akoz mon anvi demann ou Minis; eski – vi ki nou annan tou sa bann kemikal ki pe antre, eski i vedir ki nou later Sesel in telman polye, pa fertil ki nou bezwen anmenn tou sa bann kemikal? Ouswa i zis pou ed bann fermye pour zot kapab fer zot prodiksyon pli vit?

Akoz mon per. Ou dir ki lo kote *backyard farming*, zot pe dir ek mwan al *organic*. Selman lo kote laba kemikal, pestisid pe antre. Selman mwan lo kote *backyard*, al *organic*. Mon en pti

pe per. Mon anvi konnen si nou later in telman polye partou lo Mahe ki nou bezwen anmenn tousala? Mersi.

MR SPEAKER

Mersi. Minis?

MINISTER

JOUBERT

Mersi Mr Speaker. Mr Speaker, premye keksoz mon krwar – e akote mwan mon annan Mr Govinden ki konn en bon pe dan later.

Sa ki kler se ki later Sesel son nivo fertilité i vreman ba. E sa tou dimoun ki'n dan lagrikiltir i konnen. E i bezwen en kantite pou kapab fer li vin fertil, pou kapab prodwi lo en nivo kot ou kapab ganny en – tir en profi.

Alor toulstan ou pou bezwen azout bann konponan pou ed sa later pour li vreman kapab ed ou prodwi lo sa nivo. Me selman, mon pa pou kapab dir pou dir nou later i telman polye. Nou later i fay. Nou bezwen met langre ladan pour li kapab prodwi byen.

Byensir i annan bann mezir pou kapab redwir sa bann litilizasyon sa bann pestisid an servan bann diferan metod. E amelyorasyon later.

Proteksyon nou later kont lapli, eksétera, eksétera.

Me i osi kot i konsern bann kemikal parey bann pestisid, mon krwar sa mo kemikal osi i fer bokou dimoun per. Me pestisid i bann prodwi ki serten i derive sorti dan bann prodwi naturel. Me selman i annan en lenpak negativ lo bann zensek ek bann *pest*.

Alor, i bezwen ganny servi dan plizyer ka. E letan sityasyon i tel ki en dimoun pe perdi tou son bann prodiksyon, i pou bezwen aplik pestisid dan serten fason. Me selman fodre pa ki i ganny abize e fodre i ganny fer dapre dozaz ki in rekomande.

E se sa ki nou travay ek bann fermye bokou pou fer sir ki zot fer. Pa bezwen ekspoz zot lekor ann ekse. E pa bezwen servi ann ekse bann prodwi pestisid. Ouswa dan en lot ka, erbisid osi, pour ki nou pa pe kontamin nou later.

E mon krwar i en konsern ki nou tou nou partaze e nou tou nou bezwen fer sir ki keksoz i ganny fer byen.

Me ozordi nou vvar ki i annan en bon pe fermye pe fer sa byen. Zot pe travay byen avek bann prodwi. Sirtou prenan kont ki sa bann prodwi i pa pou naryen. I kout larzan.

Pli ou servi, pli ou bezwen depanse. Alor bokou dimoun zot fer li osi pou rezon finansyel. Ou pa abiz kemikal akoz i kout ou ser pou abize.

Alor nou pa vvar li pe vin en tro gro problem. Me selman i annan serten ka ki nou bezwen entervenir byensir pou kapab konsey sa bann dimoun pour zot fer li byen. Mersi.

MR SPEAKER

Ou ti bezwen en klarifikasyon Onorab Loizeau?

HON NORBERT LOIZEAU

Wi Mr Speaker. I annan en keksoz mon ti'n oubliye demann Minis. Minis, vi ki - mon konpran sa leksplikasyon. La mon'n kler lo la.

Lo kote mous dimyel. Sa bann dimoun ki pe fer prodiksyon mous dimyel, vi ki bann pestisid osi i afekte bann mous dimyel. Eski zot pe vvar en pe ki mannyer pou kontrole pou ki bann prodikter mous dimyel ki fer dimyel zot pa ava ganny afekte avek sa? Mersi.

MR SPEAKER

Ok. Ou'n al lo en lot kestyon la. I pa en klarifikasyon. Minis, si ou kapab donn en repons bref silvouple. Mon annan lot kestyon pe espere.

MINISTER

JOUBERT

Ok. Mr Speaker, i annan en prodwi ki ti ganny demande pou ganny enporte Sesel dan detrwa lannen pase ki in ganny rikorde koman enn ki'n annan lenpak lo mous dimyel. E mon rapel byen mon ti lo *Pesticide Board*. E ziska konmela nou'n demande pour li pa ganny enporte. Akoz dan par egzanp dan Linyon Eropeen, i pa'n ganny aprouve akoz son lenpak lo mous dimyel. E nou Sesel nou'n dir nou pa pou kapab les enporte, akoz son risk ki i annan pour mous dimyel.

Alor pour nou, en premye keksoz se evite ki bann prodwi ki nou konnen i kapab annan en lenpak sever lo mous dimyel, i pa ganny enporte.

Lot keksoz se; i annan lafason ki bann dimoun i aplik bann prodwi e zistans ki bann loperasyon mous dimyel i ganny fer avek bann landrwa kot pestisid pe ganny aplike.

E sa nou travay bokou avek bann dimoun ki pe fer lagrikiltir, pour nou fer sir ki zot pa pe annan sa lenpak dan bann landrwa kot mous dimyel i ganny aplike. Kot i ganny eleve.

Me selman nou konnen dan serten ka i annan serten

FLAVIEN

aplikasyon ki koz problem. Par egzanp la konmela nou pe *spray* pour sa bann zensek ki al lo pye frisiter. Dan lepase nou'n *spray* pour senir plim, moustik eksetera.

Sa i en bann sityasyon kot ou bezwen *broadcast* pestisid. E sa i kree plis problem pour bann lespes parey mous dimyel. Nou bezwen toultan evite ki nou ariv sa zistans. Mersi.

MR SPEAKER

Mersi Minis. Onorab Henrie, ou kestyon.

HON GERVAIS HENRIE

Mersi Mr Speaker. Bonzour tou dimoun. Minis in fek fer referans avek kalifikasyon Mr Govinden. Zisteman mon kestyon mon ti pe al demande se;

Eski dan Sesel ozordi nou annan sifizaman bann *expert* ki dil avek bann kestyon later, bann kestyon langre ki kestyon i lo la – kemikal e tou sa, pou asire ki bann fermye i kapab ganny bann konesans e lekspertiz ki zot bezwen? Mersi.

MR SPEAKER

Mersi. Minis?

MINISTER JOUBERT

FLAVIEN

Mersi Speaker. Mon krwar sa en kestyon tre enteresan se lo sa kestyon formasyon ek relev dan lagrikiltir.

Ki nou, nou pe travay en pe for avek Lekol Lagrikiltir e osi bann Liniversite ki nou an kontak avek. Parey sa enn ki'n vini semenn pase, pour nou fer sir nou annan formasyon pour bann dimoun ki kapab vin eksper, ki kapab ed nou demen.

Aktyelman la nou napa bokou e nou napa ase dimoun ki annan sa bann konesans, sa bann ekspertiz. Ouswa bann ki deza annan bann konesans, zot pa la dan sistenm pou ede avek sa travay.

E nou, nou ti a voudre ki i annan plis bann zenn ki vin avek sa lentere e ganny ankouraze pou pran sa bann size. E menm nou prioritiz dan nou *scholarship* bann marmay ki entere se pou fer sa bann travay.

Akoz parfwa, lafason ki nou gid zot – petet nou pa anmenn zot dan sa direksyon. Menm si zot ti a kontan fer li. Nou pa pe anmenn zot direkteman ladan pour zot devlop zot konpetans.

Alor pour nou i enportan. E mon krwar Onorab ou'n lev en pwen ase enportan. Se nou bezwen form dimoun e nou

bezwen fer sir ki i annan plis bann eksper.

Aktyelman Mr Govinden akote mwan, ti annan en staf avek li, me sa *staff* in sorti in al *training*, ki i fer ki in perdi en lanmen drwat e war li i bezwen retourn en lepa deryer, esper sa dimoun retournen. E i pran en ta letan.

E parfwa i koz problem letan nou pe sey donn en servis bann kliyan pou zot vreman kapab konpran zot sityasyon e amelyor zot performans dan lagrikiltir. Mersi.

MR SPEAKER

Mersi Minis. Bon, nou'n terminen avek sa kestyon. Nou pou pas lo en lot kestyon. Me pour sa nou bezwen en sanzman delegasyon.

Alor mon a dir mersi Mr Keven Nancy e Mr Govinden pour zot partisipasyon e mon swet zot bonn kontinyasyon. Nou ava apel lot delegasyon silvouple.

Bonzour e byenveni Mr Denis Matatiken Sekreter Prensipal pour Lanvironnman. Dr Frauke Fleischer-Dogley *CEO Seychelles Islands Foundation*. Mrs Nanette Laure Direkter Zeneral *Wildlife, Enforcement and Permit*.

Nou pe pran kestyon 208 ki dan non Onorab Churchill Gill. E son kestyon pou ganny poze par Onorab Loze. Onorab, kestyon?

HON JOHAN LOZE

Mersi Mr Speaker. Mr Speaker, kestyon 208 dan non Onorab Churchill Gill i lir koumsa;

Eski Minis i kapab enform sa Lasamble ki plan lonterm *Seychelles Island Foundation* konsernan Proze Redvelopman Rezerv Fon Ferdinand ek tou son lenfastriktir neseser, anvi ki sa aktivite pou anmenn bokou rannman an term, lanplwa - e bokou plis aktivite ekonomik pou Praslin e Sesel an zeneral? Mersi.

MR SPEAKER

Mersi. Minis, repons.

MINISTER

JOUBERT

Mersi Mr Speaker. Mersi Onorab pour ou kestyon – pour sa kestyon sorti kot Onorab Gill.

Mr Speaker, si mon memwar i servi mon korek, mon krwar nou'n deza asize avek Onorab Gill pou adres sa bann pwen ansanm avek *CEO SIF* e ansanm avek Onorab Porice dan lepase. Me mon a repas lo

FLAVIEN

bann pwen konsernan *SIF* ek Fon Ferdinand.

Mr Speaker, Gouvernman ti pran en desizyon pou met Fon Ferdinand anba responsabilite Fondasyon Zil Sesel, *SIF* le 1er Septanm, 2020 avek bi pou elev standar e ogmant lakantite viziter dan sa landrwa.

Depi sa letan, *SIF* in fer serten travay lo sa sit e viziter – lakantite viziter in ogmante. Lannen pase ti annan en logmantasyon 46poursan dan lakantite viziter konpare avek lannen 2000.

Depi Zanvye ziska Out sa lannen, Fon Ferdinand in resevwar omwen 11 mil 490 viziter. E sa i enkli etranze osi byen ki bann rezidan. Fodre osi note ki viziter Fon Ferdinand ozordi i nepli bezwen en gid pou vizit sa rezerv.

Mr Speaker, depi ki *SIF* in pran zesyon sa sit, en kantite resours in ganny mobilize pou kapab pli byen zer sa sit. Nou a rapel ki Fon Ferdinand i en fwa edmi pli gran ki *Vallée de Mai* avek en siperfisi 50.7 ektar.

Alor i pli difisil pou kontrol bann keksoz parey bann vol kokodmer. Pou anpes lentrodiksyon bann lespes anvaisan. E osi, pou mentenir mezir pou konbat dife lafore.

SIF in met resours pou adres sa bann defi.

E osi i annan an plas en lekip resers ki pe travay lo biodiversite Fon Ferdinand. Depi 2020, 2 *survey* in ganny fer pou evalye leta popilasyon kokodmer e met bann mezir neseser pou asire ki zot ganny rezenere.

SIF i annan plan lonterm pou devlop Rezerv Fon Ferdinand dan le fitir, pour li vin en sit ki pli byen kapab resevwar kliyan e kree loportinite pour diferan akter ekonomik lo Praslin.

Devlopman pou ganny fer an partenarya avek lakominote Pralinwa. Plan redvelopman i enkli anbelir e agrandi bann lenfrastriktir. Enplimant nouvo servis neseser tel parey *Centre D'accueil* e en Vilaz Artizanal dan stil *Domaine de Val des Pres* ki egziste lo Mahe. En tel devlopman i pou ed dimoun dan lakominote pou ganny en reveni e benefisyé avek sa sit.

Bann vizit familyarizasyon pe deza ganny organize an kolaborasyon avek bann diferan partener dan Lendistri Tourizm, koman en fason pou atrakte e ogmant lakantite viziter. E osi bann biznes lokal ki dan le fitir i deside pou etablir zot dan sa landrwa.

Pou asire ki sa bann tel plan i ganny materyalize, bann prosedir legal ek administratif konsernan transfer Rezerv Fon Ferdinand anba responsabilite *SIF* i bezwen ganny finalize, vi ki napa okenn dokiman legal ki formaliz sa transfer.

SIF pou osi bezwen travay tre pros ek Gouvernman pou *survey* sa sit. Prosedir i osi bezwen ganny fer pou asire ki *SIF* i ganny en *Lease Agreement*. Sa i a permet *SIF* envestir dan sa propriete e komans devlop bann lenfrastriktir.

An 2025, i pou fer 130 an depi ki Fon Ferdinand in ganny aste par Gouvernman Kolonyal avek bi pou asir proteksyon kokodmer e son labita.

Pou komemor sa levennman istorik, en seri aktivite pe ganny prepare pou selebre son lakonplisman e pou montre lakominote bann diferan potansyel ki sa landrwa i annan pou ofer.

Nou ekspekte ki avek letan, Rezerv Fon Ferdinand pou kapab ofer en dezyenm latraksyon naturel lo Praslin pour rezidan e touris. Enn ki diferan avek *Vallée de Mai*. Me enn ki osi enportan pour Praslin, me osi pour Sesel. Mersi Mr Speaker.

MR SPEAKER

Mersi Minis. Siplementer Onorab Loze.

HON JOHAN LOZE

Mersi Mr Speaker. Minis, Onorab Gill i dir mwan remersi ou pou lapenn ou'n servi loportinite son kestyon pou pas *maximum* lenformasyon avek piblik a lekout. En keksoz ki ou pa ti ganny sans fer dan miting avek li ek Onorab Porice.

I annan li 3 kestyon siplementer. Premye; Kwa ki'n fer sa travay arpanter pa'n kapab konplete?

Son dezyenm siplementer i; dan konbyen letan ki sa travay arpanter i ekspekte konplete?

E son trwazyenm siplementer i; kan sa Proze Fon Ferdinand i ekspekte demare? Mersi Mr Speaker.

MR SPEAKER

Mersi. Nou a gard bann siplementer lo 2 silvouple. Selman mon realize ou 2 premye i lye – i preski menm size. Minis, repons.

MINISTER **JOUBERT**

Mersi Mr Speaker. Mr Speaker, CEO *SIF* i la avek nou. Avek ou permisyon, mon ti pou pas

FLAVIEN

laparol - mon pou demande pou pas laparol avek li pour li reponn sa 2 - 2 oubyen 3 kestyon lo; kwa ki pe koz retar dan *survey* e kan i pou konplete? E osi kan ki proze devlopman pou arive Fon Ferdinan? Mersi.

MR SPEAKER

Mersi. *Doctor*, ou annan laparol.

CEO SIF DR FRAUKE FLEISCHER-DOGLEY

Bonzour Mr Speaker. Bonzour Onorab. Bonzour tou bann dimoun an ekout. Espesyalman bann dimoun Pralinwa.

Mon ti a kontan remersi Lasanble pour sa loportinite pou koz ozordi Fon Ferdinan dan Lasanble. E konsernan kestyon ki'n ganny demande lo *survey*.

Sa ki nou kapab dir, nou an kontak tre pre avek Minister ki responsab pour *survey*. E nou'n met devan nou konsern, akoz sa retar ki'n arive la. Me selman nou bezwen antre dan en programm travay Minister e sa sityasyon an se moman.

Nou osi nou'n diskit avek zot petet a sa moman i posib pou fer en *conventional list* pou fasilit bann envestisman ki nou ti a kontan fer pou konmans pli boner. E sa in ganny diskite

avek Minister ki i pa neseserman ki tou bann *survey* in ganny fini avan nou kapab konmanse. E sa sityasyon a sa moman. Mersi.

MR SPEAKER

Mersi. Onorab Woodcock, ou kestyon?

HON WAVEL WOODCOCK

Mersi Mr Speaker. Mr Speaker sa size redvelopman Fon Ferdinan i pa en keksoz nouvo. I en keksoz ki i an diskisyon pour bokou lannen. E menm avan ki Fon Ferdinan ti ganny transfer avek *SIF*, ti annan bann *marketing plan, master plan, business plan for years* ki pa'n zanmen materyalize.

Me mon bezwen dir. Ler Fon Ferdinan ti ganny transfer anba *SIF*, ti annan en pe rezervasyon lo konmansman. Mon konnen ki *SIF* son *major* bis se plizoumwen lo kote konservasyon, prezervasyon lanvironnman; bann diferan lespes; bann plant andemik.

Me sa ki zabitant Praslin pe demande, ki valer azoute ki zot pou gannyen? In annan diskisyon miting. Mon'n annan menm avek Dr Dogley, osi avek Minis, nou'n diskit lo sa size.

Mon kestyon is; ki zistans zot in arive avek en plan, or en

master plan ouswa en proze? Eski in ganny – zot in fini devlop en proze pour sa Fon? Sirtou kot i konsern bann aktivite en pe pli komersyal. Bann aktivite ki lakominote i kapab angaze.

Akoz i annan teren ek plas ki nou kapab fer bann aktivite, ouswa donn loportinite bann zabitan Praslin menm pou vini, met an plas bann keksoz. Fasilité. Me selman *obviously* nou bezwen pran kont sa laspe konservasyon. *Cafeteria* e bann lezot lenfrastruktir pou ede devlop sa Fon. Mersi.

MR SPEAKER

Mersi pour kestyon. Minis?

MINISTER JOUBERT

Mersi Mr Speaker. Avek ou permisyon, mon a envit *CEO SIF* pou reponn sa de pwen. Mersi.

MR SPEAKER

Tre byen.

CEO SIF DR FRAUKE FLEISCHER-DOGLEY

Mersi ankor pour sa kestyon. Sa ki mon kapab konfirmen ki nou'n deza fer bann travay e nou'n antre dan en rankont. Nou ti annan plizyer rankont avek bann dimoun ki nou

demann zot ki zot bann ekspektasyon. Ki bann kalite lenfrastruktir zot ti a kontan war?

Nou'n deza fer en *survey* avek bann dimoun lo Praslin an zeneral. E nou'n napa en plan ki'n ganny desinen lo en papye. Selman nou annan bann keksoz ki nou war li neseser pou fer sa diferans e pou kapab envit bann lezot dimoun ganny en sans pou travay Fon Ferdinand.

So, pour lemoman nou'n angaz nou. Me selman parey, mon krwar zot konn pli byen ki mon ankor. Louvraz lakominote i pe pran son letan pou kapab vreman enterakte byen e ganny tou sa bann lenformasyon ki neseser pou met en plan lo papye.

E mon osi tou mon kapab konfirmen ki zis 2 mwan pase, nou'n form en departman dan *SIF* ki annefe pe get egzakteman sa *tourism* avek komers.

E depi sa mwan – depi le 1er Septanm nou annan en *Deputy CEO*, ki osi tou sa i tonm anba son responsabilite. E li i pou pran sa akoz petet parey zot in remake, nou *focus* vre i konservasyon. E nou konnen nou bezwen annan en lot lekspertiz. E nou'n travay lo la.

Mon ti a kontan dir osi tou, depi tou sa bann letan ki nou pran ansarz kot Fon Ferdinand, nou'n envestir R4 milyon depi nou'n konmans travay la. E a sa moman pour sa bann 4 milyon, in kout nou preski 3 milyon pou gard sa rezerv an operasyon toulezour.

So, mon ti a kontan zis met devan ki *SIF* i konsyan e konsyan sa responsabilite ki Gouvernman in donn *SIF* pou fer sa louvraz ki neseser. Mersi.

MR SPEAKER

Mersi CEO. Onorab Pillay, ou kestyon?

HON SEBASTIEN PILLAY

Mersi Mr Speaker. Prenan kont bann kestyon ki pe souleve lo *whether or not* Fon Ferdinand i sipoze pe kontribye pli direk dan lekonomi lavi Praslin;

Eski Gouvernman pou respekte desizyon ki *SIF* e kominate Praslin i pran an relasyon ek devlopman sa proze - kontrerman avek par egzanp sa ki nou'n war Asonpsyon ler *SIF* in demande lekel ki'n aste ...?

MR SPEAKER

Mersi pour ou kestyon. Si sanmenm tou, Minis, ou a

reponn son kestyon lo *SIF* Fon Ferdinand.

MINISTER

JOUBERT

Mersi Mr Speaker. Mr Speaker, Gouvernman i bezwen respe desizyon *SIF* akoz Gouvernman in donn *SIF* en manda pour li *manage* sa sit.

Zis parey son desizyon lo lezot sit ki i pe *manage*. *Vallée de Mai* ek Aldabra. Gouvernman i bezwen respekte son desizyon lo sa sit ki in ganny manda pour li *manage*. Alor, Fon Ferdinand osi i parey.

E si *SIF* in fer son bann diskisyon deliberasyon avek bann dimoun lo Praslin e i vwar ki i neseser al dan tel ou tel direksyon, pou fer sir ki langazman i ganny mentenir e benefis i al dan kominate Praslin.

Mon krwar i dan lentere Gouvernman pour li kontinyen siport sa bann desizyon ki *SIF* i fer - i pran dan sa laliny. Mersi.

MR SPEAKER

Mersi Minis. Bon, nou a termin la pour sa kestyon. Nou a pran en poz e Lasanble a repran 11 er 10. Mersi.

(BREAK)

MR SPEAKER

Byen, nou annan menm zofisyé, Mr Denis Matatiken PS Lanvironnman e Mrs Nanette Laure Direkter Zeneral *Wildlife pour Enforcement and Permit*. E avek zot nou pou kontinyen avek kestyon 209. E nou annan 209 ek 211 ki nou pou pran avek zot ansanm. 209 dan non Onorab Egbert Aglae.

HON EGBERT AGLAE

Mersi Mr Speaker. Mon a dir bonzour Minis, PS ek DG. Kestyon i lir konm swivan;

Eski Minis ki responsab pour Lanvironnman i kapab dir ek sa Lasamble e piblik an zeneral detay lo sa bann mouvman ouswa proze dan lanmar *Cap Ternay*? Mersi.

MR SPEAKER

Mersi Onorab. Minis, repons.

MINISTER JOUBERT

Mersi Mr Speaker. Mersi Onorab pour ou kestyon. Wi, Mr Speaker, i annan serten travay restorasyon ki pe arive dan lanmar Cap Ternay.

Sa i atraver en proze ki pe ganny antreprann par Minister Lanvironnman an kolaborasyon avek Lotorite Park ek Zarden (SPGA). I pe ganny finanse par

Fon Global pour Lanvironnman (GF) anba en proze ki apel *Ridge to Reef*.

Anba sa proze, 30 ektar in ganny idantifye pou fer travay restorasyon. Travay pou ganny fer dan lanmar. Ensi ki dan lafore ki trouve lo lakot. 15.5 ektar pou ganny antreprann Anse Souillac, Baie Ternay e osi lo glacis Cap Matoopa.

Premye faz sa proze ki ti enkli en letid detaye pou rekomann bann aksyon pou amelyor kalite e sirkilasyon delo dan sa lanmar ti ganny fer komansman Zanyve 2023. E sa ti terminen an Zen 2023.

En konsiltan ti'n ganny swazir swivan en *tender* ki ti fer an Novanm 2022. Sa bann rekomandasyon ti ganny evalye par bann partener. E met devan pour dezyenm faz proze pou amelyor sirkilasyon delo.

Avan ki travay ti ganny antreprann, Minister ti konsilte ek bann lotorite konsernen pou asire ki sa bann travay pa ti pou ganny fer lo later prive.

Mr Speaker, dezyenm faz sa proze i enkli netway 6 mil met kare lanmar pou retir serten lespes, tel parey fouzer lanmar, korsol maron. Ensi ki prin de frans. Me sa pa enkli mangliye.

Travay i osi enkli debousman en *channel* pour 160 met an servan en gro masin. Sa i enportan, anvi ki sa kontrakter ti bezwen *reprofile* sa lanmar pour en *slope* 30 degré pou elarzi sa *channel* par 2 met. E osi fouy li 2 met fonder.

Later, labou ek bann materyo *organic* ki ti ganny retire in ganny mete pli lwen pou asire ki *channel* pa bous ankor. Travay ti konmans an Mars e terminen an Zen, 2024.

Anvi ki dezyenm faz proze in terminen, trwazyenm faz pe al komanse byento. I annan travay reabilitasyon lo lanmar o osi dan lafore. Lo lakot sa bann travay pou ganny fer dan lanmar Anse Souillac osi ki glacis Cap Matoopa parey mon'n dir pli boner.

Travay se prensipalman pou retir bann plant anvaisan ki'n ganny trouve, e ranplas zot par bann lespes andemik ek endizenn.

Pou fer sa travay, Proze *Ridge to Reef* pe ganny lasistans Servis Prizon pou fer sa bann travay restorasyon. 4 mil 500 lespes natif. E osi 500 plan mangliye blan e rouz pou ganny servi dan sa restorasyon.

Sa bann plan pou ganny fourni par bann *nursery* lo Mahe, Anse Royale e Anse

Boileau Secondary School. Baie Lazare Watershed Committee. Mont Plaisir Eco School, Unisey Nursery. E sa louvraz i sipoze konplete par komansman lannen prosen. Mersi Mr Speaker.

MR SPEAKER

Mersi Minis. Onorab Aglae, siplemanter?

HON EGBERT AGLAE

Mersi Minis pour ou larepons ase detaye. Minis, dan lepase nou'n annan bann diferan proze konservasyon dan sa bann menm laliny parey pou asir soustenabilite sa bann landrwa.

Eski sa ki ou pe dir mwan la - anvi ki distrik li menm nou pa ti tro okouran poudir pou annan en proze lo sa magnitud ki pou annan en kontinite.

Eski zot kapab fer sa - petet sa neseser pour ki ou osi - distrik ek lakominote, akoz lakominote ki *flag up* ler zot war serten mouvman, i kapab ganny bann lenformasyon pout zot *be at par* konnen ki pe arive dan sa bann landrwa? Sa i enn. Sirtou a lavenir pour dezyenm faz.

E dezyenmman Minis, eski dan sa landrwa, Minister Lanvironnman ansanm ek mon

kapab dir, Gouvernman an zeneral, in tonm dakor lo son lavenir li menm sa landrwa, vi ki i en sit vreman enportan avek son ekolozi?

Eski zot annan en plan, anvi ki i annan bann mansyon bann lezot devlopman ki pou swiv a lavenir pour bann rezon ekonomik? Mersi.

MR SPEAKER

Mersi Onorab. Minis?

MINISTER

FLAVIEN

JOUBERT

Mersi Mr Speaker. Mon krwar mon kapab pran laparol. Onorab in demann 2 kestyon konsernan partisipasyon bann zabitan ek distrik. E osi lo lavenir sa landrwa.

Mr Speaker, kot i konsern partisipasyon, Gouvernman Lokal i form parti sa komite ki pe siperviz sa travay e ki pe planifye sa bann travay Cap Ternay.

Alor distrik i merit okouran bann detay e bann staz ki proze i ladan. E osi ou annan bann diferan group. Parey i annan sa group ki apel *Locally Empowered Area Protection* ki pe travay avek *Nature Seychelles* dan rezyon Port Glaud. Zot osi zot bann dimoun ki'n ganny konsilte dan

sa laliny. E alor, i annan plizyer zabitan ki merit okouran detay sa bann travay ki pe ganny fer Cap Ternay.

Me si Onorab koman Onorab Manm reprezantan pour Port Glaud ou le plis lenformasyon, PS Lanvironnman ki la o bor mwan i a kapab donn ou lenformasyon adisyonnel lo sa proze e lo kwa ki pe ganny fer Cap Ternay.

Kot i konsern lavenir sa landrwa – Cap Ternay. Ou a realize ki laplipar bann aksyon i kouver bann landrwa ki normalman menm si ou annan okenn keksoz pli tar, i pa pou ganny transformen dan en lot fason.

Par egzanp, bann lanmar. Par egzanp bann bordaz lakot ki i bezwen ganny mentenir. Par egzanp bann zone ki sansib lo lot kote ki vir avek was lo lanmer.

Alor, nou pe fer sa bann travay. Minister anba sa bann proze pe fer bann travay avek en konprenezon osi ki, sa bann modifikasyon ouswa sa bann reabilitasyon, pli tar nenport kwa ki arive, i pa pou ganny sanze dan okenn fason. E i pou kontinyen annan en lanmar ki fonksyonnen e kontinyen servison bi ekolozik dan le fitir.

Nou pa konnen ki pou arive antyerman dan Cap Ternay. Nou napa tou bann detay. Me selman nou prezimen ki i pou annan serten lentere ki pou vini apre avek bann tranzaksyon ki pe arive ozordi kot i konsern bann propriete dan sa rezyon.

Me nou, nou pe ekspekte ki sa travay ki pe ganny fer i pa pou ganny pran par sa bann keksoz ki pou arive, akoz i dan bann zone sansib ki pa sipoze ganny touse par okenn devlopman. Mersi Mr Speaker.

MR SPEAKER

Mersi Minis. Onorab Spiro, ou kestyon?

HON RACHEL SPIRO

Mersi Mr Speaker. Minis, eski letan zot in – ou'n mansyonn gro masin. Zot in pran kont frazilite ekosistèn lanmar e tou mezir adekwa in ganny pran pou prezerv bann lespes ki annan dan lanmar? Mersi.

MR SPEAKER

Mersi. Minis?

MINISTER JOUBERT

Mersi Mr Speaker. Wi, bann ki pe travay lo sa proze in pran kont lafason pozisyonnman

FLAVIEN

groser masin ki pou ganny servi. Me nou konnen poudir i annan serten travay ki demann serten kapasite an term masin.

E nou preski sir ki lafason ki'n ganny servi, ou pou annan en *disturbance* dan lanmar byensir. Me selman, i pa pou annan en *disturbance long term*. E lentansyon se pou reabilit lanmar. Alor, nou krwar ki avek letan tou bann keksoz i ava reetabrir.

E menm si sa gro masin in ganny servi pou fer sa travay dan sa letan, i pou retourn dan en fason pli normal apre ki bann amelyorasyon in ganny fer dan sa lanmar. Mersi.

MR SPEAKER

Mersi Minis. Onorab Pillay?

HON SEBASTIEN PILLAY

Mersi Mr Speaker. Anliny avek nou *Standing Order*, mon ti a kontan *press* Minis pou donn nou larepons lo – ou'n dir pou dir pou annan bann prosen devlopman. Me ki paret poudir ou annan serten detay, ou annan serten lenformasyon ki ou pa pe *share* avek Lasable.

So eski nou kapab demann ou pou *share* sa bann lenformasyon lo ki sa bann kalite propozisyon devlopman ki pe ganny mete? Si non nou

pou krwar i pou parey Asonpsyon ki'n ganny vann ek *Qatari*. Ou konnen, nou zis tande nou pa konnen ki pe pase nou. Ou konpran? Mersi Mr Speaker.

MR SPEAKER

Mersi Onorab. Minis, eski ou annan plis detay lo devlopman ki ou kapab partaze?

MINISTER JOUBERT

Mr Speaker mon a fer – Onorab in dir mwan mon'n deklar devan Lasanble. Mon a deklar devan Lasanble ki mon napa okenn lenformasyon lo devlopman fitir Cap Ternay.

E okenn keksoz ki pou ganny fer i ava ganny fer *by* Minister ki responsab Later ek *Planning*. Me mwan mon napa okenn lenformasyon adisyonnell. Mersi.

MR SPEAKER

Mersi. Ki pwen ou le fer Onorab? Ou kestyon in ganny reponn.

HON SEBASTIEN PILLAY

Mon konnen ou ledwa i lo sa masin, so mon pou fer sir mon pa pou al ganny problemm ek ou.

Mr Speaker, Minis in dir okenn devlopman ki a ganny fer a ganny fer par Minister Later. Be mon ekspekte poudir okenn devlopman ki ganny fer dan en landrwa sansib, ki Minis Lanvironnman i bezwen okouran.

So nou pa pou kapab kontinyen annan bann Minis dan Lasanble ki annan en *portfolio* ki relye ek en keksoz ki pe al ganny fer. I dir nou i pa konnen ki pe pase. Zis parey, e mon pou repete, sa ki'n ariv-

MR SPEAKER

Mersi. Minis in fini reponn lo sa kestyon. Nou a pas lo prosen kestyon. Parey mon'n dir, nou pou pran 211 la pou fasilite zofisye ki devan nou. E 211 i dan non Onorab Waven William. Onorab, kestyon?

HON WAVEN WILLIAM

Mersi Mr Speaker. Mr Speaker, mon ti a kontan demann Minis si i kapab donn en kontrandi lo sityasyon polisyon dan pei, lefe ki sa i annan lo nou ekosistem e menas a lonterm lo plan devlopman sosyoekonomik e soustenabilite nou pei? Mersi.

MR SPEAKER

Mersi. Minis, ou repons?

MINISTER
JOUBERT

Mersi Mr Speaker. Mersi Onorab, pour ou kestyon. Mr Speaker, mon pe prezimen ki kestyon Onorab i konsern bann differan laform polisyon ki egziste dan pei. Parey polisyon delo, polisyon later e osi polisyon ler.

Mon kapab konfirmen ki wi, nou annan bann differan ka polisyon dan pei ki Minister i rikorde. Sa bann ka i relye avek bann aktivite parey nou tou nou konnen, komersyal, domestik. E bann devlopman ki pe arive partou dan pei.

Nou annan bann sif istorik lo polisyon lanmer ek larivyer. Me nou napa gran kantite lenformasyon lo polisyon dan later.

Kot i konsern bann ka polisyon ler. Mon pou dir ki bann rezulta mezir aktyel i vreman limite. Menm si dan lepase in annan plizyer deklarasyon ki'n ganny fer konsernan kalite ler dan pei. Ki'n dir par egzanp ki Sesel i annan pli bon ler dan lemonn, eksetera.

Nou, nou krwar ki nou bezwen siport tou bann deklarasyon avek bann rezulta syantifik pou asire ki nou pe donn bon lenformasyon ki

FLAVIEN

korek e permet nou koman en pei pou fer en bon konparezon avek bann lezot pei. E osi kapab fer bon desizyon konsernan polisyon.

Se pour sa rezon ki Minister in met an plas – in met dan son stratezi en Program Sirveyans Polisyon detaye. E an se moman pe enstal bann nouvo fasilite kot laboratwar Grand Anse, pou fer tes lo sa 3 form polisyon e permet nou raport lo la dan en fason regilye.

Mr Speaker, mon pou komans par sityasyon polisyon delo ki nou vvar pe arive dan pei lo bann lakot ek bann larivyer. Laplipar ditan sa bann polisyon i bann kontaminasyon par bann larivyer. I kontaminasyon bann larivyer par bann delo kontaminen ki fini dan lanmer.

Nou annan legzanz; Mamelles, *Fairview*, Val Den Dor, Grand Anse, eksetera. E polisyon i kapab ganny koze par bakteri. I kapab annan en lenpak lo lasante imen. Bokou fwa in ganny koze par malfonksyonnan sistem desarz. Ensi ki bann aktivite lagrikiltir konman elevaz zannimo ki afekte kalite delo.

Sedimentasyon i enn bann form polisyon delo ki nou pa donn sifizaman latansyon lo

la. Nou vwar ki apre gro lapli, i annan bokou sediman ki ganny anmennen lo lakot. E sa i annan en lenpak direk signifikan e advers lo bann labita lakot. Sirtou koray ek bann parti ekosistem koter.

Nou osi annan bann sibstans ki ganny zete; enkli salte, ki ganny zete dan larivyer. E nou vwar bann keksoz parey delwil, parey lapentir ki nou rikorde a plizyer repriz. Par egzant dan bann larivyer dan rezyon lavil ek Beau Vallon, ek lezot materyo ganny zete. Kot nou vwar ki sa i kontamin delo dan larivyer. Me osi i rann lapel lo lakot.

Rezulta ki nou vwar an term sa bann form polisyon se en elevasyon dan nivo bakteri. E ogmantasyon dan bann sibstans nitritif, parey bann nitrat ek fosfat ki koz en de balans dan labita. E osi bann sediman ki afekte bann lespes direkteman.

Nou vwar dan bokou ka logmantasyon lo en nivo polisyon apre ki nou'n ganny bann seri gro lapli. Me osi i annan bann larivyer ki travers bann landrwa avek for popilasyon, ki toultan annan en nivo polisyon ase eleve letan nou mezire.

Dan serten ka, nou vwar ki desizyon in ganny pran pou aret servi delo – potab. Pou aret pran delo potab dan sa bann landrwa ki'n polye, akoz sa bann sityasyon polisyon konstan. E la mon a sit 2 ka; Enn se Val Den Dor e lot se Basen Ble.

Polisyon dan ler ki Minister i rikorde - departman prensipalman i rikorde i loder, lapousyer. Me osi parfwa lafimen. Nou ganny pa mal konplent. E resaman, nou tou nou'n port latansyon lo *IOT* konman en Lendistri ki pe donn nou problem loder.

Nou ganny konplent loder *livestock* Fairview. I enn ki tanzantan i leve an term konplent. Nou ganny konplent loder kot bann dimoun pe aplik par egzant fimony dan kiltivasyon.

Nou ganny problem lafimen. E *PUC* i enn bann landrwa kot nou ganny konplent lafimen parfwa ek son bann *power station*. Me nou konnen kwa ki bann sanzman ki'n ganny fer, par egzant Baie Ste Anne. *Crematorium* i enn bann konplent ki nou gannyen lo kote lafimen ki afekte bann zabitan dan zalantour. Ensinerater kot lopital. E osi, nou ganny en

kantite ka kot bann dimoun pe bril salte dan lakominote. E sa i bann keksoz ki arive laplipar ditan dan wiken.

Nou osi ganny pa mal konplent lapousyer kot bann lakonpannyen ki prodwi materyo konstriksyon. E serten lendistri parey konpannyen siman, i koz bann problemm lapousyer. E osi nou ganny sityasyon kot bann landrwa parey garaz ek bann *workshop* ki kree bann problemm an term lapousyer. Me osi an term emisyon serten materyo dan ler.

Nou osi annan en form polisyon ki pa toultan nou port ase latansyon lo la. E sa se polisyon later ek bann sediman. I annan lefe laplipar ditan bann lefe en pe pli lonterm. Sa bann form polisyon par egzanp; i bann desarz sorti kot *landfill* ki kontamin later. I bann keksoz parey delwil. I bann metal lour par egzanp ki sorti dan bann diferan prodwi ki ganny servi dan pei ouswa dan salte.

E sa bann prodwi en bon pe fwa i reste dan lanvironnman pour en long letan e i anmenn bann problemm akimilasyon osi. Akoz nou bezwen mazinen ki sa problemm akimilasyon i kapab vin en keksoz lonterm pour nou, kot sa bann prodwi i

reste dan bann lespes parey bann ki dan lanmer. E osi i kapab ganny akimile dan bann prodwi ki imen i manze.

Dan lepase, bann tes in montre ki par egzanp Providence i annan nivo eleve serten sibstans dan sediman e dan later. E nou konnen poudir laplipar ditan sa bann kontaminasyon i asosye avek bann aktivite komersyal e endistriyel.

Eski polisyon i reprezent en menas a lonterm lo plan devlopman sosyoekonomik e soustenabilite nou pei? Mon pou dir ki i kapab arive ki si nou pa fer - ki nou pa pe kontinyelman mezire. E nou pa pe pran aksyon lo bann sours polisyon, sa i kapab arive.

Menm lo nivo ki i ete ozordi nou'n deza vwar lenpak. Par egzanp parey mon'n nonmen, bann desizyon ki *PUC* in bezwen fer pour li ferm son bann baraz. E sa se en lenpak direk polisyon lo resours ki nou annan pou servi dan pei.

Pour nou kapab zer sa bann - pardon. Dokimant dan en fason pli konpreansiv polisyon dan pei parey mon'n dir, i enn bann target stratezik Minister. Nou bezwen asir plis *compliance* lo bann sours. E sa i enkli fer ki Gouvernman osi

dan son loperasyon i swiv bann lareg.

Nou a rapel, e mon krwar bann Onorab zot konn byen dan bann distrik, ki enn bann sours polisyon ki pe vin plizanpli enportan dan pei se bann devlopman lakaz ki nou annan partou.

E sa i ganny fer prensipalman par Gouvernman. Me nou bezwen fer sir ki nou tou enkli Gouvernman, nou swiv lareg e met an plas bann facilite ki anpes polisyon dan lanvironnman.

Enn bann mezir ki nou pou war dan Bidze sa lannen, se mezir pou met an plas en *Legal Enforcement and Compliance Unit* kot nou Minister pour nou pouss sa linisyativ dokimante e pran aksyon lo kote polisyon dan pei dan en fason konpreansiv.

Pou anpeste ki polisyon pa menas fitir nou pei nou bezwen osi envestir dan bann facilite de baz parey *sewage*, tretman salte e osi tretman bann prodwi danzere dan pei.

Me osi nou bezwen met an plas bann lareg ek bann standar enplimantasyon. An plis, facilite sanitasyon e amelyorasyon dan tretman - pardon.

Enplimantasyon en pli bon facilite sanitasyon e amelyorasyon dan tretman bann desarz, i ava ede bokou dan sa sityasyon. E nou vwar ki bann proze ki deza pe met an plas i pou komans annan en lenpak.

Par egzamp lo kote *sewage network* ek sistèm tretman pour La Digue ki pou annan en - nou ekspekte annan en signifikan lenpak lo kalite delo ki annan dan plato La Digue. Nou bezwen osi dimoun ki konpran sa bann size e kapab fer desizyon apropiye.

Nou kontan vwar ki *UniSey* pe anmenn plis sa bann size formasyon dan *environmental science*. E bann partner pe vin pli enterese. Par egzamp dan formasyon resan avek nou bann staf lo lafason pou evalye leta larivyer, lasante larivyer an servan bann lespes.

I annan serten formasyon ki nou bann staf pe deza antreprann ek nou bann partener non-gouvermantal ensi ki Liniversite Sesel.

Pou fini Mr Speaker, mon ti a voudre dir ki polisyon i rezulta konsonmasyon par sitwayen e aktivite ekonomik dan pei. Me i osi enplik bann lensidan parey bann deversman ki arive. Koman en pei ki an

devlopman, nou bezwen envestir ankor dan fasilité.

Nou ekspekte ki serten form polisyon pou vin aparan dan serten parti nou pei. Lenportans se ki nou fer en bon zeson depi staz planifikasyon dan bann proze e nou evite ki nou bezwen retournen pli tar pou pran aksyon letan sityasyon in agrave. Mersi.

MR SPEAKER

Mersi. Mersi Minis. Onorab i a remarke ki in demann en kestyon vreman larz e Minis in tous lo en kantite size. So mon pou bezwen *limit* bann siplemanter. Nou'n deza pas sote 10 minit lo sa kestyon. Mon pou pran sa 4 Manm ki'n lev lanmen la, apre nou a termin lo la. Onorab William, ou siplemanter premye.

HON WAVEN WILLIAM

Mersi Mr Speaker. Minis, par lefe ki soustenabilite devlopman sosyoekonomik pou depan an gran parti lo kwa ki Gouvernman i fer. So, mon anvi demann ou an priorite. Lo tretman desarz lakaz, i annan sa Proze *Greater Victoria* ki zot in fer. Me eski zot pe mazin fer li lo baz rezyon?

Akoz si nou pa fer sa, avek devlopman ki pe arive, *the*

density of household dan bann estate, i pou kree vreman en lenpak a lonterm.

Finalman Mr Speaker, i annan sa sityasyon loder lavil. Si Minis i kapab donn nou briyevman, ki vreman aksyon konkret ouswa aktivite ki pe ganny fer par *IOT* pou vreman rezourd sa problem.

Akoz Mr Speaker, nou pe ganny apele par bann viziter dan nou pei la konman konmsi nou annan en lavil ki vreman pi en kantite. So, i pa en bon portre letan ou tann sa bann keksoz pe ganny dir. Mersi.

MR SPEAKER

Ok, mersi. Minis, ou repons?

MINISTER

JOUBERT

Ok, mersi Mr Speaker. Kot i konsern bann sistenm tretman rezyonal. Mon krwar i annan 2 keksoz Onorab. I annan premye se dil avek bann landrwa kot i annan bann konsantrasyon labitasyon. Sirtou dan bann estate ki'n ganny etablir.

Nou konnen poudir i annan aprosan en kenzenn sit ki deza annan problem. E Gouvernman pe travay avek Minister ki responsab *Housing* e ansanm avek *PUC*, pou adres sa bann landrwa an term

FLAVIEN

fonksyonnman bann sistem ki deza enstale.

Me osi an term lentrodiksyon sistem tretman dan bann ki napa. Akoz sa i enn bann pwen o dansite ki deza annan problem ki bezwen ganny dil avek imedyatman akoz nou konnen zot pe koz deversman. E ki sa bann sistem tradisyonnal ki'n ganny enstale i pa pe kapab *cope* avek sa volim ki annan.

Lot keksoz se bann *network*, bann rezo koleksyon dan en fason rezyonal ki bezwen ganny fer, ki bezwen ganny met an plas. E parey nou konnen, i annan en *master plan* ki'n deza ganny desinen. E i annan bann *zone* ki'n ganny defini kot rezo pou ganny enstale.

Nou konnen ozordi ki i annan depans deza pe ganny fer lo en *network* lo La Digue. E sa i pou al konplete byento. Me i pou en kestyion lenvestisman. I pou en kestyion finansman.

Dapre mon konprenezon ki nou bezwen fer se, annou prioritiz sak fwa enn pe al konplete. Annou prioritiz sak fwa enn pe al konplete. Annou prioritiz en lot e annou atak en rezyon dan en fason konpreansiv, pour ki nou kapab kolekte lamazorite bann

landrwa kot lakaz i o dansite. E ki fer ki nou kapab tret lamazorite nou bann problem *sewage*.

Mon konnen dan ou rezyon par egzanp ou annan en kantite zabitan dan sa *zone* an montan La Misère ziska Plaisance partou. Ou kapab *capture* sa bann landrwa. E i annan bann demars ki deza pe ganny fer pou planifye en pe ki mannyer *network* pou ganny mete dan sa rezyon.

Me nou bezwen osi rapel ki Sesel mannyer nou teren i ete i annan en difikilte kot parfwa ou bezwen fer en laliny pase pour ou al kolekte 2 oubyen 3 lakaz dan en fason tre lwen. E sa i koz en problem.

Alor i annan sa balans ki ou bezwen fer ant kou lenvestisman ek benefis ki ou pou gannyen dan le fitir. E se sa parfwa lo kote *manage* polisyon, se parfwa i annan en kestyion kou. E ou bezwen balanse lekel ki ou pare pou aksepte ouswa lekel ki ou bezwen al lo en lot metod pou kapab rezourd li.

Kot i konsern *IOT* Mr Speaker. Annefe mon annan en - mon aprann ki en Komite Lasanble in al *IOT* resaman. Mon annan en diskisyon pour mwan fer avek *IOT* an detay kot i konsern zot *Fishmeal Plant*

sirtou, pour nou kapab al dan detay kwa ki zot sipoze pe fer.

Me selman prensipalman lenformasyon ki mwan mon annan, i montre ki *IOT* i bezwen fer renouvelman lekipman. Se renouvelman ek reparasyon lekipman e reenvestisman dan bann lekipman ki pli performan.

Pour li kapab *contain* sa bann keksoz ki i pe travay avek. E osi evite ki ganny bann lensidan, kot serten prodwi i ganny deverse ouswa i mal ganny stoke, ki apre i koz problemm loder.

Problennm *IOT* i pa zis la kot Lizin. Problenm *IOT* i osi kot *landfill*. Akoz *CEO* petet i pa'n pas sa lenformasyon avek zot bomaten. Nou pa'n ganny sa lokazyon pou fer li. Enn bann problemm ki nou pe gannyen kot *landfill* se ki, nou nepli annan plas pour sa kantite *sludge* ki pe resevwar kot *IOT*.

E alor *IOT* i pou bezwen met an plas plis pli bon fason tretman lo son sit, pour li kapab evite ki bann materyo ki sorti dan son bann sistèm koleksyon e tretman delo sal pe redwir e ki i pa pe koz en problemm pli lwen.

Akoz sa osi i en pe sityasyon ki pe arive. E swa nou pou tir problemm la e nou pou

anmenn li Cascade, e nou pou kree difikilte dan en lot landrwa.

CEO in eksplik mwan. Landrwa ki dife in pran yer swar ti en landrwa ki zot in fek ouver pour zot met *sludge IOT* yer. So se sa enn bann difikilte ou gannyen.

Se ki dan pe *manage* tousala, ou annan bann louvertir ki ganny fer dan *landfill*. Ou annan en kantite *sludge* ki pe ganny *managed* dan diferan fason. E ou annan en kantite *gas* ki pe ganny *released*.

E sa i fer ki risk dife, risk ki ou ganny en problemm i vin pli grav. E la preznan ou war ou avek en sityasyon – en dezyenm sityasyon ki ou bezwen dil avek.

Alor, mwan mon kapab donn komite ki *Food Security and Sustainable Development* dan Lasanble plis detay lo bann pwen egzakt ki *IOT* i bezwen fer letan nou fer sa diskisyon avek zot, ki semenn prosen.

E apre nou ava kapab al dan tou bann *schedule*. Me selman nou dapre notis ki nou'n donn li, se 2 mwan pour li konplet tou sa bann travay. Mersi.

MR SPEAKER

Mersi. Bon, Minis nou pou pran ankor detrwa siplemanter. Be selman vi ki ou'n pas en kantite letan lo la, nou ava sey ganny bann repons en pe bref silvouple. Onorab Labonte, ou kestyon.

HON ANDY LABONTE

Mersi Mr Speaker. Minis, mon larepons in ganny kouver en pe par larepons ki ou'n rann Onorab William dan son siplemanter regarding *IOT*. Me selman i enportan pour mwan met lanfaz lo la *akoz* La Rivière Anglaise i en distrik ki vreman pe ganny afekte avek sa loder *IOT*.

Petet mon kestyon an relasyon avek kestyon orizinal. Petet ki prosedir ou aksyon i annan an plas pou dekouraz sa bann konportman parey e ki rekour zabitant i annan?

Akoz ler nou pe konpar parey *IOT* ki en gro biznes, me li i *carry on* avek sa. I ganny plis letan. Ler mon konpar en pti biznes parey i annan en zabitant dan mon distrik, Thomas Bamboche ki pe ganny difikilte...

MR SPEAKER

Bon. *Ok.*

HON ANDY LABONTE

I pa ni pe fer en polisyon *as such* – loder...

MR SPEAKER

Onorab?

HON ANDY LABONTE

...Me selman i pa kapab pratik son travay. So ki rekour i annan Minis?

MR SPEAKER

Nou konpran ou kestyon. Silvouple. Wi, mersi. Minis, ou ava adres li silvouple, bref.

MINISTER

JOUBERT

Ok. Mersi Mr Speaker. Onorab in demann kestyon. Onorab Labonte in demann kestyon lo ki prosedir e ki bann mezir ki pou antre an plas pour bann - ki kapab antre an plas pour bann konpannyen parey *IOT*.

Premye keksoz Mr Speaker se ki, napa en standar pour loder ki'n ganny aplike Sesel ziska konmela, *akoz* i en paramet ki vreman difisil pou kantifye. So, i difisil pour ou dir ki kantite loder ou pe gannyen e ki lentansite. *Unless* ou mezir sa *gas* ki pe koz sa loder. Me sa i pou kapab reflekte zis en parti sa loder.

Alor, loder napa en standar ki kapab ganny aplike.

FLAVIEN

E plizyer pei in seye. I annan serten zot servi en *panel* dimoun pou zize e pou determinen si i annan en problem loder.

Me selman rezidan li i kapab temwanny poudir i annan sa problem loder. E dimoun i kapab, lo ou sit zot menm, konfirmen poudir i annan sa loder. Alor i annan sa posibilite pou dimoun vini e donn sa lenformasyon poudir wi, i annan loder. E depi tel kantite letan i pe eksperyans sa.

Ki nou kapab fer lo kote *IOT*? Normalman si i annan en polisyon ki pe arive anba Lalwa Proteksyon Lanvironnman, Departman i *issue* en notis – en *Prohibition Notice* pou dir ek sa landrwa; i annan en polisyon ki pe arive. Mon pe notifye ou konmkwa ou devret pran mezir pour ou aret li. E mon donn ou en peryod letan pour ou fer li ganny arive.

Dan ka *IOT* ki nou'n fer se ki nou'n notifye li konmkwa i annan en nwizans ki pe arive. E nou'n dir li – nou'n tonm dakor avek li. Ouswa dapre bann leksplikasyon ki'n donn nou, nou'n donn li lenstriksyon pour li met an plas bann mezir pou amelyor son sistem.

E, apre sa, *ultimatum* ki nou donn li se ki; si ou pa met li an plas, nou pou fer 2 keksoz. Enn, se ki nou pou ferm ou. Nou pou fer ou aret fonksyonnen pour en peryod letan ziska ler ou kapab met sa sistem an plas.

Ouswa, ou pou bezwen tonm dakor pour en penalti finansyel. Si ou pa pe kapab fermen, ou bezwen pey en bon penalti finansyel dan plas pran aksyon avek ou lo kote fermtir.

Me selman, nou konnen poudir si i kontinyen, nou *still* kapab al devan Lakour avek tou sa bann lenformasyon. E la i pou enkli bann temwannyaz bann sitwayen. Bann dimoun ki ganny afekte. Bann ki vin lo *site* ki'n konfirmen, bann zofisyen eksetera. E la preznan ou al dan en prosedir bokou pli legal.

Me atraver bann notis ki nou servi, nou *still* kapab fors en konpannyen ouswa en lorganizasyon pour li pran aksyon. E nou *still* kapab met serten mezir an plas. E menm fermen en loperasyon si nou vwar ki sa problem pe kontinyen.

Alor pour nou, parey mon'n deklare dan lepase, nou'n arriv en pwen kot si *IOT* i kontinyen, nou pou senpleman egzers sa pouvwar ki nou

annan pou dir li "ou bezwen aret loperasyon ziska ler ou met an plas bann mezir ki pou anpese ki problem loder i vin telman entans dan lavil." Mersi.

MR SPEAKER

Mersi Minis. Onorab Pillay?

HON SEBASTIEN PILLAY

Mersi Mr Speaker. Mr Speaker kestyon i *straight forward*. I annan plizyer sa bann ka ki'n ganny rapporte avek Minister Lanvironnman. Ka *IOT* i enn ki *ongoing* ki ou'n dir nou ou pe al fer serten keksoz lo la.

So, ki *time frame* ki ou donn Lasanble la ou, pour ou al *handle* sa problem ki annan pou al fer – ki dil ek *IOT in terms of reacquisition* novo lekipman pour li *improve* sa *emission* ki pe al sorti? Ki *time frame* ou pou donn Lasanble? Sa lannen? Lannen prosenn 2026? Ki *time frame*?

E an relasyon avek bann polisyon larivyer ki ou'n war. Ki'n arive e ki aksyon ki ou'n pran dan sirkonstans kot sitwayen in menm annan portre serten *pickup* ki pe transport serten debri sorti lo laferm, kot in kree polisyon? Ki aksyon ki ou Minister in pran atraver zot *Enforcement Unit*? Mersi Mr Speaker.

MR SPEAKER

Mersi. Minis, nou a sey bref silvouple.

MINISTER

JOUBERT

Mersi Mr Speaker. Mr Speaker, *IOT* in ganny donnen 8 semenn depi – mon pe sey rod sa dat la egzakt. Mon krwar ti le 7 sa mwan ki'n pase. So i 8 semenn depi le 7 ki sa mwan ki'n pase. E nou, nou pe kont li konman en peryod ki rezonnab pou li kapab met an plas bann mezir pou redwir sa problem polisyon.

Kot i konsern sa *pickup* Onorab, i annan en kantite ka polisyon ki parfwa i pran letan pou ou kapab dil avek. E nou konnen i annan plizyer largiman, plizyer diskisyon in ganny fer. Me, ou'n demann mwan en kestyon kot en *pickup* in zet en salte lo semen e in koz polisyon.

Mr Speaker, mon konnen tou dimoun pou fer komanter lo medya sosyal. Me selman ozordi menm i annan *pickup* pe savoy fimyen dan pei. I annan enn in kase, son fimyen in tonm lo semen.

Me la, la letan nou pe koze i annan dimoun pe savoy fimyen. Pe tir lo en landrwa ki

FLAVIEN

fer *livestock*, pe anmenn lo en laferm. Me nou bezwen gete kwa ki nou pe dil avek e dil avek dan en fason rezonnab parey en dimoun rezonnab.

E non pa zis – pa akoz i annan komanter ki *ongoing*. Ouswa pa akoz i annan lopinyon ki la dan piblik ki nou bezwen pran en desizyon parey piblik pe fer. Nou bezwen kapab rezonnab dan lafason ki nou evalye ek sityasyon.

E pour mwan sa *case* – pa mwan ki'n ziz sa *case*. Be selman sa *case* letan mon'n vwar li se en *pickup* pe savoy fimyen. E sa *pickup* in annan en *breakdown* e sa ki ladan in tonm lo semen. So se sa ki'n arive sa zour. Alor en *pickup* fimyen i kapab tonbe anvil. I arive. E toulezour fimyen i ganny savoye dan *pickup*.

Fodore nou get li parey en dimoun rezonnab e nou tret li parey en dimoun rezonnab, menm si nou annan nou lopinyon lo en *case*. Mon osi mon annan en lopinyon lo sa bann *case*. E mon osi mon annan serten keksoz ki mon ti a kontan vwar fer pli vit lo la. Me selman nou bezwen get li dan en fason rezonnab. Mersi.

MR SPEAKER

Mersi Minis. Onorab Henrie, ou kestyon.

HON GERVAIS HENRIE

Mersi Mr Speaker. mon kestyon i konm swivan;

Okour bann lannen ki'n pase, in annan plizer bann ka polisyon ki'n ganny rapporte plizer landrwa. Par egzanp mon kapab mazin Raffles Praslin en letan ti annan sa problemm. La Misère. *IOT*.

Ki nou war poudir i *span over* en pe letan. E piblik i kontinyen esper en larepons avek Minis bann antite konsernen. E la Minis pe donn nou serten lasirans poudir i annan en *timeline* ki'n ganny aplike.

Me lefe i reste ki eski enternman, Minister i kontinyelman revwar son bann prosedir, mannyer pou atak sa bann sityasyon, ki fer ki piblik pa krwar poudir zot pe trenn lipye ouswa pa pe fer ase - ouswa zot mank kapasite pou dil avek?

Eski *internally* zot regard zot bann prosedir pou asire ki a lavenir zot azir avek plis lirzans vizavi sa bann sityasyon ki repeate? Mersi.

MR SPEAKER

Mersi Onorab. Minis?

MINISTER
JOUBERT**FLAVIEN**

Mersi Mr Speaker. Mersi Onorab pou al lo sa size kapasite ek performans. Mr Speaker parey mon'n eksplike; nou konsyan. Nou konsyan ki *internally* nou kapab fer pli byen dan lavites ki nou dil ek polisyon. E osi dan kapasite ki annan pou teste e prodwi lenformasyon ki korek pou kapab fer bann *case* bouz pli vit.

Osi i annan en lot *challenge* ki i enportan nou note se ki nou Sistèm Legal osi fodre nou kapab ganny en pli bon laranzman avek zot, pour nou fer keksoz bouz dan en fason ase vit.

Be selman *internally* lo kote prosedir par egzanp, ou a note Onorab ki dan revizyon Lalwa Proteksyon Lanvironnman, enn bann keksoz ki'n entrodwir se en *Nuisance Notice*.

Dan lepase i ti donn nou en bon pe difikilte letan en *case* i pa tonm swa enn, swa lot, e nou pa konnen ki mannyer nou pou aplik Lalwa lo la. Me nou'n entrodwir e nou'n prete sorti dan Lalwa *Penal Code* si mon rapel byen, sa prensip

nuisance. E dan Lalwa Lasante osi.

Ki letan en keksoz i arive ki pe koz en lenkonvenyans me selman i pa pe neseserman en form polisyon ou kapab mezire. Nou kapab osi pran aksyon e fors sa dimoun pour li dil avek.

Par egzanp i annan dimoun i pe konplent ek ou en loder. Ou pa kapab mezire sa loder, me selman ou konnen poudir i egziste. E koman en zofisyè ou'n temwannyen poudir i annan sa problem. Ou kapab pran aksyon.

Alor i annan bann amelyorasyon ki nou'n fer lo kote prosedir. Me i annan ankor ki nou bezwen fer pour nou fer sir ki keksoz i mars pli byen.

Letan mon'n koz ek ou lo *Legal Enforcement and Compliance Unit* ki nou pe amelyore. Par egzanp pour nou annan 2 dimoun legal avek lezot dimoun *enforcement* ki pou travay avek sa *unit*. Se pour nou fer sir ki letan nou fer *enforcement* e *compliance* la, nou pa fer zis pour sa ki laba deor. Me selman nou pa pe get tou keksoz an zeneral dan pei. E parey mon'n dir, i pa zis prive ki fer polisyon. I tou bann aktivite ki nou annan dan pei.

E an menm tan ki nou pe azir lo bann lendistri, nou

bezwen osi pe dir par egzant ek bann *Housing Estate*, ou osi met ou annord. E ou osi fer sir ki bann planifikasyon i ganny fer boner pou fer sir ki keksoz i mars byen.

Alor *internally*, nou konsyan i annan problem. Nou konsyan nou bezwen travay pli byen. E nou, nou pe met plis zefor pour nou kapab delivre lo sa manda ki pa telman fasil.

Me nou, nou ti a voudre ki i annan sa konprenezon ant bann diferan antite letan in ariver pour nou pran aksyon lo bann size polisyon. Mon pa konnen si mon'n reponn ou kestyon ann antye Onorab? Me selman si i annan okenn keksoz...

MR SPEAKER

Nou a bezwen satisfe avek sa Minis, mersi. Onorab Labrosse, ou kestyon pa ankor reponn? I annan? Ale, *go ahead*. Ou kestyon Onorab Labrosse.

HON RICHARD LABROSSE

Ok. Wi, Mr Speaker. Minis, mon'n ekout ou bann larepons ki ou'n donnent konsernant sa kestyon ki mon santi i osi en kestyon vreman enportant. Ou'n mansyonn bann landrwa ki'n

ganny afekte. Ou'n mansyonn Fairview sirtou.

Minis, mwan ki mon ti a kontan konnen ozordi la ler nou pe koze, eski dan ou Minister ozordi ou annan ase mendev ki pou kapab travay dan bann sityasyon parey, oubyen dan bann problem parey - sirtou ler nou annan bann ka kot i annan larivyer sirtou kot pe ganny polye?

Eski ou Minister i okipe parey – si mon vin pli direk; eski ou Minister i okipe avek dimoun kalifye dan sa bann domenn parey ki nou pe koze ozordi? Mersi Mr Speaker.

MR SPEAKER

Mersi. En pe swivi lo kestyon Onorab Larue. Minis, ou repons silvouple?

MINISTER

JOUBERT

Mersi Mr Speaker. Mersi Onorab, pour sa kestyon. Mr Speaker, sa pwen mendev mon krwar i en keksoz ki toulant preokip nou. Mwan mon pou dir ki nou annan kantite. Nou annan kantite. Me pa neseserman nou annan ase kalite.

FLAVIEN

Nou bezwen fer sir ki nou kapab annan plis dimoun ki annan sa *haut* konpetans, kot

letan ou donn li en *case* i kapab depay tou bann keksoz otour sa *case*. E i kapab vin avek tou sa lenformasyon ki neseser pou kapab kontinyen bouz devan avek sa *case*.

Nou vwar dan bokou ka kot serten dimoun par egzanp, letan in ariv ler pour nou bouz devan avek ka legal, i annan kestyon ki leve lo zot kalifikasyon. E nou bezwen fer sir ki bann dimoun i annan sa bann kalifikasyon pli avanse.

E nou ankouraze ki ozordi dan *environmental science* kot *UniSey*, i annan en bon pe lanfaz pe ganny mete lo evalyasyon polisyon. Me selman pou en dimoun vin vreman konpetan, i pa sifilan pou li zis swiv sa *case* sa *training* kot *UniSey* e i fini lanmenm.

I pou bezwen al aprofondir li dan plizyer size e konpran vreman ki mannyer pou aplik sa konesans pour li donn en bon rezulta. Alor i annan kantite. Me nou, nou ti a voudre annan plis lo kote kalite e lo kote leksperyans parmi nou bann staf. Mersi.

MR SPEAKER

Mersi. Mersi Minis. Nou'n pas en bon pe letan lo sa kestyon ki pou *limit* nou en pe lo bann kestyon ki pe vini. Me mon

krwar nou'n ariv ler pour en sanzman *panel* la.

Donk, mon remersye Mr Matatiken e Mrs Laure pour zot partisipasyon e an menm tan madanm reporter i ava apel lot delegasyon.

Bon, bonzour e byenveni Mr Tony Imaduwa, Sekreter Prensipal dan Departman *Climate Change* ek Lenerzi. E Mr Joel Valmont, CEO *PUC*. Mersi pour zot partisipasyon. Nou'n ariv lo kestyon 210. Onorab Waven William?

HON WAVEN WILLIAM

Mersi Mr Speaker. Eski Minis i kapab dir sa Lasanble si Sesel i annan en plan vin pli anbisye ver itilizasyon plis lenerzi renouvlab, avek bi redwir emisyon gaz *greenhouse* pou anmenn rediksyon dan kou lavi e ranmas plis reveni lo *carbon tax*? Mersi.

MR SPEAKER

Mersi. Minis, ou repons?

MINISTER JOUBERT

Mersi Mr Speaker. Mersi Onorab, pour ou kestyon. Mr Speaker, wi, Sesel i annan en plan pli anbisye fer litilizasyon lenerzi renouvlab pou redwir

FLAVIEN

emisyon bann *gas* ki fer lefe resofman. Parey Lasanble i okouran, Polisi Nasional pour Lenerzi in etablir en target 15poursan renouvlab par 2030. E nou kontribisyon nasyonal determinen pe target *net-zero* par 2050.

Plan pour pei se pou arive apres 100poursan lenerzi renouvlab dan bann prosen deseni. Travay in komanse pou akseler adopsyon lenerzi renouvlab.

Par egzanp; revwar lankadreman legal ki gouvern Sekter Elektrisite ek lenerzi renouvlab. Regilasyon pou etablir en striktir formel pour lenerzi renouvlab oubyen *distributed energy generation* pe finalize. E sa regilasyon pou fasilit enstalasyon sa bann sistenm lenerzi renouvlab.

Devlopman en plan nasyonal anliny avek bann differan Polisi Stratezi pour Lenerzi pe ganny devlope. Sa i en plan ki apel en *Integrated Resource Plan* oubyen en *IRP*. E i osi pran an konsiderasyon nouvo plan stratezik pour devlopman. Nou *National Development Strategy*.

Sa *IRP* pou idantifye bann differan opsyon pou zener e mannye demann elektrisite. E sa plan pou osi evalye bann

senaryo lenvestisman avek differan kombinezon sa bann differan opsyon, pour ki demann elektrisite dan lavenir i ganny asire.

Sa bann opsyon i pou enkli bann differan Proze Lenstalasyon ou Lenerzi Renouvlab lo Mahe, Praslin ouswa La Digue. Nou ekspekte ki sa plan pou ganny finalize ver lafen sa lannen.

Nou osi annan revizyon dan Polisi Lenerzi 2010 a 2030 pou ganny fer apre konpilasyon sa *IRP*. E osi anliny avek bann lezot plan stratezik ek letid ki'n ganny fer lo Sekter Lenerzi.

Plan se pou revwar sa target e pou demonstre plis lanbisyon pour Sesel. Gouvernman pou kontinyen siport bann lenstalasyon Sistenm Renouvlab par etablir bann mekanizm finansyel oubyen bann *Incentive Scheme* pou ankouraz plis lenstalasyon. Sirtou sistenm ki baze lo soler.

Mon annan plezir pou anonse ki Gouvernman pou al lans dezyenm faz *PV Rebate Scheme* sa lannen. An plis, diskisyon ant Minister Finans, Departman Lenerzi e Sanzman Klima e Komisyon Lenerzi in komanse, pou devlop nouvo mezir pou ankouraz konsonmater adopte teknolozi

lenerzi renouvlab e bann ki servi lenerzi pli efikas. Savedir *energy efficiency*.

Minister ansamn ek son bann lazans pe travay lo en *Project Pipeline* pour bann pli gro Sistèm Fotovoltaik, ki pou ganny enstale lo later, twatir. Oubyen lo lanmer lo Mahe, Praslin ek La Digue. Sa bann plant pou prodwir lenerzi e apre vann avek *PUC*.

Mr Speaker, malerezman i annan serten defayans teknik avek network elektrisite. Espesyalman lo son low voltage network ki fer ki kapasite sistèm soler – kapasite pou aksepte bann sistèm soler i aprezan an se moman limite.

I an zefor ki'n ganny fer – ki ti pe ganny planifye pou minimiz bann limitasyon lo sa *low voltage network*. An premye i proze – i annan zefor ki'n ganny fer e ki pe ganny planifye pou minimiz bann limitasyon lo sa *low voltage network*.

An premye, i Proze 33kilovolt(kV) *Network Upgrade* ki kontribye en gran benefis pou elev performans nou bann *low voltage network* dan rezyon sid Mahe.

An plis, i annan letid ki pe ganny fer pou idantifye kalkil ki kantite logmantasyon dan kapasite bann lekipman lo *low*

voltage network ki neseser pou fer li posib pou kontribye e zwenn nou target nasyonal lo lenerzi renouvlab.

Apre ki sa letid in fini ganny fer, i kapab ganny servi pou ed Gouvernman mobiliz finans avek bann diferan partener. E sa i enkli *Green Climate Fund*, ki en Fon enternasyonal ki siport bann pei pou devlop e enplimant bann proze dan Sekter Lenerzi Renouvlab.

Lannen pase *PUC* ti siny en Lagreman pou aste elektrisite avek en prodikter elektrisite ki apel *Qair*. Ki aktyelman dan pei sa semenn. *Qair* pou enstal en Sistèm Fotovoltaik Flotan dan *lagoon Providence* – dan lagon Providence avek en kapasite 5megawat(*MWp*.)

Bann Sistèm Soler Fotovoltaik Flotan e en nouvo teknolozi i kapab ed nou adres bann limitasyon lespas later, pou ogmant litilizasyon lenerzi renouvlab. Nou ekspekte ki bann sistèm flotan pou anmenn en gran kontribisyón dan kourt e lonterm pou ogmant plis lenerzi renouvlab dan nou zenerasyon elektrisite.

Mr Speaker, mon oule profite pou azoute ki dapre dernyen komunikasyon

nasyonal anba Konvansyon Klima ouswa *Third National Communication* kot UNFCCC, lamazorite emisyon gaz ki koz resofman klima, i sorti dan Sekter Transpor, Elektrisite e osi Salte. E i reprezant apepre 85poursan nou emisyon total.

Gouvernman pou enplimant plizyer proze ki target sa 3 sekter. Dapre nou *National Determined Contribution*, pei pe target redwir emisyon gaz par 26.4poursan 2030. E sa target in ganny konsidere konman tre ambisyé.

Pour sa bout lo *carbon tax*. Nou rekonnert rol ki *carbon* e pli spesifikman *carbon market* i kapab anmennen pour pei si nou partisip dan sa bann *scheme* enternasyonal.

Alor Minister Finans in apres Labank Mondyal pou rod led teknik pou asiste pei pou devlop en *framework* pour *carbon* dan pei. E sa pou enkli *carbon tax*, *carbon markets*, eksetera.

Pou komanse, sa sipor i pou fer en *diagnostic study*. I pou regard kondisyon pei pour nou gete si nou kapab vreman al dan sa direksyon e ki mannyer nou pou al dan sa direksyon.

Sa sipor pou apre adres sa bann defayans tel koman devlop bann Polisi ek Lalwa apropriye. Devlop kapasite parmi nou bann regilater, eksetera pour ki nou kapab met an plas sa bann *framework*.

Parey nou konnen, bokou fwa *carbon markets* e *carbon tax* i annan bokou pou fer avek verifikasiyon ek transparans. E alor nou bezwen fer sir ki tou mezir i an plas pour nou fer ki si en sistem i ganny met an plas nou kapab raporte konmkwa nou sistem i annord e i transparan. Mersi Mr Speaker.

MR SPEAKER

Mersi Minis. Onorab, ou siplemanter.

HON WAVEN WILLIAM

Minis, konsernan *the PV Rebate Scheme*, baze lo bann leksperyans ki aplikan pe fer, zot vwar poudir sa prosedir i en pe *cumbersome*. Eski zot pe mazin senplifye bann dokiman pour laplikasyon sa *PV Scheme*?

Akoz i annan en pti pe problemm kot sitwayen pe fer fas avek, si nou vreman anvi ankouraz dimoun al dan ver sa direksyon. Eski nou pe mazin

senplifye bann prosedir e *the process*?

MR SPEAKER

Mersi. Minis?

MINISTER

FLAVIEN

JOUBERT

Mersi Mr Speaker. Avek ou permisyon, mon a demann *PS Imaduwa* pou entervenir lo sa size.

MR SPEAKER

PS, ou annan laparol.

PS CLIMATE CHANGE & ENERGY TONY IMADUWA

Mersi Mr Speaker. Mersi Onorab pour ou kestyon. Mon krwar *PV Rebate Scheme* avek laplikasyon *PV* i 2 diferan prosedir. Sa enn ki kekfwa kliyan or konsonmater pe konplet i sa aplikasyon pour enstalasyon *PV*. E sa pe ganny revwar anba novo Lalwa.

E sanmenm sa ki annan sa revizyon ki'n fini ganny fer avek *Energy Act*, ki prezan nou annan *Electricity Act*. E pli boner Minis in koz about *distributor energy generation*. E sa i regilasyon ki pou kontrol bann enstalasyon *PV* lo rezo. So, i pou annan prosedir ki pou ganny senplifye pour bann pti sistenm ki ganny enstale.

Lo kote *Rebate Scheme* i pou *more or less* i *straight forward*. Zis apre ki ou fini fer ou lenstalasyon ou *apply* pour ou *Rebate Scheme*, e demonstre ki ou sistenm i fini ganny enstale. E sa nou napa okenn konplent lo kote son prosedir mon. Mon krwar sa ki ou pe refer lo la i sa prosedir pour enstalasyon.

MR SPEAKER

Mersi *PS*. Bon, avek sa nou a avans lo kestyon 212 dan non Onorab Richard Labrosse.

HON RICHARD LABROSSE

Mersi Mr Speaker. Dabor mon ti a kontan akeyir *PS* ki novo dan delegasyon. Mr Speaker, kestyon 212 i lir kom swivan;

Eski Minis i kapab eksplik Lasanble ki benefis sa bann *wind turbine* lo Ile De Romainville e Ile du Port in anmennen pour pei depi zot enstalasyon? Mersi.

MR SPEAKER

Mersi Onorab. Minis, repons?

MINISTER

FLAVIEN

JOUBERT

Mersi Mr Speaker. Mr Speaker, repons pou tre kourt pour sa kestyon. Mersi Onorab, ankor en fwa.

Sa bann *wind turbine* depi zot enstalasyon, zot in zener 73.074 milyon *kilowatt(kW)* oubyen *unit* elektrisite ki'n ganny anmennen dan rezo *PUC*. Sa i koresponn avek 16.6milyon lit karbiran ki pa'n ganny servi pou zener sa menm kantite *unit* elektrisite.

E sa i reprezent en *saving* apepre R141 milyon pour *PUC*. E en *saving* apepre – pa apepre me egzakteman 8.9 milyon Dolar pour pei. Sa 8 *wind turbine* i osi pe kontribye apepre 1.5poursan konsonmasyon elektrisite dan pei. Mersi Mr Speaker.

MR SPEAKER

Mersi. Onorab Labrosse, premye. Ou siplemanter.

HON RICHARD LABROSSE

Ok Mr Speaker. Mon a dir Minis mersi pour son larepons. Minis, dan en fason pli senp e kourt. Bann konsonmater ki ou'n dir ki son benefis ki'n dir lo *PUC*. Lo kote konsonmater li menm. Bann dimoun ordiner parey nou dir dan lakominote, ki sa li menm in anmennen pour zot?

E mon dezyenm kestyon Minis, eski ou Minister oubyen Gouvernman ozordi pe mazin antre ankor dan bann kalite

proze parey, sirtou ler nou pe koz lenerzi renouvlab? Mersi.

MR SPEAKER

Mersi. Minis?

MINISTER

JOUBERT

Mr Speaker, mon pa'n tro konpran dezyenm parti kestyon. Mon kapab demande ki Onorab i repet sa dezyenm parti silvouple.

HON RICHARD LABROSSE

Wi Mr Speaker, mon a reponn dezyenm parti kestyon. Dezyenm kestyon Minis, mon ti anvi konnen si Gouvernman ozordi ki o pouvwar, si nou pe mazin al – *ok*, mon konnen ki i pou la ankor 2030.

(*Interruption*)

MR SPEAKER

Ale.

HON RICHARD LABROSSE

Eski nou pe mazin al ankor dan sa bann kalite devlopman parey, sirtou ler nou pe koz lo term lenerzi renouvlab? Mersi Mr Speaker.

MR SPEAKER

Mersi Onorab. Minis, wi?

MINISTER
JOUBERT

Mersi Mr Speaker. Mr Speaker, mon pou demann CEO PUC ki la lo mon kote pour li reponn sa 2 pwen. Enn kot i konsern benefis pour konsonmater e ki lenpak sa bann souris renouvlab in annan lo elektrisite li menm. E osi kontinyasyon l'investisman dan bann tel kalite proze dan le fitir. Mersi.

FLAVIEN

avek sa bann *turbine*, sa bann ki nou zenere i pa antre dan sa kalkilasyon tarif. Se koumsa ki bann konsonmater in benefisyé Mr Speaker.

Pour dezyenm pwen kot i konsern, eski nou pe eksplor plis sa bann *venture* en pe parey kot i konsern renouvlab? Wi, nou deza angaze avek serten, ou kapab dir serten eksplorasyon lo menm *wind turbine* ki en pe pli gro.

Me pour lemoman i ankor lo nivo leksplorasyon. Nou pa ankor menm antre dan term *feasibility study*. E anmezir sa i avanse nou a kapab donn en pe plis detay. Mersi Mr Speaker.

MR SPEAKER

Mersi. CEO, ou annan laparol.

CEO PUC JOEL VALMONT

Mersi Mr Speaker. Mon krwar midi in sonnen. Bonn apre midi bann Manm Onorab avek manm oditer ki pe ekout nou.

Mr Speaker, pou donn en repons en pe direk *MNA* ki mannyer piblik in benefisyé lo sa bann *savings*. Ki savedir ki sa bann karbiran ki nou pa'n servi avek sa bann *savings* ki nou'n fer i pa'n ganny pase dan tarif elektrisite. Savedir an mwayen tou sa *savings* i pa'n ganny apote dan *bill* elektrisite konsonmater.

Normalman nou enpakte tarif tou le 4 mwan baze lo lakantite karbiran ki nou servi. E pli - dan sa ka *wind turbine*, pli nou zener plis elektrisite

MR SPEAKER

Mersi. Bon, bann siplémenter i pou bezwen bref silvouple. Vitman. Onorab Labonte, ou kestyon.

HON ANDY LABONTE

Mersi Mr Speaker. Minis, zis anpasan. Eski i posib pou dir Lasanble si i profitab an term kou *maintenance* lo sa bann *wind turbine* an relasyon avek benefis ki i anmennen pour pei an zeneral? Mersi.

MR SPEAKER

Mersi. Minis?

MINISTER JOUBERT

Mersi Mr Speaker. Mon a demann CEO pou al en pe an detay lo sa size kou *maintenance* sa lekipman.

MR SPEAKER

CEO, ou annan laparol.

CEO PUC JOEL VALMONT

Mr Speaker, mon pa'n anmenn bann detay kou *maintenance*. Bann detay – me selman mon kapab fer serten refleksyon lo la.

Lo konmansman ler nou ti pran *ownership wind turbine*, nou ti ankor pe angaz nou avek en *technical contract pour operations and maintenance*. Premye 2, 3 an.E dan sa bann letan ki nou ti war ki – ou kapab dir preski 70poursan benefis ki nou ti pe fer, *savings* ki nou ti pe fer ti pe al pour *finance ONM Contract*. Be apre ki nou nou'n *takeover*, apre *training* nou bann staf. La prezan dan sa evolisyon, sa *savings* in kapab pli *être profitab* pour *PUC*.

Me as lenfrastriktir i vyei e teknolozi i konmans evolye, i konmans vin difisil pou ganny pli part. La kot nou pou konmans war nou pe perdi en pe ankor sa benefis an term

FLAVIEN

larzan ki bezwen al dan *maintenance*.

Pour lemoman nou a kapab dir i environ – pou kapab dir kou *maintenance* pe pran environ 30 a 40poursan sa *savings* ki nou pe fer. Mersi Mr Speaker.

MR SPEAKER

Mersi. Onorab Pillay, ou kestyon?

HON SEBASTIEN PILLAY

Mersi Mr Speaker. Mon kontan tande ki en lenvestisman ki Gouvernman US in fer pe anmenn benefis pour pei.

(APPLAUSE)

HON SEBASTIEN PILLAY

Nou a espere kan LDS i a fer enn pour li menm. Mr Speaker, eski Minis i kapab dir nou, prenan kont direksyon ki nou le ale. E sa *grid PUC* li menm, *ok*? Sa i reprezant pli gro lenvestisman ki nou bezwen fer.

What is the time frame lo revwar *grid* pou fer ki, si nou tou nou pe vin bann *IPPs Independent Power Producers*, oubyen i pou annan bann pli gro, ki sa i kapab ganny entegre *within* Sistem PUC e i kapab ede *further reduce the cost* lo karbiran ki nou pe fer fas avek?

Mr Speaker, ou a remarke se *US toulstan* ki annan nide Mr Speaker.

(APPLAUSE)

MR SPEAKER

Bon. Tre byen. Minis, repons.
Ou panel?

MINISTER

JOUBERT

Mersi Mr Speaker. Mon ava demann *CEO* pou al dan detay lo amelyorasyon *grid* pou ankouraz renouvlab. Mersi.

MR SPEAKER

CEO, wi. Ou kapab adrese.

CEO PUC JOEL VALMONT

Mr Speaker, mon a sey *avoid* detay. Al en pe pli spesifik. Minis in mansyonn en *IRP*. En *Integrated Resource Plan* ki nou pe fer. Ladan i annan bann *schema* ki mannyer nou pou ogmant renouvlab e ki mannyer nou pou bezwen adres kapasite *network* as nou *rank up*, enkli kapasite *storage*.

So pou kapab *set* en serten letan la, i pa pou *accurate* pou donn sa lenformasyon. Mon pou plifere dir pou dir sa i en keksoz ki evolye avek ogmantasyon renouvlab. Nou pou bezwen fer

sir ki nou pe *expend grid* pou kapab *absorb* menm sa target ki nou'n *set* nou lekor pour 2030. Sa repons ki mon pe dir mon pe *être* en pe pli spesifik lo la. Mersi Mr Speaker.

MR SPEAKER

Mersi *CEO*. Onorab Hoareau, kestyon?

HON JOHN HOAREAU

Mersi Mr Speaker. Mr Speaker, parti mon kestyon in deza ganny kouver dan kestyon ki Onorab in demande avan.

Be selman mon ti ava anvis demann Minis, si dan sa *energy mix* ki *PUC* i annan, si zot annan plas ankor pou met en pe plis bann differan kalite sours lenerzi renouvlab ki konsern divan?

MR SPEAKER

Mersi. Minis?

MINISTER

JOUBERT

Mersi Mr Speaker. Mr Speaker, dapre bann lenformasyon ki mwan mon'n ganny donne, petet mon a les *PS* entervenir en pti moman lo la.

Divan pa toulstan ki i en sours ki fyab pour Sesel, akoz i annan bann peryod vreman kalm kot ou pe koz 9 mwan dan

en lannen ki ou annan en resours ki ou kapab servi. Larestan letan i difisil.

Me i annan bann demars ki nou'n fer. Bann konversasyon ki nou'n fer avek serten group pour nou evalye pli byen *offshore* si i annan resours *available*. E osi reget en pe bann opsyon lo later. Me selman nou konnen poudir Sesel teren i ase konplike.

E pou enstal bann gro *turbine* dan bann landrwa lo montanny i kree en kantite problem, enkli problem enstalasyon. Me i annan lezot problem osi ki vin avek. Mon pa konnen si *PS* i kapab azout en pti bout lo la.

Me selman divan i enteresan akoz i 24er. E non pa 12erdan parey *solar*. Me selman i en *challenge* pour Sesel akoz zeografikman kot nou ete. Me akoz osi nou bann kondisyon ki egziste lo nou bann zil. Mersi.

MR SPEAKER

PS, i le azout en pti pe vitman?

PS CLIMATE CHANGE & ENERGY TONY IMADUWA

Wi Mr Speaker, zis briyevman zis pou azoute ki Minis in dir. Akoz sa *challenge*, sanmenm sa ki nou pe *explore offshore*. E

offshore avan ler i vann ki nou kapab vreman etablir. Nou bezwen regard son potansyel si i la avan ler ki nou kapab dir si i fezab *or not* fezab.

E se pour sa rezon ki nou pa pe zis depan li lo *offshore windfarm*. Be osi nou pe get bann lezot sour. Parey *biomass*, *biofuel*. Bann potansyel lanmer osi ki kapab form par dan sa *energy mix*.

E se pour sa rezon ler nou pe fer sa *IRP*, i pa restrikte zis avek soler ek divan. Be bann lezot form lenerzi renouvlab. Be ki potansyel nou annan e ki mannyer sa i pou entegre dan nou *energy mix* ki pou siport demann pei? Mersi.

MR SPEAKER

Mersi. Nou a pas lo kestyon 213 dan non Onorab Churchill Gill. E Onorab Loze pou demann son kestyon.

HON JOHAN LOZE

Mersi Mr Speaker. Bonzour tou dimoun lo *panel*. Mr Speaker, kestyon 213 pour Onorab Churchill Gill Manm Elekte pour distrik Baie Ste Anne i lir koumsa;

Eski Minis i kapab eksplik sa Lasanble:--

a) Konbyen i kout *PUC* pou enstal en *meter* delo kot en lakour e si sa i zistifye sa *rental lo bill* tou le mwan?

b) Kwa ki kapab kontribye pou fer ki Seselwa i vwar ki son *bill* tou le mwan i pa konsistan avek sakrifis pou ekonomiz servi delo ek elektrisite? Mersi Mr Speaker.

MR SPEAKER

Mersi. Minis, diriz ou *panel silvouple*.

MINISTER JOUBERT

Mersi Mr Speaker. Pour premye kestyon sorti kot Onorab Gill. Mr Speaker, pou enstal en *meter* delo kot en lakour, *PUC* i sarz en total R945. E sa i konsern R845 pour koneksyon ki kouver en serten poursantaz kou mendev, materyo e transpor. R100 i en *refundable deposit*.

Fodore fer resorti Mr Speaker, ki ozordi i pe kout *PUC* plis ki R845 pou enstal en nouvo *meter* delo kot en lakour. Depans total an mwayen i R1800 par koneksyon. *PUC* i osi sarz bann kliyan domestik en *meter rental fee* R10 tou le mwan.

Mr Speaker, sa *rental fee* an term si i rezonnab dan

konteks ozordi, i annefe pa ase. Etandonnen ki *PUC* i pa resarz konsonmater ler i ranplas bann *meter* delo ki pa marse, pa fonksyonnen. Menm si ozordi en *meter* delo i kout environ R300, *PUC* i bezwen sirmont en kou R1800 pou ranplas enn sa bann *meter*.

Normalman frekans pou ranplas en *meter* delo i varye ant 7 a 10 an. In annan osi bokou ka kot *PUC* in war li neseser pou ranplas *meter* delo ki'n defektiv avan sa peryod 7 an apre lenstalasyon. Mr Speaker, en peyman R10 tou le mwan i fer en total R120 par lannen. Apre 7 an sa i arriv en total R840. E R1200 apre 10 an. Menm sa sif apre 10 an pa ase pou kouver sa kou R1800 pou ranplas en *meter*.

Konsernan dezyenm parti kestyon Mr Speaker; kwa ki kapab kontribye pou fer ki Seselwa i krwar ki son *bill* tou le mwan? Mon'n ganny en pti pe difikilte pou konpran sa kestyon. Me selman mon a reponn li toudmenm.

Mr Speaker, i annan 3 fakter prensipal i kapab afekte en *bill* delo oubyen en *bill* elektrisite. Premyerman se revizyon dan tarif. E prensipalman, sa i annan pou fer avek servis elektrisite.

PUC i fer en azisteman dan tarif elektrisite tou le 4 mwan. Pandan sa lannen 2024, bann azisteman in ganny fer le 15 Zanvye, le 15 Avril e le 15 Zilyet. E prosen azisteman pou le 15 Oktob.

Sa bann azisteman i relye direkteman avek sanzman dan pri *fuel*. E en lot konponan pour bann lenvestisman mazer ki *PUC* pe fer pour sa peryod 2024 a 2027.

Dezyenmman Mr Speaker, sanzman dan konsonmasyon en konsonmater. Nou rekonnet ki i annan en logmantasyon dan konsonmasyon elektrisite dan bann peryod ki pli so. Normalman ant Avril ziska Zen. Sa i direkteman relye avek logmantasyon dan litilizasyon bann lekipman parey *air conditioning* dan lakaz.

Trwazyenmman Mr Speaker, dan bann sirkonstans kot i annan en kase lo sistenm tiyo delo apre *meter PUC* ki konsonmater pa apersevwar pour en peryod letan. En bon pe sa bann ka i ganny realize oubyen dekouver selman ler *PUC* i delivre *bill* pour lemwan ki pli eleve, ki sa enn mwan avan.

Dernyen faktor Mr Speaker, i relye avek bann *meter* ki pa pe fonksyonnen.

Lamazorite sa bann ka i annan pou fer avek *meter* delo. Dan sa bann lenstans, konsonmasyon konsonmater i ganny estimen ziska ki sa *meter* i ganny ranplase par *PUC*.

Mr Speaker, i enportan fer resorti ki apre ranplasman *meter* bann konsonmasyon i ganny lir e *bill* i reflekte konsonmasyon aktyel. Dan plizyer sa bann ka konsonmater i vwar en logmantasyon dan zot *bill*. Rezon pour sa se akoz sa estimasyon i baze lo konsonmasyon mwayenn dernyen 6 mwan ki *meter* pe pa ankor an fonksyon.

Defi avek sa Mr Speaker, se ki dan bokou ka - dan bokou sa bann ka, sa *meter* i deza pe anrezistre mwens ki konsonmasyon aktyel.

Mr Speaker, *PUC* i fer son mye pou ranplas *meter* ki pa pe fonksyonnen o pli vit posib si i kapab. Sa limitasyon i larzman relye avek mankman resours mendev. Mersi Mr Speaker.

MR SPEAKER

Mersi Minis. Mon a pran siplemanter Onorab Loze, apre nou a termin avek siplemanter Onorab Roucou.

HON JOHAN LOZE

Mersi Mr Speaker. Mr Speaker, dan son larepons, Minis in mansyonn bann reazisteman dan pri ki mon krwar in nonm 4 repriz ki'n ganny fer. E sa i annan normalman pou fer avek *price fluctuations*.

Me Minis in osi site ki i annan en konponan pour en lenvestisman mazer ladan. Si Minis i kapab dir nou, konbyen sa morso sa bout la, lenvestisman mazer in ete dan bann logmantasyon?

E pli enportan, eski sa konponan li i permanan? Sa 4 fwa ki in monte, i permanan ouswa si li osi i monte desann parey pri ki atase ek pri karbiran?

Apre Minis, koman ou bann teknisyen i la, si i kapab profite. Akoz kestyon Onorab Gill in annan pou fer avek bann dimoun menm ki pe ekonomiz zot konsonmasyon. Pe fer konservasyon. *Still* zot war monte desann.

Eski i annan okenn konsey ou kapab donn en dimoun kot lakour, ki zot kapab fer pou annan en *bill* en pe pli rezonnab? Mersi Mr Speaker.

MR SPEAKER

Mersi Onorab. Minis?

MINISTER JOUBERT

Mersi Mr Speaker. Sa bann azisteman ki Onorab pe koz lo la. Bann varyasyon i varyab. Me selman i annan en konponan ki'n ganny set. E sa i dapre lenvestisman *PUC*. Avek ou permisyon Mr Speaker, mon a envit CEO *PUC* pou li donn detay lo sa bout reazisteman pri ek sa konponan lenvestisman. E osi okenn konsey ki kapab deswit la enform bann dimoun kot zot kapab ekonomize lo zot *bill*. Mersi.

MR SPEAKER

CEO, ou annan laparol?

CEO PUC JOEL VALMONT

Mersi Mr Speaker. Mr Speaker, kot i konsern sa ogmantasyon dan tarif relye avek lenvestisman *PUC*.

Nou'n - pour delo avek *sewage* nou ti fer li en sel fwa an Zanye 2024. Nou ti fer *bill* delo ek *bill sewage* monte par 9.2poursan. Mon pa kapab mazinen dan mon latet konbyen i fer si ou pe konsonm tan delo, konbyen an plis i fer.

Me pour elektrisite, nou kalkil avek aprouvasyon ki nou ti gannyen ek diskisyon ek Gouvernman. Sete nou fer elektrisite monte par

FLAVIEN

8.4poursan. E dan sa bann letan kot *average tariff* ti ete, sa ti ekivalan 36sou an tou.

Ozordi nou'n pas nou en total 28sou. I reste nou ankor 8sou pou pase anver sa ratrapman pour lenvestisman. Nou ankor an diskisyon ek Gouvernman baze lo sanzman ki pe vini ann Oktob. Kwa ki nou kapab met ladan.

Kot i konsern eski sa bann laplikasyon tarif i permanan? Eski i annan varyasyon? Pour sa ki *PUC* pe mete pour lenvestisman, sa i pou reste la permanan. Sa i an permanans akoz i annan pou fer avek plan lenvestisman pour sa 4 an *regulatory period* ki nou ladan.

Kot i konsern *fuel*, sa i monte desann baze lo pri *fuel* ki *PUC* i resevwar avek *SEYPPEC*. E ki ganny larzman enflidianse par bann aktivite enternasyonal avek pri enternasyonal.

Dezyenm pwen Mr Speaker, si Minis in permet mwan al lo la. Ti annan pou fer avek ki mannyer nou kapab konsey - donn konsey sa bann konsonmater dapre kestyon *MNA*.

Mr Speaker, i difisil. Dan sa bann ka koumsa nou bezwen pran li ka par ka. E konsey pour lemoman ki mon kapab donne se ganny kontak ek nou. E la

nou, nou ava fer ser ten lenvestigasyon kwa ki pe fer sa bann varyasyon dan bann *bill* kot bann zefor pe ganny mete kot i konsern *efficiency* avek lekonomizasyon.

Nou pare pou vini, ede baze lo letan ki nou annan, pour nou kapab ed sa bann konsonmater konpran akoz i annan sa bann varyasyon. Si pour mwan globaliz li i pou difisil akoz i pa - i spesifye baze lo ka par ka sa Mr Speaker. Mersi.

MR SPEAKER

Mersi. Bon, ti'n rekonnnet Onorab Roucou. Mon a pran son kestyon.

HON MICHEL ROUCOU

Mersi Mr Speaker. Bonn apre midi Minis, *PS*, *CEO*. Minis, kestyon pe koz lo kote lenstalasyon bann *meter*. Si *PUC* i annan plan, anvi ki nou war ki i annan bokou bann *meter* espesyalman delo, ki swa zot in ganny mete lo en propriete ki i pa pou *owner* sa *meter*? Ouswa sa *meter* i en landrwa ki vreman lwen avek sa lakour kot i sipoze pe deservi. Mersi.

MR SPEAKER

Mersi Onorab. Minis?

MINISTER
JOUBERT

Mersi Mr Speaker. Mon ava demann CEO pou pran sa repons silvouple.

FLAVIEN**MR SPEAKER**

CEO, wi?

CEO PUC JOEL VALMONT

Mersi Mr Speaker. Mr Speaker, i en legzersis kontinyel li osi sa lapros ki MNA Roucou pe demann nou. Nou demann serten fleksibilite ladan. Avan PUC ti vreman *rigid* lo la. Ozordi nou a pe akord en bon pe fleksibilite pour bann demann ki pe antre. Kot nou kapab fer li nou pe fer li.

En bon pe lo en kou parey Minis in eksplike ki pa dan nou lavantaz. Se pour sa rezon ki nou pa pe tay ek li konman en pli gran priyорite. Me selman nou pe akord sa fleksibilite bann kliyan. Mersi Mr Speaker.

MR SPEAKER

Mersi. Bon, mon a remersye Minis e son bann zofisyе pour zot partisipasyon. E mersi bann Manm pour zot kestyon. Nou a termin sesyon kestyon la. Mon swet tou bann zofisyе bon kouraz dan kontinyasyon zot

travay. Nou a pran poz e Lasanble a repran 2er. Mersi.

(BREAK)

MR SPEAKER

Bon apre midi tou dimoun. Nou travay ozordi apre midi nou al lo Mosyon. E premye Mosyon. Premye Mosyon i dan non Onorab Bernard Georges, *Leader of Government Business*. E i konsern *Supplementary Appropriation*. Mon ava envit Onorab Georges, pou met son Mosyon lo latab.

HON BERNARD GEORGES

Mersi Mr Speaker. Bon apre midi Mr Speaker. Bon apre midi tou bann koleg Onorab dan Lasanble. E tou bann dimoun ki pe swiv deba kot zot. Mr Speaker, mon Mosyon apre midi parey ou'n dir i en *Supplementary Appropriation Motion*. E i lir koumsa;

The National Assembly resolves to approve a supplementary estimate of SR 473,100,693.87 for the year 2024 laid before the Assembly in accordance with Article 154(6)(b) of the Constitution. Mersi Mr Speaker. Mon demann en bon samariten prezan pou segonn sa Mosyon. Mersi.

MR SPEAKER

Mersi. Mon apel pou segonnman sa Mosyon. Onorab Sandy Arissol.

HON SANDY ARISSOL

Bonn apre midi Mr Speaker. Bonn apre midi tou Manm. Anvi ki napa en bon samariten, mon koman Onorab Arissol MNA Elekte pou distrik Bel Ombre, mon ti a voudre segonn Mosyon prezante par Onorab Georges. Mersi bokou.

MR SPEAKER

Mersi Onorab. Nou aprezan envit Onorab Georges pou adres lo son Mosyon.

HON BERNARD GEORGES

Mersi Mr Speaker. Mr Speaker, parey ou'n dir e mon'n repete sa se en Mosyon pou en *Supplementary Appropriation*. Setadir en Bidze Siplementer. E dan son parol Mosyon li menm, i dir ki sa *estimate* in fini ganny *laid* devan Lasanble Nasyonal annakor avek nou Konstitisyon.

E annefe ki sa ti ganny fer ler Minis ti vin devan nou Lasanble enn de semenn pase, pou li prezant *Mid-Year Review*. E se annefe atraver sa *Mid-Year Review* ki sa Bidze Siplementer i ganny son plas.

Mr Speaker, nou'n toulstan dir ki en Lasanble i annan 3 rol prensipal, e annefe sa i leka nou annan en rol lezislatif, nou annan en rol *oversight* e nou annan en rol reprezentatif anver bann dimoun lo en nivo distrik. Oubyen lo en nivo nasyonal ki'n anvoy nou isi pou travay pou zot.

Me annefe i annan en 4eme rol e enn ki annan de fwa nou blyiye. Em se annefe rol prensipal en Lasanble, e sa se rol apropiyasyon akoz se Lasanble ki annan sel pouvwar dan en pei pou donn sa ladministrasyon an legzersis lotorite pou li depans larzan ki apartenir a Gouvernman.

E dan sa konteks, Gouvernman se sa 3 brans an antye Egzekitif li menm, Lasanble ek Zidisyer. E sa ki nou pe fer ler nou pe pas en Bidze se donn permision a sa ladministrasyon, sa brans Egzekitif pou li servi larzan ki pou Gouvernman dan en serten fason oubyen dan en lot fason.

E sa rol apropiyasyon in ganny dekrir dan plizyer landrwa koman rol prensipal en Lasanble Nasyonal, akoz san sa naryen pa pou marse dan pei.

Alor, nou apre midi anmezir ki nou pe antre lo sa Mosyon siplementer mon

demann avek you bann Manm, e mon sir ki deza zot in pran konsyans sa gran devwar ki nou annan pou nou apropriy larzan, donn permision en ladministrasyon pou depans larzan ki in kolekte dan en serten fason oubyen dan en lot.

Bidze - en Bidze en pei Mr Speaker, parey Minis Finans in dir nou ler i ti prezant son *Mid-Year Review*, i en legzersis aproksimatif zanmen en Bidze i egzakt. Toultan en Bidze se en lide, en lenpresyon lo ki kantite larzan ou pou anmase, kantite larzan ou pou depanse.

Me i annan en previzibilite ki arive dan lavi en dimoun oubyen dan lavi en nasyon ki fer ki annan de fwa ou depans en pe plis, oubyen ou pa anmas otan, oubyen ou depans en pe mwens ki ou ti'n prevwar.

E pou sa rezon ki en Bidze i dinamik, e annan de fwa i arive dan en lakour koman dan en pei, kot enn sa bann keksoz ki pa'n prevwar i arive e ou bezwen depans en pe plis oubyen ou'n fer en *saving*. E ler ou bezwen plis larzan ki Lasanble in donn ou lotorite pou ou depanse, ou bezwen koman en ladministrasyon retourn devan Lasanble pou demann li permision pou

depans en pe plis ki sa ki i ti'n otorize.

E sa devwar pou vin devan Lasanble lo lapar ladministrasyon, i tonm lo sa lofis ki mwan mon reprezante antan ki reprezantan ladministrasyon dan sa Lasanble Nasyonal.

Parey a sak fwa ki nou fer sa legzersis Mr Speaker, nou bezwen osi konsyan ki nou Konstitisyon li menm i realize ki en Bidze i dinamik i en aproksimatif.

E atraver Lartik 154 nou Konstitisyon, nou Konstitisyon li menm i donn pouvwar a en Gouvernman, en ladministrasyon vin devan Lasanble e demann en *adjustment* dan Bidze. E i donn lotorite Lasanble Nasyonal pou fer sa *adjustment*. E sa parey nou konnen e nou repete sak fwa ki i annan en Bidze Siplementer ki vin devan nou, i ganny fer swa ava ki Gouvernman ki Ladministrasyon i depans sa larzan.

Oubyen annan de fwa pou bann rezon irzan i depanse me i bezwen vin devan Lasanble Nasyonal pou demann avek Lasanble otoriz li par eleve pou depans sa larzan ki in deza depanse. E nou vwar atraver

lafason ki sa Mosyon i ganny ekrir, lekel ant sa 2 opsyon ki nou pe al ladan.

Anba Lartik 154(6)(a) se avan ou depanse, e anba Lartik 154(6)(b) se apre ki en depans in ganny e ladministrasyon i vin devan Lasanble pou demann Lasanble enterim sa ki in fer e donn li en permision retrospektiv pou sa depans, sa i absoliman esansyel.

Akoz parey mon'n dir se zis Lasanble ki annan lotorite pou dir avek Gouvernman pou depans en larzan e dan ki fason i pou depans sa larzan. Sa se nou rol prensipal.

E en dernyen parol Mr Speaker, avan ki mon al lo detay sa *Supplementary Appropriation*. Parey in pratik dan nou Lasanble, nou debat lo Mosyon e donk apre midi bann Manm i ava koz an faver oubyen kont. I ava fer sorti zot pwen zot konsern, zot sipor *whatever* sa se sak Manm ki ava deside.

Me deba pou ganny fer lo Mosyon. Lannen prosenn nou pou bezwen anmenn en *Bill* devan sa Lasanble Nasyonal ki pou fer ki sa ki nou deside apre midi, sa lotorite ki nou donn avek Gouvernman ozordi i ganny pase dan form si ou form en Lalwa. E sa parey nou Konstitisyon i *provide*, i pou

ganny fer dan lannen ki swiv sa lannen dan lekel lapropriyasyon i ganny fer.

E sa lapropriyasyon ki nou pe fer sa lannen, i pou sa lannen li menm. I pou en *excess* depans pou lannen 2024. Mosyon in *frame* anba Lartik 154(6)(b) setadir akoz depans in fini ganny fer. Annefe sa pa absoliman egzakt, serten sa bann depans in fini ganny fer dot pou ganny fer.

Me pour ki nou ouver avek Lasanble, avek Lepep Seselwa mon'n fraz sa Mosyon anba (b) akoz i pa ti pou byen pou fraz li anba (a) e pou fer krwar ki tou sa bann depans pa ankor ganny fer ler serten in deza ganny fer. Alor, mon'n santi li mon devwar pou an tout louvertir pou fraz li anba (b), kantmenm serten sa bann depans pa ankor ganny fer e i ava ganny fer apre ki Lasanble i donn son lotorizasyon apre midi.

Mr Speaker, parey sa Mosyon i dir, sa *Supplementary Appropriation* i pou en sonm R 473 milyon apepre. Me parey Minis in fer resorti dan son *Mid-Year Review*, e parey bann Manm i ava vvar lo sa *Supplementary Budget Appropriation spreadsheet* ki'n ganny sirkile, en depans siplemanter R473 milyon nou

pe ganny demande pou aprouve.

Me kont sa Gouvernman in fer en *saving* R453 milyon pou bann rezon ki aparet lo sa menm *spreadsheet*. Ki fer ki sa sonm an plis ki Bidze lannen pase ki avek permision Lasanble Gouvernman pou kapab depanse i vin zi par anba R20 milyon. Annefe R19 milyon, 780 mil e detrwa sou. Donk, sa sonm li menm *the net figure* i bokou pli ba ki sa 473.

Me parey nou Konstitisyon i egzize, nou pa kapab vin devan Lasanble e demann Lasanble permision pou zis sa sonm ant sa 2. Nou bezwen akoz Konstitisyon i demann nou vin devan Lasanble e demann permision pou *the whole overspending*. Setadir 473 milyon non pa zis sa diferans ant *spending* avek *savings*. Akoz nou rol se otoriz *excess spending*, sa se nou rol.

Nou rol se pa pou otoriz *savings*. *Savings* sa R453 milyon i ava ganny dil avek anba en Lalwa ki nou menm nou, nou'n aprouve isi *Public Finance Management Act* ki permet avek Minis Finans e Gouvernman pou fer *saving* e pou apropiy sa *savings* attraver *virement* eksatera pou bann lezot bezwen.

Donk, mon anvi fer kler ki kantmenm nou pe demann lotorizasyon pou en *excess expenditure* R473 milyon annefe *the net expenditure* i ava zis par anba R20 milyon.

Avek sa detrwa parol lentrodiksyon Mr Speaker, permet mon preznan pou pas an revi bann detay sa ki mannyer sa sonm R473 milyon i arive. E zot ava eskiz mwan, akoz sa *spreadsheet* i en pti pe ptipti, me zot tou zot annan.

E mon ava pas atraver bann *heads of expenditure* ki fer sa R473 milyon. E mon a sey fer li dan en fason ase vit. E pou bann Manm ki pe swiv lo sa *spreadsheet*, zot ava vwar ki i annan plizyer *columns*.

Dan 2enn kolonn se non sa *MDA* ki pe depans sa larzan. Dan 3enm kolonn se sa sonm ki pe ganny depanse. Dan 4enm kolonn sa se sa sonm ki pe ganny *saved*. Sa se sa *savings*, e ler zot regard lo dernyen paz zot ava vwar dan milye dernyen paz sa anba *grand total* 473 milyon ekek *approved supplementary* e 453 se *savings*.

E son *sub total* i 19 milyon 780 mil. Donk, parey mon dir Mr Speaker, e avek ou permision mon a pas briyevman lo bann *heads*.

1.Se Departman

Defans ki pe depans R3.9 milyon an plis pou pey gratwite bann Solda, *scheme of service*, pou *Brass Band* ek bann *staff kitchen* larme.

2.Se Zidisyer, ki pe appropri en sonm R765 mil pou 2 novo *post* ki'n ganny kree. E pou trezyenm mwan saler ki i bezwen peye avek sa 2 novo *staff*.

3.Se Minister Lapes.

E li i en sonm R3.79 milyon ki ganny kase an 2. Enn Departman Lekonomi Ble e dezyenmman Departman Lapes li menm. E sa sonm zot ava revwar li, sa sonm R3.7 milyon se akoz zot ava revwar li lo menm paz anba Minister Ledikasyon menm sonm i en *savings* laba se akiz Minister Lapes in transfer avek Minister Ledikasyon, *Seychelles Maritime Academy*.

Donk, ou eskiz mwan oubyen. Eskiz mwan Mr Speaker, wi se sa transfer. Donk, i zis en transfer Bidze e i pa en transfer larzan.

Lo dezyenm paz *National Bureau of Statistics* R1 milyon, 100 mil pou lapey en novo *CEO* parey nou'n aprann dan nouvel. Nou'n bezwen *recruit* en novo *CEO*, e i en *CEO* ki en etranze. E donk nou

bezwen prevwar en novo lapey pou li.

Pandan ki nou lo sa paz, mon ava zis koz en pti pe lo *savings*, akoz mon konnen taler sa size i riske monte. Zot ava vwar lo sa menm paz i annan en kantite *savings* anba plizyer MDAs, tousala i annan pou fer avel *delay* dan rekritman *staff* ki'n ti'n ganny bidzete me pa'n ganny *recruit* alor sa se en *claw back* ki Minister Finans in kapab fer. E en *savings* larzan ki ava utilize parey mon dir anba *Public Finance Management Act* pou lezot depans.

Lo trwazyenm paz nou vwar anba SFRSA en sonm R2 milyon. E sa pou pey *overtime* bann travayer *Fire Brigade (SFRSA)* Praslin avek La Digue sirtou. Pa Mahe, me zis pou sa 2 zil. Apre sa ou annan lo menm paz, en pti sonm R147 mil pou *Seychelles Home Care Agency*. La pou pey en *staff* ki'n ganny rekrite sorti kot Lazans Proteksyon Sosyal.

Lo 4enm paz Mr Speaker, i annan plizyer, i annan plizyer *heads*. Premye se Lofis Prezidan li menm e la i annan en sonm 6 milyon, sorry R4 milyon 446 mil ki pe ganny apropriye pou 2 rezon prensipal. Enn se pou *consumables* ki'n bezwen peye

pou enn de bann levennman ki pa ti'n ganny prevwar.

E dezyenmman i annan en rediksyon dan *cost car hire* signifikan, akoz Lofis Prezidan in prefere olye kontinyelman lwe loto, aste transpor pou deservi sa lofis. E mon profit sa lokazyon poudir ki o tan ki posib se bann transpor segonnman ki'n ganny aste. E Prezidan li menm li i mars dan en transpor ki'n ganny aste, me ki pa en transpor nef i en transpor *second hand*.

Next Departman Zafer Legal, li i pe rod en sonm R1.1 milyon pou pey bann konsiltan ki travay dan Biro Attorney Zeneral pou ed *Anti-Corruption Commission*.

Departman Defans i pe apropriye en sonm pli gran sonm *in fact* dan sa *Supplementary Appropriation* R27 milyon, R27 edmi milyon apepre pou plizyer rezon. Enn se *dry looking Sala de Mala* ki'n kout en bon pe larzan, bezwen al fer sa aletranze.

Aircraft maintenance, bann avyon ki *Air Force* i annan i kout bokou pou *Maintain*. E annefe, i ti devret kout bokou plis ankor. Me zot in kapab fer en *saving* olye ranplas serten lekipman. Sa bann lekipman in kapab ganny repare, e zis en

propeller ki'n bezwen ganny ranplase pou le moman. Me selman sa bann depans pou vini dan en lot lannen.

Apre i annan en kantite larzan ki'n ganny depanse avek elektrisite ler bato i dan Por zot *hookup* avek *supply PUC* pou zot elektrisite abor. E sa i kout en kantite larzan, epi in annan 4 veikil ki'n ganny aste pou en sonm R2.5 milyon. E la ankor se bann veikil dezyenmmen e non pa bann veikil nouvo.

Anba *DICT* i en sonm pou *ID Cards*. E sa se en sonm ki tou le-z-an akoz *ID Card* i ganny se bann *ID Card* plastik ki ganny donnen avek bann *GOP holders*. E an mezir ki i annan plis travayer etranze annan de fwa Bidze pa sifilan pou aste bann *ID Card*.

Me la parey nou tou nou konnen avek sa *CID* ki *CID* ki'n ganny en entrodwir i ava annan en *saving* dan lefitir, akoz sa bann kart plastik pa pou bezwen ganny aste pou bann *GOP holders*. Akoz zot pou annan li lo en sistem elektronik e evantyelman nou tou nou pou annan menm fasilitate.

Zidisyer pe apropriy en sonm R2.5 milyon parey bann *remarks* i dir pou fon adisyonnal, pou lokasyon ki

nou'n bezwen peye pou bann lakour, bann Lakour ek Lakour bann Ziz akoz zot annan en *housing allowance* e lasirans medikal pou zot bann Ziz fer zot *checkup*.

Nou menm nou Lezislatir Mr Speaker, parey tou le-z-an nou, nou fer gran laprev lekonomi. E nou ep demann zis R878 mil pou bann *computer ganny loaded* avek en novo sistenm *Microsoft 365*. E i annan en kou avek sa, me nou tou nou benefisyé atraver sa novo sistenm.

Minister Lapes nou retourn lo la, Departman *Fisheries* parey nou ti dir taler, li osi son sonm i ase gro o R20 milyon ki i pe demande e sa i annan pou fer avek sa transfer *Seychelles Maritime Academy* son vot *goods and services*. Taler ti son vot saler, la son vot *goods and services* ek fon pou sa proze *Swiofish* ki nou tou nou okouran.

Minister Zafer Entern, li in bezwen aste pou Servis Prizon e pou Servis Lapolis bann veikil dezyenmmen ankor, akoz lwe sa bann veikil E nou'n aprann ki sirtou prizon ti pe lwe bann van par egzant pou transport prizonnyen ki lo rimann pou vin Ankour and back. E sa a en sonm konsiderab, ki annas tan

3 transpor segonnmen sa sonm ki ti pe ganny peye pou *rental* i kapab ganny abzorbe dan zis detrwa mwan par aste sa bann veikil.

E sa se en keksoz ki Gouvernman pe fer otan ki posib, pou redwir kou avek veikil lwe. E pou annan zot prop veikil, e ler napa sifizaman larzan parey i leka la nou al lo bann bon *second hand instead of* bann veikil nef.

Lo prosen paz, nou vwar ki Minister Gouvernman Lokal ek Zafer Kominoter pe demann R2 milyon pou travay *emergency* ki'n bezwen ganny pran dan bann distrik swivan bann dezas isi e la ki pa ti'n ganny prewar.

Minister Lagrikiltir e Sanzman Klima ek Lanvironnman, li i pe demann R2.6 milyon anba Departman Lagrikiltir pou *livestock support*, akoz parey zot konnen i annan en sibvansyon ki ganny fer e anba *Climate Change* i annan en *foreign exchange adjustment* ki'n bezwen ganny fer ,akoz i annan ler nou ganny bann *Grants Project* parey nou konnen e nou vwar sa toule-z-an dan en Bidze pou sa lannen, pou nenport ki lannen.

Sa *Grant* ki toultan an *foreign exchange* i ganny met

dan Bidze lo an roupi, lo en *exchange rate* ki aplikab a sa moman. E pli tar ler i ganny depanse annan de fwa i annan en friktyasyon, e sa se egzakteman sa ki'n arive la.

Minister Lazenes Spor ek Lafanmir pe demann R616 mil pou bann fon adisyonnel ki'n ganny mete, bann kontra sekirite pou *cleaning maintenance* e pou netwayaz reparasyon sa 9 *Elderly Homes* ki annan dan pei.

National Tender Board li i pe demann R170 mil, akoz pou pey *rent* akoz i pa'n kapab bouze sorti la kot i ti ete parey i ti ekspekte. E in *over hold* en pe. Alor, sa Bidze ki i ti'n ganny a lwe pou lokasyon in monte.

SQA, *Seychelles Qualification Authority* li osi menm zafer. Rent R2 milyon pe demande. 1.8 milyon pou *rent* e R200 ekek mil pou *subsistence allowance* DSA pou bann zofisyel zot vwayaze ant bann zil isi Sesel.

Lotorite Plan *Planning Authority* pe demann R1 milyon 400 mil, pou premyerman netwayaz *Archives*, ankor enn fwa akizisyon bann veikil parey mon'n mansyonnen taler e sa nou vvar sa en pe partou ek enn de pti travay partisyon avek

consultancy, ki zot in bezwen antreprann.

Komisyon Ant-Koripsyon li i pe demann R2 milyon akoz pou peyman bann *invoice* ki in gannyen avek bann avoka ki travay pou li e ki'n arive en pe an retar.

SMSA pe demann R1.7 milyon pou fon, pou aste 2 *pick up* ki zot in aste 1 pou Mahe ek 1 pou Praslin apre ki sa ki ti la avan ti'n *write-off*.

Lo prosen paz Mr Speaker, SLTA li i pe demann R 8milyon pou son programm *upgrade* semen parey nou vvar i annan en kantite semen ki pe ganny *upgrade* en pe partou.

E pou sa programm i pe demann sa sonm larzan an partikilye pou ranplas bann *crash barrier* en pe partou ki veikil i tonm ladan e i kraze, pou aste koltar pou son programm *upgrade* ek pou *asphalt* serten sa bann semen.

Health Care Agency pe demann R5.8 milyon li pou peyman *bill* elektrisite ki'n mont pli o ki sa ki ti'n ganny prevwar pou Lopital Viktorya e bann *health centers* en pe partou dan lakominote.

NCC R440 mil pou aste en veikil pou loperasyon sa Konsey.

Social Workers Council R 70 mil pou peyman lokasyon ki zot dwa avek Seychelles Pension Fund.

Leritaz Lenstiti Nasyonal pou Kiltir, Leritaz ek Lar pe demann R3.3 milyon premyerman pou *rent* pou Lakademi Kreol, ki parey nou konnen i pa dan son letablisman Au Cap. Me in bezwen lwe landrwa isi anvil, e pou pey en defisit dan konsonmasyon elektriske kot *National Library*.

Departman Defans, anba *capital projects* la nou pe pase. Anba *capital projects* Departman Defans pe demann R1.1 milyon aepre pou fer en lasose ki pe fer, me ki i annan en *shortfall*, dan son konstriksyon ou dan son Bidze. E pou *upgrade* sistem radar, akoz ankor enn fwa en fliktrasyon dan *foreign exchange*.

Zidisyer ankor anba *capital projects* pe demann R631 pou fer en pe travay dan *attic* zot *building Palais De Justice, Ile Du Port*. E pou nesesite ki zot annan.

Komision Elektoral pe demann R868 mil, pou *cost re lokasyon ler* zot in sorti dan zot batiman ki zot ti pe lwe anvil pou al dan sa *steel framed*

building ki Minister Ledikasyon in pret zot Mont Fleuri.

Minister Later avek Labita lo paz 7, li i pe demann R281 mil pou plizyer pti proze. Premyerman tousala i annan pou fer avek *fluctuation* dan *exchange rate*. Tousala se bann *Grant Projects* ki'n ganny antreprann Cap Bonm Zan, Beoliere e *ex Ferrari building*; sorry *ex Ferrari* pou akoz ti annan en fliktrasyon dan *foreign exchange* ant sa ki ti'n ganny bidzete ek sa ki'n ganny depanse zot pe demann kouvertir parey mon fek eksprimen.

Minister Transpor pe demann R2.1 milyon pou annan pou fer avek proze *West Coast Road Project*, pou pey en konponan lokal, ki zot bezwen ki tonm lo nou apre ki lamazorite i ganny *fund* parey nou konnen par en *Grant eksteryer*. E ankor enn fwa i annan en pou sa menm rezon i annan en fliktrasyon dan *foreign exchange*, alor zot bezwen kouver sa sanzman ki'n arrive.

Mr Speaker, mon ankor annan zis 2 paz, nou pe arriv ver lafen. *SFRSA* ankor pe demann R1 milyon, 100 mil pou travay *maintenance* ki zot in fer. Zot in bezwen fer *soakaway* Anse

Royale lo zot novo fasilite. E osi en miray *boundary wall* kot stasyon dife, stasyon SFRSA Praslin.

LWMA pe demann R1.6 milyon pou azout avek fon ki deza annan anba en *foreign loan* pou en proze ki i pe fer.

SBC pe demann R23 milyon li 2enm pli larz sonm ki pe ganny apropriye apre midi. li pou SBC *Broadcast House* parey nou konnen in bezwen bouze e vin la. E ankor enn fwa in annan anba sa *foreign Grant* ki in gannyen, in bezwen trouv 10 poursan pou sa sonm pou pey kou final pou *completion* pou finisyon sa proze.

SPTC R5 milyon pou konsesyon pou ed li avek bann konsesyon ki i donnen avek bann dimoun, bann pansyoner, bann dimoun ki annan dezabilite ek bann travayer spesyal.

Petrol Seychelles pe demann R3 milyon, 300 mil pou ed li avek son bann depans operasyonnel zeneral.

E lo dernyen paz, en sonm R25 milyon parey nou'n vwar li i pou en proze pou pey en *capital subscription* ki nou'n bezwen fer avek *African Development Bank*.

E PUC R2.9 milyon pou bann proze kapital ki li i pe fer.

Donk, Mr Speaker, tousala i anmenn nou a sa sonm R473 milyon ekek ki ladministrasyon in bezwen prevwar, ou pou bezwen prevwar pou sa 2 mwan ki pe vini pou konplet travay lo tou sa ban keksoz ki mon fek antimere.

Parey mon'n dir, Gouvernman kantmenm sa in arive kapab fer *savings* R453 milyon ki fer ki *the total net expenditure* i pou R19 milyon 780 mil. Mr Speaker, mon pou aret la. Mon ava remersi ou avek tou bann koleg Onorab pou zot latansyon. E mon espere ki atraver sa leksplikasyon ki mon'n donne la apre midi, nou a kapab trouv en fason pou nou vot sa Bidze Siplementer pou ki Gouvernman i a kapab kontinyen son travay ziska lafen sa lannen. Mon remersye ou Mr Speaker.

MR SPEAKER

Mersi Onorab Georges. Onorab Arissol, ou anvi pran laparol la koman segonder Mosyon? Apre, lev ou lanmen silvouple ler in ariv ler pou ou pran laparol. Lezot Manm ki oule entervenir. Ok, Onorab Arissol ou'n pare si ou'n pare pou kapab adresse.

HON SANDY ARISSOL

Wi, mersi Mr Speaker. Bonn apre midi tou bann dimoun ki pe ekoute, nou bann Manm Lasanble Nasyonal. Mr Speaker, mon ti a kontan komans lo laliny ki Onorab Georges in dir letan in koz lo lakantite larzan in ganny depanse oubyen depans in fini ganny fer.

E letan mon lo depans in fini ganny fer, mon ti a kontan kekfwa letan mon pe koz lo bann depans, profite pou mwan remersye bann lazans. Par egzant i annan en kantite bann lazans, bann Minister ki ganny mansyonnen ki Onorab Georges in pas ladan, avek bann larzan ki'n depanse oubyen bann larzan ki'n tonm dan *savings* parey nou dir.

Mon ti a kontan mwan profite koman MNA Elekte Distrik Bel Ombre remersye bann lazans pou travay ki zot in fer lo nivo mon distrik. E nou dan 3enm kar lannen e byento nou pou al dan Bidze pei, pou nou zisteman kapab vot ankor Bidze pou nou ganny ankor finansman, pou ki nou distrik sakenn de nou oubyen kot nou travay dan Gouvernman nou ganny en Bidze pou nou kapab fer sa ki nou swete anvi fer.

E mwan lo kote distrik Mr Speaker, ankor enn fwa mon ti ava dir mon ti a kontan remersi tou bann lazans ki ed nou dan sa travay ki nou pe fer ozordi e sirtou mwan lo nivo distrik, pou asire ki resours ki mon vote dan Bidze larzan ki mon gannyen menm parfwa i pa ase, me nou gannyen pou nou servi pou ki nou de nou distrik kapab epanouir.

E nou bann dimoun ki ganny sa bann servis sa bann distrik, zot osi zot kapab war en sanzman an relasyon avek bann keksoz ki pase dan distrik Mr Speaker.

Menm bann Minister oubyen bann lazans ki nou dil avek, avek mwens resours ki zot annan, zot nobou sey zot mye pou zot kapab antreprann serten bann proze dan nou distrik.

Par egzant si mon al mansyonn detrwa proze, letan mon'n vwar dan sa lalis ki Onorab Georges in mansyonnen, i annan Minister Lakaz. Par egzant, ozordi letan mon pe koze Mr Speaker mon annan Bel Ombre nou'n ganny nou 3 proze lakaz ki'n ganny fer, anba larzan ki'n fini ganny depanse oubyen atraver Bidze ki zot ti gannyen.

E letan nou'n fer 3 proze lakaz dan distrik Bel Ombre, sa in fer ki nou'n kapab asiste 160 zabitant Bel Ombre. Letan nou pe koz 4 dimoun par egzamp par en blok flat, 1 manman, 1 papa, 2 zanfan.

E menm nou annan en sityasyon nou annan 1 papa ek son 3 zanfan, oubyen nou annan manman ki annan 3 zanfan. So, nou pe koz 4 dimoun. Sa in fer ki nou'n kapab asiste nou 160 zabitant ozordi dan distrik Bel Ombre atraver bann proze dan nou distrik.

Letan nou pe koze la byento, nou pou annan nou Bel Ombre nou pou annan nou en novo *DAs Office, ground plus 1* ki an konstriksyon, ki sipoze fini boner Avril lannen prosen si tou keksoz ki al byen avek sa demaraz ki zot in komanse. E nou Bel Ombre nou annan en proze *condominium* ki nou'n fini vvar teren.

Nou annan an negosyasyon avek Minister Labita zisteman pou get tou bann lezot lozistik. En fason ki Bel Ombre nou bouz lo en lot nivo apart bann *social housing*, nou osi annan sa ki nou apel bann *semi condo* pou nou kapab antreprann en lot group

zabitant dan nou distrik Mr Speaker.

Letan nou pe koze an relasyon avek bann proze dan mon distrik, letan tou bann bato lwazir ozordi, ki in dan basen dan distrik Bel Ombre pou ki zot bann kliyan i ganny bann ekskirsyon, zot annan sa ki nou apel nou'n fer en pti langar pou zot. Parski dan lepase bann kliyan ti lapli, loraz, zekler zot ti napa en landrwa *fixed* pou zot kapab anmas zot bann kliyan.

Me la ozordi bann kliyan zot annan en pti landrwa apropriye pou zot esper zot bato ekskirsyon enkli en facilite *toilette* ki prop e a zot dispozisyon toultan.

Mr Speaker, ozordi Bel Ombre nou annan nou en pti *library* ki nou'n fer pou nou bann zenn, pou nou bann zanfan. E letan nou pe koz tou bann lezot proze, nou annan semen, nou annan proze semen.

Letan mon pe get *SLTA* an relasyon avek larzan ki zot in depanse, ozordi nou'n kapab re sirfas en pe bann semen dan distrik Bel Ombre. Me selman parey mon war i annan larzan *in regard to road marking* sa mon krwar i enportan, ki nou ankor pe swete ki avek bann

travay ki *PUC* i ava terminen byento.

Nou ava kapab osi antreprann bann *road markings* ki nou bezwen dan nou distrik. Sirtou san relasyon avek bann *speed bump* ki annan, ki parfwa i kre bann kontrent pou bann drayver. Parski nou napa en *proper markings* lo la.

Mr Speaker, be nou osi annan bann proze kot nou'n kapab kolekte bann dimoun avek zot lakour, avek bann pti proze semen ki nou'n fer. E nou annan sa zoli proze ki nou'n re aranze dan en fason en pe pli byen. Sa se sa semen ki sorti dan vale Le Niole, ki konekte avek Beau Belle.

Kot nou'n kapab re aranz bann *steps*, met *railing*. E la byento nou'n fini met poto elektrik nou pe esper zis kab avek *PUC*, pou nou kapab alim li asar ler ou pou vini *Fisherman's Cove* oubyen *H Hotel*, anba ou pou war en zoli lalimyer ki konnekte Le Niole avek Beau Belle.

E sa nou'n fer parske letan dezas ti montre nou poudir semen i bloke Le Niole, me tou bann dimoun Le Niole ti napa en lot fason desann pou zot zwenn avek lapas oubyen dan Bel Ombre Santral. Nou'n fer sa

parski nou ti santi poudir i annan en nesesite.

E letan mon get pou Minister Ledikasyon par egzanp, an relasyon avek Beau Vallon Primer, i ava enportan Mr Speaker pou note pou bann dimoun ki reste Cameroon sirtou.

Sa ki nou apel deryer *Shell* Beau Vallon, zot a remarque larantre sa semen ki anmenn larantre Beau Vallon Segonder o bor garaz Mr Waye Hive la, nou'n agrandi sa semen pou sekirite bann zanfan, sirtou bann zanfan primer ki pa neseserman annan en landrwa pase pou zot al kot lekol Beau Vallon Primer.

En keksoz ki nou ankor pe negosye avek SIA - tou bann lezot lazans enkli Minister Ledikasyon, pou ki Beau Vallon primer zot osi zot annan en proper larantre ki tou bann zanfan i kapab servi.

Ki bann paran i kapab anmenn zot bann zanfan en pe pli pre san servi larantre Beau Vallon Segonder. Me pou zot kapab an menm tan osi pou rezon sekirite si zanmen i annan en dife, pou ki Beau Vallon Primer zot osi zot annan zot prop larantre. E zot osi zot fason sorti an ka i ariv bann dezas.

Mr Speaker, sa i en pti pe en revi lo enn de bann keksoz ki nou annan dan nou distrik. I annan en kantite lezot bann proze atraver bann lazan ki'n ganny depanse parey Onorab Georges in fer resorti atraver tou bann led ki nou gannyen avek bann Minister.

Par egzanp letan mon get *SPTC*, letan Gouvernman i asire ki *SPTC* i ganny serten larzan mon pou bezwen apresye servis ki nou gannyen avek *SPTC*.

Parski nou napa okenn konplent parski mon krwar distrik Bel Ombre i enn bann distrik ki preski tou le 30 minit nou annan en servis bis ki vin rann lapel *La Scala*, kot nou bis i vire apre i re anmas bann dimoun i desann.

Me sel defi ki nou gannyen lo kote *SPTC*, letan mon pe get li i lo lalis li osi se an relasyon avek sa dernyen servis bis ki vini parske tou dimoun i konplent i pa vir *La Scala* Mr Speaker, me i vir kot Ladministrasyon Distrik.

Parske parey nou tou nou konnen *La Scala* son *parking* i en pe limite. E sa bann ler apre 6er zot ganny zot kliyan e *parking* i plen e bann gran bis ki monte zot ganny en pe difikilte pou zot vire. So, mon mazinen dousman, dousman

avek bann lezot mwayen ki nou a kapab gete letan tou bann lazans i zwenn ansanm, pou nou kapab sey rode ki mannyer nou *mitigate* sa problem pou ki napa konplent konsernan nou bann zabitan.

Me par kont, letan nou pe koz kot bis Bel Ombre i kite anvil santral anba langar *SPTC* isi anvil, nou annan en konplent *in regards* kot nou bann dimoun i asize pou espere pou *SPTC* kapab letan zot ganny bann sibvansyon avek Gouvernman zot ganny en pe larzan, pou zot osi revwar lafason kot bann dimoun i asize sirtou bann zabitan Bel Ombre.

Kot zot asize sa kouvertir pa neseserman i ed zot, parski lapli, loraz, zekler, soley zot la. E sa bout i paret i pa ganny kouver konpare avek bann lezot distrik, ki mon krwar i enportan letan Bidze pe vini la, letan nou annan diskisyon avek *SPTC* pou nou gete ki mannyer konfor nou bann dimoun, sirtou bann spesyalman bann zoli dimoun ki sorti dan distrik Bel Ombre zot gannyen sa konfor ki letan tou bann lezot keksoz i vin avek.

E dernyen lo *SPTC* Mr Speaker, ki mon ti a kontan adrese, letan nou pe get bann larzan ki'n ganny depanse;

letan nou pe get Bidze ki a pe vini byento avek *Mid-Year Review* ki la devan nou, se en konsern par nou bann dimoun aze.

Dimoun aze zot dir ek ou poudir anvi ki zot pa neseserman pey bis parey nou dir, me zot montre zot kart idantite. Zot ganny difikilte par fwa pou anbark dan sa bis ki fer letour, ki nou apel sa bis 8er edmi ki fer letour ki sorti anvil, i vin par Bel Ombre Dan Zil, apre i fer letour par Glacis.

Parski zot senpleman zot bann dimoun aze, alor drayver parfwa i refiz zot parske zot sipoze pa peye. Me parfwa zot vwar difikilte letan zot in anmenn enn zot msye oubyen zot madanm aze kot Sant Lasante Larivyer Anglez, akoz pou nou dan nor i pa ouver ziska tar. Alor, zot profit lo sa bis ki fer letour, me souvandfwa zot ganny difikilte.

So, nou pe swete ki atraver tou sa bann negosyasyon ki nou fer, pou ki SPTC osi i ava an konsiltasyon avek Lotorite tou bann lotorite, tou bann lotorite konsernen pou asire ki tou bann dimoun ki bezwen sa servis SPTC zot ganny li menm avek son kou ki vini. Me zot ganny sa servis san ki serten ant zot i ganny refize.

Mr Speaker, letan mon'n al lo SPTC mon'n osi war PUC lo lalis ki Onorab Georges papye ki nou'n gannyen pou bann larzan ki zot gannyen par egzanp PUC. E bomaten CEO PUC ti dan Lasanble Nasional, in koz an relasyon avek plizyer lezot servis oubyen bann difikilte ki zot fer fas avek.

Me sel pti konplent ki nou annan konsernan PUC, kekfwa letan nou get bann larzan ki zot gannyen zot osi pou bann servis, bann loans ki zot gannyen avek Gouvernman se mon krwar i annan en travay ki pe ganny fer *in regards to STP*.

STP ozordi i en konsern mazer dan tou bann distrik e Bel Ombre nou, nou pa en leksepsyon, pou nou kapab konekte tou bann lakour sirtou bann lakour ki'n egziste pandan plizyer lannen. E zot sistem in en pe *overflow* - in fatige, pou nou konnekte zot avek *main* laliny ki kapab ed zot en pe sirtou letan pe koz lo STP mon mazin bann dimoun ki reste Canada par egzanp.

Dan mon distrik i annan enn 2 bann pei etranze ki dan nou distrik ou pa bezwen *visa* oubyen avyon pou ale. E Canada i enn bann ki mon *share* avek Onorab Hoareau pou Beau Vallon. So, i annan

en konsern e nou ekspekte ki *PUC* atraver resours ki zot gannyen.

E mon konnen resours i pa neseserman ase - ki nou kapab konnekte tou bann dimoun avek en sistenm *STP* parske Bel Ombre premyerman nou en distrik ki ganny bokou delo, bokou lapli.

Nou en distrik touristik e apre nou en distrik kot nou bann dimoun i kontan plante. E alor nou swete ki tou sa bann demars Mr Speaker, atraver bann resours ki Gouvernman i vwar pou donn tou bann lazans, sa i ava fer ki i re koul lo nou distrik parske i vin en soutyen pou nou bann dimoun ki zisteman zot bezwen sa servis.

Mr Speaker, letan mon'n pas lo dokiman ki Onorab Georges in pas lo la avek Lasanble Nasyonal, mon ti a kontan met enn de konsern devan an relasyon avek sa Mosyon ki'n ganny anmennen.

Par egzant letan mon pe get tou bann Minister, e letan nou pe koz finans, nou pe get depans zot ava rapel poudir Minister Finans li menm li ti promet nou en travay ki zot pe fer an relasyon avek *salary review* zisteman dan sa bann Minister ki nou'n pas lo la.

E mon swete ki la Bidze pe vini, e atraver bann travay ki zot pe fer zot a kapab to ou tar donn nou en keksoz an relasyon avek *salary package*, *salary review* ki zot ti pe fer pou tou bann dimoun ki tonm dan sa Minister.

Parske souvandfwa sa bann Minister se zot ki enplimant bann proze dan mon distrik. E souvandfwa, nou osi bezwen letan nou pe get depans ki zot pe fer, atraver zot biro nou osi kapab ganny en keksoz atraver Minister Finans an relasyon avek sa.

E souvandfwa i bann dimoun ki'n travay en kantite lannen dan sa bann departman ki ed mwan lo kote mon distrik, an relasyon avek bann proze oubyen bann keksoz ki nou, nou demande koman Lotorite distrik.

Dezyenmman ki mon ti a kontan koz lo la Mr Speaker, se konsernan Polisi. Ou konnen souvandfwa Sesel nou ganny nou bann donasyon ki nou gannyen avek bann pei zanmi. par egzant Militer souvandfwa ou tande nou'n ganny en avyon, swa nou'n ganny en bato, swa i annan kek lekipman ou en transpor ki nou'n gannyen pou later.

Me souvandfwa sa bann lekipman nou ganny li pou naryen, apre nou vwar ki sanmenm sa bann lekipman ki pe kout nou bokou pli ser, parski nou bezwen *Maintain*.

E souvandfwa sa bann *maintenance* i retourn dan sa pei donater pou nou al fer sa bann *maintenance*. E letan ou asize parfwa ou regarde poudir bann depans ki kekfwa ou'n fer avek bann *maintenance*, pou sa transpor ki ou'n ganny donasyon.

Si nou ti'n aste li nou menm oubyen si nou ti'n ganny li, nou ti'n aste li nou menm kekfwa i ti pou kout nou en pe pli meyer marse. Mon krwar kekfwa in plis ki ler pou nou revwar en pe Polisi, pou nou sey gete ki mannyer sa bann donasyon ki nou gannyen i pa kout nou pli ser, letan nou ganny li koman en kado.

Pou nou kapab asire ki nou pti lekonomi avek mwens resours ki nou, nou annan koman en pti pei nou kapab *manage* zot byen.

Lot Polisi Mr Speaker, ki mon krwar i ava byen kekfwa pou Minister Finans enkli Gouvernman pou nou revwar se Polisi konsernan bann transpor dezyenmmen. Nou'n tann Onorab Georges mansyonnen

letan i pe fer son deliberasyon, konsernan bann Minister ki'n ganny bann transpor dezyenmmen.

Mon krwar i ava enportan pou Gouvernman e sirtou Minister Finans pou nou re balans Polisi, pou nou tonm dakor ki si Gouvernman li i kapab fer rantre dan pei bann transpor dezyenmmen pou li servi, akoz dapre li i pou kout li pli meyer marse letan in aste transpor dezyenmmen pou en *fleet* oubyen en Minister, konpare avek si i ti pe lwe avek en lakonpannyen lwe transpor.

So, mon mazinen parske nou annan letan nou pe fer sa pou Gouvernman i annan osi bann endividé deor, bann Seselwa ki santi poudir i pli fasil, i pli bon marse pou li kapab fer antre en transpor dezyenmmen.

Parske biznes oubyen son fasilite personnel, ki li i ti a kontan ki mon krwar i ava en pwen pou nou kapab balanse, pou nou asire ki personn dan sa demars pa vwar poudir zis Gouvernman ki kapab fer vini. Me bann endividé zot, zot ganny kit ater an relasyon avek sa ki zot anvi fer.

Mon trwazyenm pwen Mr Speaker, ki mon ti a kontan tous lo la se bann *accounting*

officers. Ou konnen ozordi letan nou ki dan Gouvernman nou get bann *accounting officers*, mon krwar se la kot zot bezwen nou bezwen annan en koze pli serye avek zot, pou asire ki zot koman bann *accounting officers* zot responsab bann propriyete Gouvernman.

Letan mon pe koz lo propriyete Mr Speaker, se plizoumwen bann transpor pou nou asire lekel transpor Gouvernman ki pe sorti aswar, kote i pe ale, kote i stasyonnen, lekel ki pe responsab sa bann transpor e pou ki bann Minister ant Minister zot annan bann sinerzi, pou ki nou kapab ed kanmarad lo nivo transpor. Akoz mon pe dir sa Mr Speaker?

Par egzanp letan ou get SNYC, SNYC i enn bann lazans ozordi ki'n souvandfwa zot annan bann aktivite ki zot fer ek bann zenn. E SNYC souvandfwa i pe rod annou dir en *coaster* oubyen 2 *coaster*, zisteman pou li kapab transport bann zenn dan zot bann aktivite ki zot fer. Me par kont letan li i napa Minister Finans par egzanp, i kapab annan li en *coaster* ki pe dormi dan son *parking* parske *weekend* i pa servi.

Me dan lot kote ou annan en lot Minister li, en lot lazans

ki li i pe rod zisteman en *coaster* pou ki atraver bann *accounting officers* e bann Minister, nou ava annan sa sinerzi ant bann Minister pou nou gete ki mannyer sa ki nou annan nou kapab servi antre nou, pou nou kapab asiste lezot an relasyon avek bann depans ki nou koz lo la pou ki tou depans Gouvernman i balanse.

E nou pa vwar enn ki pe lwe bokou plis transpor avek pti gin resours ki i annan. Me par kont sa menm transpor ki li i pe lwe i annan enn ki pe ki dan *car park* oubyen en Minister, me ki pa pe ganny servi *weekend* parske i pa pe neseserman li i bezwen ozordi oubyen sa dat ki ou pe servi.

Mr Speaker, mon dernyen pwen ki mon ti a kontan adrese se, letan mon'n get Minister Lanplwa, ou konnen Minister Lanplwa i Minister ki lyez ek tou bann departman travay e zot, zot ganny bann *vacancy list* kot zot anvoy nou souvandfwa koman bann MNAs e nou, nou *share* sa avek nou bann group oubyen nou bann *constituent* ki nou konnen pe rod sa bann *vacancy*.

Me souvandfwa konplent ki nou gannyen an relasyon avek sa, letan mon pe get lalis ki nou'n gannyen *in regards to*

bann “*delay in recruitment*” ki letan ou pas dan sa dokiman ki Onorab Georges in pas en pe ladan ki nou, nou’n get ladan “*delay in recruitment*.”

So, mon ti a kontan kekfwa dir en keksoz, ou konnen souvandfwa letan bann zenn i vin devan - bann zenn ki anvi travay zot bouze zot vin devan, zot ranpli bann dokiman neseser zot avoye dan bann landrwa travay. Swa i Gouvernmantal, swa i prive.

Me difikilte ki souvandfwa bann zenn i gannyen se napa en repons. Sa *HR* oubyen kot in *apply* pa zanmen reponn li. Prezan li letan i pe esper en larepons avek Mr A, i pran li 1 mwan akoz i pe espere avek konviksyon poudir i kontan sa plas travay ki in *apply* e Mr A pa reponn li. So, deza 1 mwan i pase i vin 1 mwan retar.

Me letan i avoy son laplikasyon ankor kot Mr B, i pa gannyen sa repons. Mwan mon ti a kontan si i annan sa menm sinerzi ki mon fek koz lo la an relasyon avek transpor, pou ki Minister Lanplwa avek bann lezot landrwa travay ki avoy bann *vacancy list* kot Minister Lanplwa, pou zot annan sa sinerzi pou zot kapab koze pou dir get sa, si sa zenn in *apply* en plas travay omwen annan sa

dinyite pou reponn li pou dir ek li non ou pa kalifye, wi ou kalifye.

I annan zis en pti demars nou pe fer apre byento nou pou *appeal* ou, zisteman pou nou kapab fer sa *interview*. Dezyenmman lo sa pwen Mr Speaker, se kekfwa fason fer. Eski ozordi lafason kekfwa ki nou pe *advertise* bann *post* i ankouraz bann zenn pou li vin devan? Eski lafason ki nou advertise bann *post* ozordi, i pa fer ki nou pouz sa zenn pli lwen.

Parske lakantite Degre, Maters ki nou mete avek sa *vacancy* sa i fer ki sa zenn i santi poudir non, non mwan mon pa pou kapab me mon a les sa pou en etranze?

Eski kekfwa sa i en lot fason fer ki nou kapab balanse, revwar ki mannyer nou atrakte bann zenn menm i napa sa degre sa master me pou nou vwar ki i kapab ofer koman sa zenn Seselwa ki anvi ki in pare pou li travay.

Mr Speaker, lot pwen ankor lo sa ki mon pe koze se *interview*. Eski *interview* ozordi i fer ki i ankouraz sa zenn pou li vini? Oubyen sa *interview* i ganny vwar poudir in al Ankour, in asiz parmi 4, 5 Ziz. E zot tou zot in fini pas santans lo li e alor i pa anvi retournen

pou li vin dan sa plas travay Mr Speaker.

E ozordi mon krwar letan nou'n ariv 2024, letan nou a balans tousala mon krwar *COVID* in montre nou en keksoz kler Mr Speaker, poudir pa nou tou ki bezwen pe travay dan menm lofis, dan menm *building*, dan menm letan.

COVID in montre nou poudir nou kapab *work from home*. Me eski ozordi dan en pti pei parey nou, avek pti gin resours ki nou annan eski nou ler travay ozordi i ankor ideal pou sa pti Sesel ki nou viv ladan 2024?

Eski nou tou nou bezwen pe desann ozordi 8er/4er pou nou al travay? Ler 4er i sonnen lavil i mor, tou lofis i frenmen e tou dimoun i antre dan lakour. EsKi pa in ler kekfwa pou nou re balanse pou nou gete, eski atraver Minister Lanplwa avek tou bann lezot lazans, pou ki nou pa ganny ankor sa ki nou apel delay in *recruitment* kekfwa avek lafason ler travay par egzanp.

En pe ti a komans 10er, i ti ava fini 6er. En lot pe ti a komans 8er pou li fini 4er. En lot group ti a komans 9er-5er en legzanp, sa i a fer ki ozordi tou bann lezot pti problem ki nou koz lo la dan Lasanble Nasyonal

par egzanp *childminding* parske letan sa paran i komans 8er i fini 4er, son zanfan ki'n antre 7er 45 ki fini lekol 2er edmi li i napa personn pou get li ziska 5er oubyen 4er letan son paran i fini travay.

Mr Speaker, mon krwar i annan en kantite keksoz ki nou kapab tire. En kantite lesion ki nou kapab aprann, en kantite lenformasyon ki nou kapab pase. Me selman mon krwar Mosyon ki Onorab Georges in anmennen avek lafason ki in dir larzan ki'n ganny depanse, oubyen larzan ki'n fini ganny depanse Mr Speaker.

Mon krwar i annan en kantite keksoz ki mwan mon'n benefisyé atraver dan mon distrik avek - parey mon'n dir ek tou bann lazans, tou bann Minister ki mon'n vwar la i annan en kantite keksoz e mon pe swete ki sa i kontinyen.

Parske atraver Bidze ki pe vini nou ava kapab donn plis sipor e asire ki i ava annan plis larzan pou ki tou sa bann zafer, tou sa bann Minister ki nou'n pas lo la e sirtou pou bann zenn Mr Speaker, ki pe rod sa plas travay ki anvi travay, pou nou rode ki fason, ki mannyer nou atrap son lanmen pou ki li osi i vin en travayer, i kontribye dan lekonomi pei. Sa i fer ki nou

anmas plis larzan atraver taks, pou ki tou bann lezot proze i materyalize.

E pou ki depay in *recruitment* i ava redwir e ki tou bann lezot pozisyon dan nou Gouvernman ozordi atraver larzan ki nou ava annan, i ava ase pou ki nou bann Seselwa ki *at the forefront* e zot pe antre dan lakour avek en saler ki ava ed zot dan zot lavi koman bann zenn e bann dimoun ki anvi kontribye e delivre pou zot pei.

Mr Speaker, mon ti a kontan remersye tou bann Manm ki'n ekout mwan, an relasyon avek sa e mon ti a kontan felisit Onorab Georges pou son bann leklersisman kler ki in donn nou an relasyon avek sa.

E mwan mon'n al en pe dan tou direksyon Mr Speaker, parske mon'n anvi montre lapresyasyon avek larzan ki'n ganny depanse e kote mwan mon'n benefisy'e koman sa Manm ki reprezent distrik Bel Ombre e avek sipor ki mon gannyen avek tou bann Minister e atraver Bidze ki nou vote dan Lasanble Nasyonal. Avek sa detrwa mo, mon ti a kontan remersi ou Mr Speaker.

MR SPEAKER

Mersi. Mersi Onorab. Laparol Onorab Gervais Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker, nou'n ariv dan sa moman dan lannen kot Gouvernman ouswa brans Egzekitif i demann Lasanble pou li kapab fer serten depans adisyonnel setadir i bezwen en larzan adisyonnel pou li kapab finans bann novo priyorte ki li i idantifye atraver son *Mid-Year Review*.

E i en legzersis ki sa dimoun ki pe swiv Lasanble ozordi i ava dakor avek mwan, ki depi legzistans Lasanble Nasyonal nou vwar i vini toulez-an.

E mon dir sa la ki i en legzersis ki vini tou le-z-an akoz mon pe swete ki lot kote latab i donn en sipor lo sa Mosyon, pou ki zot fer en kontribisyon konstriktiv vizavi sa Mosyon, akoz ler zot ti dan L' Egzekitif zot parti ti dan L' Egzekitif zot ti fer menm legzersis.

E alor zot dan en pozisyon pou mye ed bann dimoun ki ep ekoute la konpran sa zafer kot Gouvernman i fer *savings*, kot Gouvernman i oule depans adisyonnel, ki mannyer i pran sa larzan laba i *reallocates* li.

Donk, ki Lasanble i kapab fer en travay vreman a sa nivo ki nou ti ava kontan. E zis pou donn 2 legzanp, an 2018 par egzanp Ladministrasyon sa letan ti anmenn 2 Bidze Siplementer. Enn ki ti plis ki 144 milyon e ti annan en lot 87 milyon.

E an 2019, zot ti anmenn enn 310 milyon. Donk, i en keksoz ki repete preski tou le-z-an. E mon dakor avek entervenan avan mwan Onorab Sandy Arissol Manm Elekte pou distrik Bel Ombre, kot ler ou pe get sa propozisyon depans kekfwa dimoun i ava kapab dir poudir be ki mwan mon annan ladan? Ki mannyer mon benefisy?

E i annan serten Manm i kapab *point out* serten depans poudir lala ou pa pe ganny regarde, napa *long service award*, napa logmantasyon saler, napa larzan dan pansyon - bann keksoz koumsa.

Me sa ki nou bezwen regarde se ki lannen pres pou fini, i annan en Bidze ki pou vini mon demann pasyans popilasyon pou espere kwa ki Gouvernman pe antisip pou donnen baze lo performans ekonomik ki ava annan pandan lannen 2025.

Me pli enportan lespas fiskal ki pei i ava kapab *afford*. Me serten depans lo bann *headings*, mon reasir ou dan lakour poudir ou kapab benefisyé ladan menm si pa ou, i ava ou vwazen ouswa i ava ou fanmir.

Par egzanp letan mon pou get mon vwar poudir *Local Government and Community Affairs* pe ganny en sonm apepre R2 milyon ki zot pou depans prensipalman dan bann travay dirzans dan kominate.

I vre i kapab pa en gran sonm, me selman sa larzan i kapab ed ou dan bann travay dirzans. I annan bann keksoz pye dibwa pou koupe, i annan bann lateras grennen, i kapab annan bann lentervansyon ki ede amelyor lavi kot en lakour.

SLTA, pe demann en sonm kot i pou prensipalman depans dan bann zafer koltar, enstal *crash barriers*. E la mon ava zis dir avek bann dimoun Mont Buxton zot a bezwen tonm dakor avek mwan. Par egzanp pandan sa lannen lakantite proze met koltar ki'n annan dan bann semen segonder pa absoliman eksepsyonnell.

E sa i en keksoz ki pou kontinyen, akoz i ankor annan bann demann ki nou'n fer avek *SLTA*. E mon remersi zot

toultan akoz tou bann demann ki nou'n fer i toultan ganny akonpli.

Parfwa i vin avek lavites ki nou pa neseserman dakor avek, me selman nou apresye akoz kekfwa kontrent pou ganny materyo konstriksyon partikilyerman apre ki'n arriv lensidan le 7 Desanm kot CCCL, me selman bon lentansyon pou fer dubyen i reste. E *crash barrier* lefe ki Mont Buxton i en landrwa montanye bann semen i demande, e nou pe kontinyen mete selon lavites ki SLTA i kapab provide.

E alor la mon satisfe vwar poudir i annan en sonm adisyonnell ki pe ganny mete pou kontinyen fer en pe plis travay dan sa direksyon avan ki lannen i fini.

Ladefans osi, pou gannyen sonm ki par egzant pou al dan konstriksyon lasose ouswa amelyorasyon dan sistèm radar. E ou ava demande be sa ki mannyer i benefisyè mwan? Nou en pei antoure avek lanmer, nou bezwen remersye touzour nou bann zonm ek fanm dan liniform ki kontinyelman fer en travay eksepsyonnell dan lalit kont drog, kont lapes ilegal e dan resers avek sovtaz nou

sitwayen. E zot anmenn rezulta ki fer nou fyer. E nou kontinyen ankouraz zot fer sa Mr Speaker.

Minister Later ek Lakaz pe rod sonm adisyonnell parski Sekter Lozman i reste en priyrite pou sa ladministrasyon pou asire ki zot kapab ed otan fanmir Seselwa, pou ganny en trwa lo zot latet. E mon'n vwar devlopman dan serten proze. E partikilyerman, ou sipoze pou fer konblaz ki kapab ed bann sekter biznes.

E alor par egzant pou bann Manm Onorab, kot sa bann proze lakaz, mon pe sey rode ki'n ganny mansyonnen ki si i tonm dan zot distrik mon swete e mon priye Mr Speaker, ki zot donn sipor ki alor i ava kapab annan sa bann lazistaz ki sa bann Minister, departman e lazans pe demande.

Mon pa pou long, akoz mon krwar bann lezot entervenan ki oule koze i a kapab *pick up* bann lezot pwen. Selman Mr Speaker, mon oule fer enn de komanter pou partikilyerman en refleksyon lo en size ki Onorab Arissol in koz lo la.

E ki mon konnen i kapab en kwen kontansyon an deba ki ava swiv. Nou vwar poudir i annan en pe *savings* dan bann MDAs, akoz retar dan

rekritman travayer ou si non bann landrwa kot in annan bann high *staff turnover*.

E la sa size, i en size ki en pe letan i pe repete dan Lasanble Nasyonal partikilyerman atraver deba lo bann Bidze Siplementer ki'n vini. E Sesel sa deba i pa en leksepsyon, akoz i en defi sa zafer rekritman travayer i en defi ki pe regard nou dan lizye blan dan lemonn antye. I difisil pou plizyer lekonomi trouv bann travayer kalifye, bann *skilled set* pou met dan bann pozisyon travay ki zot demande.

E parey mon'n dir sa i en pe letan. E menm ladministrasyon avan ti pe fer fas avek sa difikilte, e sa i pa zis dan sekter piblik ki la nou vwar dan sa dokiman dan bann departman parey par egzanp ledikasyon, lasante, eksetera.

Me osi dan sekter prive nou vwar semenn apre semenn lakantite travayer ki ep sey rode dan bann sekter par egzanp konstriksyon avek *maintenance*, lagrikiltir ek lapes e lezot servis par egzanp, Komers, Tourizm, avek Lospitalite. E menm pou ganny travayer pou al travay dan bann Zil Elwanye.

Mr Speaker, i annan plizyer faktor e mon krwar

koman en popilasyon nou bezwen sezi sa, nou bezwen sezi akoz pou nou kapab vin ansanm e trouv solisyon dan bann lannen ki pe vini. E grander nou popilasyon i reste en defi. I ptipti, e grander sa popilasyon prezan li i bezwen fer fas avek lavites ki lekonomi pe grandi.

Prezan nou bezwen osi reflesir lo nivo kalifikasyon bann dimoun ki pe rod travay, vizavi legzizans marse lanplwa. E ozordi bann *job title*, in sanz en kantite. I annan detrwa bann non ki *very fancy* enn ler mo demann mwan egzakteman kisia egzakteman? La nepli annan *human resources*, zot in sanze i apel en bann diferan non komela.

Donk, alor i annan bann nouvo kalifikasyon ki pe demande, leksperyans i en lot zafer. E bokou nou bann zenn i fer defi avek sa zafer leksperyans. E apre i annan lakantite Seselwa kalifye ki pei li menm i pe prodwir. Apre i annan Seselwa kalifye ki pa pe retournen. I annan sa size nivo saler, ki prive pe peye e ki Gouvernman pe peye.

E ozordi en konversasyon ki nou dwatet pe ankouraz bann zenn pou dir souvandfwa si saler dan servis piblik i ba.

Me leksperryans ki ou sorti avek dan Servis piblik i bokou pli ris ki dan prive, akoz enn fwa ki ou'n fer 5 an dan en MDA ou kapab apre sa travay *anywhere in the worlds* baze lo leksperryans e partikilyerman serten Minister an partikilye.

E apre i annan sa zafer *poaching from* en MDA to another. So, i kree en challenge enkrwayab ki nou bezwen sezi i kontinyen fer refleksyon lo la.

E nou vwar ki sa i en sityasyon osi parey mon'n dir ki dan plizyer lezot pei, bann pei par egzanp Singapore, Zapon, Espagne bann pei kot Seselwa i ale pou al reste en kantite. Lostrali, Canada, Langleter. E dan serten pei par egzanp Canada i pe dir ou son bann lakonpannyen zot kapab ganny difikilte 80 poursan pou zot trouv travayer kalifye.

E ki zot pe fer alor se rekrit etranze. Par egzanp Canada an 2021 i ti rekrit environ 40 mil, 400 mil travayer etranze e la sa lannen sa sonm in monte pou ariv 485 mil. Alor pou nou Sesel ki kalite refleksyon ki nou bezwen fer, pou nou adres sa size mank travayer kalifye pou ki nou bann MDAs i kapab ganny travayer sifizaman travayer ki nou bezwen.

Nou bezwen dabor asire ki Sistèm Ledikasyon e osi bann sant profesyonnel ki pe donn sa kalifikasyon ki lendistri pe egzize. E nou bezwen konnen plito kwa ki bann zenn pe rode, e sey kree sa bann plas travay. Plis saler kekfa i en size ki nou bezwen reflesir lo la. Bann ler travay ki fleksib, bann lakonpannyen travay i bezwen kre bann kiltir ki en pe pli stab.

Nou annan en zenerasyon zenn ozordi ki bokou pli frazil, sirtou zot leta mantal ek letan ki mwan mon ti komans travay an 1994. Donk, letan in sanze e nou bezwen adres sa bann keksoz. E apre i annan sa logmantasyon dan litilizasyon sa ki nou apel Teknolozi Lenformasyon avek Kominikasyon ouswa ICT, la konmela nou pe koz AI - Lentelizans Artifisyel. Apre osi i annan bann zafer automation ki petet i pa neseserman osi popiler dan Sesel, akoz nou napa bann gran lendistri.

Me selman i bann size ki nou bezwen reflesir lo la, san pran kont apre san oubliy plito popilasyon aze. Donk, tousala i ep kre bann challenge pou nou kapab trouv sifizaman travayer kalifye.

E Mr Speaker, donk nou bezwen kontiny sa

konversasyon, pou nou vwar ki mannyer nou ganny sifizaman nurse ki nou pa war nou pe bezwen kontinyen *recruit* dan bann lezot pei par egzanp Lenn.

Ki mannyer nou kontinyen prodwir plis ansennyan ki nou ap bezwen al rekrit plis sorti Lazanbi. Ki mannyer nou kapab ankouraz bann programm travay, ki menm bann dimoun ki kapab fer diferan louvraz an menm tan. So, zot pa bezwen travay dan en sel antrepriz, me zot kapab travay dan diferan sekter pou zot kapab deservi pei dan en fason.

E osi en keksoz ki mon ti vwar lo televizyon resaman ti annan en liniversite, mon krwar zot sorti Swedwa sa bann etidyan, ki ti pe fer letid *PHD*. E zot ti vin Sesel pou fer en programm lo resiklaz salte. I fer en programm avek *LWMA* donk koman parti zot letid.

Be Sesel koman en pti pei kekfwa i kapab travay avek bann partener etranze tel ki *World Bank, IMF*, pou vwar ki mannyer petet kapab devlop sa bann kalite programm ki bann etranze i vin isi koman parti zot letid. Me i kapab ede dan bann sekter kle, par egzanp Lapolis dan lenvestigasyon kriminel, SRC kot en landrwa tre teknik,

Minister Finans, Labank Santral.

Donk, an menm tan prezan letan zot vini zot kapab travay avek bann Seselwa koman bann *counterpart* ki ede mentor sa bann Seselwa. Me apre i ede amelyor lekspertiz nou bann prop Seselwa. E nou bezwen stratezi en pe pli kler lo kwa ki pei i manke, kwa ki pei i bezwen. Lekel bann sekter ekonomi ki pou devlope a lavenir? E ki bann programm letid nou bezwen anvoy nou bann zenn aletranze.

Donk, i en konversasyon ki nou tou nou bezwen vin ansanm nenport kote politik ki nou ete, akoz sa i konsern nou *survival* koman en Pti Leta Zil dan en lemonn global ki pe devlop vreman vitman. E kot menm nou bann Seselwa ki kalifye i kapab ganny *poach* par bann lezot pei e nou pou kontinyen alor fer fas avek sa defi.

Donk, mon'n anvi lev sa akoz mwan mon santi personnelman poudir sa i en keksoz ki nou bezwen reflesir lo la koman en nasyon. E mon oule, ki bann zabitan Mont Buxton osi i reflesir lo la. I en keksoz ki komans depi bann zenn profesyonnel ki nou war pa reste dan Mont Buxton, akoz

kestyon napa later zot al dan en lot distrik.

E sa i repann lo sa menm zenn Seselwa apre i kit pei i ale. Donk, vwala menm si i e kestyon Bidze Siplemanter, me i permet nou fer tou sa refleksyon, ki Sesel i bezwen dan diferan letap son devlopman. E alor Mr Speaker, mon napa okenn difikilte pou siport sa Mosyon anmennen par *Leader of Government Business*, akoz mon bwar parey mon'n komanse pou dir avek bann zabitan Mont Buxton dan diferan sekter kot bann diferan MDAs pe ganny en larzan.

Ou ouswa ou fanmir, ouswa kominate Mont Buxton pou benefisy'e dan en fason ou en lot. Mersi.

MR SPEAKER

Mersi Onorab. Laparol pou Onorab John Hoareau.

HON JOHN HOAREAU

Mersi Mr Speaker. Bonn apre midi Mr Speaker. Bonn apre midi tou dimoun a lekout. Mr Speaker, Bidze siplemanter ki nou pe ganny demande pou aprouve i zis en pti pa par lao 473 milyon. I enn ki neseser pou Gouvernman konplet son bann travay esansyel e asir bonn fonksyonnman bann

MDAs sirtou pou fer fas avek bann sityasyon enprevi.

Parey in ganny fer resorti Gouvernman i fer en *savings* preski R454 milyon atraversen reazisteman dan bann diferan MDAs. E zis 19 milyon ki'n ganny demande an plis. I enportan pou nou konpran sa parske nou pa zis pe depans larzan an brit. I en keksoz ki'n ganny byen kalkile e nou fer li zis koman i annan sa bezwen ki enprevi.

Etandonnen ki Konstitisyon i egzize dan lartik 154(6) ek (7) ki depans ekstra ki pa'n ganny prevwar, oubyen ki bezwen pou konplet okenn travay neseser e enportan pou ki bann diferan sekter Gouvernman i kontinyen fonksyonnen. I bezwen ganny en laprouvason atraver rezolisyon Lasanble, alor se sa legzersis ki nou pe fer.

Mr Speaker, i enportan pou pep Seselwa e zabitan Beau Vallon konpran byen detay sa *Supplementary Estimate* e akoz mwan mon pou siport sa Mosyon anmennen par *Leader of Government Business*.

Premyerman dan sa Bidze Siplemanter mon war ki i annan 3.9 milyon ki pe ganny demande pou gratwite bann solda ki *due*. Pou en *scheme of*

service bann Manm Brass Band e reazisteman pou Trezyenm mwan lapey.

An plis i annan 27 milyon pou *dry docking* bato *Sala de Mala*. Plis larzan pou on *shore power* pou bato e *maintenance* avyon patrol *dornier* e serten veikil militer. Mr Speaker, nou tou nou vvar travay ekselan ki nou *Coast Guard* i fer pou konbat trafik drog, lapes ilegal dan nou delo, menas piratri ki ankor egziste. E defi sekirite Maritim ki poze par bann *Huties* dan lanmer rouz, en larout maritim enportan pou aprovizyon nou rezyon.

Depi 2023, nou *Coast* in fer fas avek 8 lensidan piratri. Menm ede dan en *rescue* an Zanvye lo en *troller* ki ti'n ganny kapte par pirat Somalyen. Zis an Zen sa lannen, *Seychelles Coast Guard* in atrap 9 Iranyen avek omwen 897.3 kilo hashish, 9.65 kilo zerbaz kanabis, 7.3 kilo *heroin* e 3 kilo *Methphetamines*.

Drog estimen ti kapab vann pou plis ki R23 milyon lo marse lokal. An Zen 2021, en bato *Sri Lankan Sampath* - 7 in ganny atrape e ganny sarze pou R2.5 milyon *fine* akoz lapes ilegal. Se sa nouvel detanzantan ki nou tande lo *SBC* nouvel.

Sa i zis enn de bann detay lo rol sitan enportan ki nou *Coast Guard* i angaze ladan. Menm si i en pti *Coast Guard* par rapor avek lezot pei, me nou tou nou a dakor poudir i fer en travay ki fer nou fyer.

En travay ki pa fasil, en travay ki enkli bokou bann *Assets Lafors Defans* tel ki avyon, bato e kordinasyon lentelizans par *regional intelligence body*. Ler ki nou solda i *board* sa bann dav an plennmer, zot pa zanmen konnen kwa ki zot pe al rankontre e ki fason zot loperasyon pou deroule.

Zot lavi i a risk e ler nou get lakantite pwazon ki zot anpes anmenn ariv ater, lo later Sesel, i donn nou leswarz pou siport sa Bidze pou donn nou bann zonm dan liniform e nou *Brass Band* ki fer nou lafyerte nasyonal en pti pe plis.

Dezyenmmman Mr Speaker, mon'n war 2 milyon pou lapey *overtime* pou bann *fire fighters*. Ankor nou bezwen fer sir ki bann *fire fighters* ki pe fer en travay formidab pou anpes dife detri bann propriete i ganny byen rekonpanse. E i ganny sa ki zot merite.

Akoz mankman mendev, sa bann zans sa bann dimoun i vvar zot toultan pe bezwen fer

double shift, sirtou lo Praslin ek La Digue an ka i annan dife.

Trwazyenmman, mon war 20 milyon lo *SWIOFISH Project* dan Minister Lapes. Pou bann proze ki ganny finanse anba sa vot, i enkli bann proze *marine* ki soutenab, bann proze priyorite dan lapes e lekonomi ble i bann proze ki permet nou zer nou lekonomi ble dan en fason soutenab.

Mr Speaker, lapes; Minister Lapes, i enn bann Minister ki'n vin avek bokou linovasyon dan lafason ki zot pe rod kapital pou enzekte dan devlopman lapes Sesel. Nou'n vwar atraver *blue bond* en linisyativ ki'n ganny sipor *World Bank* e menm fer Sesel vin en legzant lemonn, ki bann pti pei parey Bali, *Fiji* pe kopye lo nou.

Ozordi *Blue Bond* in enzekte plis ki \$15 milyon dan devlopman pei. Ansanm avek bann lenvestisman *SWIOFISH* i fer ki ozordi i annan resers e kapasite pou prodiksyon pwason e lezot lespes lamarin atraver *mariculture*. In osi devlop resers e prodwir *data* lo lapes artizanal pou ki nou pa sir eksplwat nou bann resours.

La mon pe mazin lespes bourzwa e osi Ton Lezel Zonn. En kantite peser Seselwa in ganny *loan* pou aste bato e fer

grandi zot biznes e menm fer valer azoute avek pwason. Bel Ombre o bor mwan, Kominote Peser in benefisyé atraver fasilité lo Por e konblaz ki'n fer ki plizer dimoun i ganny en dipen ozordi.

Mr Speaker, katriyenmman mon'n vwar, ki i annan 281 milyon ki'n ganny mete dan Bidze pou *MLH* zisteman pou fer sir ki plis later i ganny konble, pou met a dispozisyon nou pep e osi pou fer plis lakaz pou bann dimoun.

Mr Speaker, Gouvernman formen par *LDS* pe esey son mye pou fer rev tou fanmir ki pe kontribye ver *HFC* pou zot ganny zot prop lakaz.

I pa en latas fasil ler ou kot larzan ki annan a dispozisyon. E ler ou get later ki a nou dispozisyon pou nou kapab konstri lo la. Alor, avek en popilasyon zenn fanmir ki pe kontinyen ogmante, sa size i reste en defi mazer. Bokou dimoun osi pe rod en landrwa pou fer biznes. Alor, Gouvernman napa swa se pou konble e met later a dispozisyon dimoun pou fer biznes lo la.

E mon konnen ki Dean Beau Vallon pou annan sans ganny en pti morso later pou li kapab fer son biznes. Mr Speaker, i malere ki dan lepase

in annan bokou labi kot serten sa bann kare later in ganny donnen dapre kouler politik.

In annan plizyer gro dimoun ki'n ganny serten morso ki in aste pou en serten sonm anba en serten lakonpannyen apre deswit re vann pou li ganny gro larzan.

Mr Speaker, lo size ki Onorab Henrie in fer resorti lo size *recruitment*. Mon osi mon oule aport mon kontribisyon lo la. Mon konnen enn ler, ler napa *recruitment* ki ganny fer e larzan i ganny mete dan *savings*, i get en pti pe byen pou en Bidze ki montre serten disiplin fiskal. Me selman nou pa kapab toultan an toultan e vvar sa sityasyon ganny repeete.

Alor mwan mon pe fer resorti ozordi ki i devret annan serten travay etrwat ki ganny fer ant *PSB* avek Minister Finans e konsiltasyon kot i ava anmenn en pe plis armonizasyon lo sa size lapey pou bann dimoun dan serten kad ki zot pa pe gannyen pou ranplas, ouswa ranplas bann dimoun ki ale oubyen pou kapab met nouvo *skill set* dan serten *MDAs* pou fer travay ki neseser.

Mr Speaker, pei an zeneral nou bezwen pran kont ki i bezwen annan en travay ki

ganny fer dan lesans pou etidye en pti pe ki valer 1erdtan travay dan en lofis dan en lofis kelkonk pou kapab kalifye li avek en serten nonm lapey, pou fer sir ki nou Seselwa i ganny byen peye dan tou louvraz ki zot pe fer.

Mr Speaker, mon konnen poudir lanvlop Leta i pa enn ki endefini. Alor, nou bezwen kalkil e osi ki kantite larzan ki *available* pou sa bann keksoz koumsa. E balans li avek pri lavi e osi balans li avek tou bann lezot konsern e fason pou fer pei mars annavan.

Mr Speaker, i annan bokou keksoz poudir lo sa Bidze Siplementer. Me selman mon pa pou al lo tou size, mon kontan pou vvar ki St Louis, Le Niole, Bel ombre an sa ki konsern e Bidze pou stabiliz landrwa vilnerab apre dezas in ganny mete. Alor, ki sa bann landrwa i a kapab pli byen stabilize. E nou pa ava ganny en repetisyon sa ki ti arive le 7 Desanm ki ti tap nou enprevi.

Mr Speaker, mon pou siport sa Bidze, akoz mon war i annan en pti keksoz pou preski tou distrik pou preski tou kad administrativ dan pei. Alor, mon pou demann lezot Manm osi pou fer parey mwan e siport

sa Bidze e pous nou pei pli devan. Mersi.

MR SPEAKER

Mersi Onorab. Bon, a se pwen nou a pran en poz. E nou a retourn lo nou ler regilye. Lasanble i a repran 4er. Mersi.

(BREAK)

(Mr Deputy Speaker in the Chair)

MR DEPUTY SPEAKER

Bonn apre midi tou Manm Onorab, e piblik ki a lekout. Byenveni pou dernyen parti nou travay pou sa Mardi. E an se moman nou pe debat Mosyon table par *Leader of Government Business* Onorab Bernard Georges ki lir koumsa; *The National Assembly resolves to approve a supplementary estimate of SR 473,100,693.87 for the year 2024 laid before the Assembly in accordance with Article 154(6)(b) of the Constitution.*

Avan break Speaker i annan en pti lalis la li, bann Manm ki ti'n endike zot pou koze. Mon ti ava zis pe demann bann Manm ki oule koze ankor pou endike senpleman pou zesyon letan, akoz mon konnen i annan bann Manm ki annan en langazman apre sa sesyon.

Donk, sa ki oule koze endike la pou nou kapab *manage* letan silvouple. Mwan mon pe zis demande lekel Manm ki oule koze ankor. *Ok, very well* i annan zis 1 Manm ankor ki'n endike. Alor, pou kontrent letan mon ti ava mazinen ki nou *dispose of this Motion* ozordi ki demen nou annan en keksoz nouvo.

So, lo lalis la ki pou koze e mon pe fermen, i pou annan Onorab Roucou, Onorab Pillay, Onorab Vidot, Onorab Lemiel, Onorab Aglae, Onorab Spiro e Onorab Woodcock, Onorab Andre. E mon pe donn tou dimoun 10 minit avek *right of reply* pou nou kapab al dan lakour.

Wi, 10 minit akoz pou nou kapab al fer sa ki nou pe al fer apre. Savedir nou ekspekte sorti la avek *right of reply* egzakteman 6er. Onorab Roucou, ou annan 10 minit.

HON MICHEL ROUCOU

Mersi Mr Speaker. Bonn apre midi a tous. Bonn apre midi tou bann dimoun ki pe ekout nou dan lakour. Mr Speaker, mon annan gran lafyerte pou mwan ozordi koz lo sa Bidze Siplementer, ki Mosyon in anmennen par *LGB*, Onorab

Bernard Georges MNA pou distrik Les Mamelles.

Mon annan en lafyerte Mr Speaker, ler mon'n get bann departman li menm li ki zot pou ganny en pti pe finansman ou kapab dir adisyonnal pou kapab ed zot avek bann travay ki zot pe fer.

E ler mon'n pas en pti pe lo bann lalis ki Onorab Bernard Georges in tous lo la, mon'n ki i annan bokou keksoz ki pe ganny anmennen ki ou kapab dir ki i pou tous laplipar bann distrik, bann dimoun li menm li an partikilye bann travayer.

E enn ladan ki ou kapab dir ki mwan mon'n war lo la i lo kote Lafors Defans, kot nou war poudir *Brass Band* zot pou benefisy'e avek en *scheme of service*. Parey nou tou nou konnen, lo Komite Deans ler nou'n pase nou vizit plizyer bann departman. Enn ki nou'n vizite se *Brass Band* li menm li ki zot tonm anba lafors ki zot tonm anba Lafors Defans Mr Speaker, ki toulstan zot konsern ki zot ti met devan nou koman Komite Defans ki nou *Chair* i Onorab Andre ki zot konsern ti lo kote zot *scheme*.

E ki nou war ozordi anba sa Bidze adisyonnal la ki pe ganny anmennen, se ki zot pou kapab aprezan war zot kot zot

ganny en *scheme of service* ki sa i a kapab soulaz zot. E nou war poudir dan sa tim li menm li i annan bann dimoun, bann zenn ki annan bokou potansyel mon byen ek bokou zot ladan ki sa pou anmenn bokou lankourazman ankor.

E sa i ava ankouraz bann larestan zenn ki enterese dan lanmizik, parey mon konnen poudir Lekol Mont Fleuri i annan en zenn *band* ki zot pe monte dousman, dousman petet ek letan zot osi zot a kapab zwenn *Brass Band* ki demen zot konnen zot pou annan en *scheme*.

Mr Seaker, apre ankor mon war poudir anba *Local Government* i annan en larzan 2 milyon ki in ganny mete pou bann *emergency* dan distrik. Mon konnen poudir i annan le 7 Desanm ti annan distrik St Louis, Beau Vallon avek Bel Ombre ki zot ti ganny touse. Parey Onorab pou Beau Vallon in dir, kot la i ava kapab ede pou kapab soulaz bann dimoun ki pe reste dan sa bann landrwa kot ti annan bann problem ki ti ganny leve, kot la i ava kapab ede pou stabiliz en pti pe landrwa e zot a santi zot en pti pe pli *secure*.

E ler mon pe get sa Mr Speaker, i annan bann lezot

landrwa osi tou ki mon mazinen avek letan ek bann keksoz ki'n pase, mon distrik pa'n ganny eparnye avek bann keksoz parey ki'n arive bann lensidan parey *emergency* ki mon konnen *Local Government* i pe dil lo la.

Sa osi tou mon konnen ki dan lefitir avek bann travay ki pou komanse avek sa 3 distrik partikilye ki ti gannyen. E sa i ava kapab kontinyen kot bann larestan distrik osi tou kot zot a kapab ganny touse.

Anba Minister Lafanmir ek Spor Mr Speaker, nou war poudir VTC i annan en larzan ki'n ganny mete avek bann travay ki'n ganny fer laba, ki pou ede pou bann travay *maintenance*. E la sa i a kapab ede kot bann paran a kapab war sa mouvman laba. Akoz mwan i annan paran ki sorti dan mon distrik ki'n eksprim mwan, akoz zot annan bann zanfan spesyal dan zot distrik ki zis pou vi zot la kot lakaz zot napa en landrwa.

E la avek bann programm laba ki ava retournen, avek bann travay ki'n ganny fer ek sa larzan ki zot in gannyen la 150 mil pou bann travay *maintenance*, kot zot zanfan a kapab retourn laba li menm li pou komans avek bann pti

travay ki zot ti pe fer oparavan. E osi pou annan en larzan ki'n ganny mete pou sekirite pou fer sir ki landrwa i reste *secure* pou fer sir ki napa vandalizm.

E en lot departman ki ankor Mr Speaker, ki mon war ki zot annan en larzan se Lazans *SLTA*, ki nou konnen poudir *SLTA* i enn parmi bann departman dan nou distrik.

Mwan dan mon distrik zot fer bokou travay, mon oule dir zot mersi pou sa bokou keksoz i ganny akonpli koltar i ganny mete, bann *resurfacing* e osi *crash barrier* Mr Speaker *bus stop* li menm li.

E osi *pavement* mon war Mont Fleuri letan ou monte, i annan bann soz sekirite ki pe ganny mete pou fer sir ki ler bann dimoun pe pase lagrandisman semen ki'n deza komanse bann travay.

E osi ankor lezot bann pti travay ki ganny fer dan bann sou distrik an term lo kote drenaz li menm li. Kot sa i ede pou amelyor lavi nou zabitan li menm li.

Mr Speaker, be en pe letan pase mon ti al avek enn mon zabitan apre ki i ti pe fer demars pou li fer serten travay kot son lakour pou li ganny serten dokiman ki i li menm li i ti'n

perdi son kopi avek Lazans *Planning*.

E ler nou ti al laba zot ti dir nou poudir pou le moman zot pa pou kapab *retrieve* sa bann dokiman, akoz landrwa kot zot mete dan zot store facilities i annan problem laba ki zot pa pe kapab ganny akse.

E la mon vreman apresye ki mon war poudir i annan en larzan ki'n ganny mete la 1.4 milyon ki i annan bann travay ki pou ganny fer. Enn se ki kot sa facilite *sport*, facilite stor li menm li Mr Speaker kot bann dokiman ki petet sa lazans li menm li i bezwen akoz parey ou konnen sa lotorite i fer bokou travay dan kominate.

E sa i ava ede Mr Speaker, pou zot kapab ganny sa bann dokiman. E menm mon'n aprann ki i annan bann dokiman ki petet ennler zot bezwen pou zot anmenn kot lakour, ki sa i ava ed zot pou facilite zot travay.

E ki bann travayer li menm li i pa ava war ki zot lasante li menm li i pe ganny mete an danze. E osi lo *Health Care Agency* Mr Speaker, i annan en sonm la ki'n ganny mete 5.8 milyon pou lo kote elektrisite Lopital Sesel e osi Lopital La Digue kot sa pou ed zot pou zot kapab *sort out* zot

bann *bills* li menm li pou e ki sa lopital i kontinyen reste an operasyonnel travay i kontinyen.

E *National Sports Council*, nou war poudir zot pe demann en larzan pou zot kapab aste en transpor ki pou ed pou fasilit zot bann travay ki zot fer. Mr Speaker, nou war poudir ek letan ki'n pase sa *Council* li menm li in bokou angaze dan bann travay lo kote, lo kote dan distrik, *sorry*. *National Council for children, sorry*.

Ki i annan bann travay ki zot pe angaze pou zanfan li menm li bann travayer ek distrik ek bann lezot lazans, kot sa i kapab ed zot en pti pe lo kote facilite deplasman li menm li.

E osi nou war poudir Minister Later ek Lakaz i annan bann travay kontinyen dan plizyer distrik kot zot pe kontinyen avek bann devlopman lakaz, pou ed nou bann zabitan li menm li nou konnen poudir demann lakaz li menm li i annan en gran demann dan mon distrik.

Travay i kontinyen parey si ou pou pas Corgat Estate, ou pou war sa travay ki'n komanse kot demoli bann lakaz ki'n la pou sitan bokou letan pou ede ki bann zabitan ki la ki pe fer

zot kontribisyon ki pa pe angaz zot dan bann aktivite ilegal, ki pe viv zot byen, zot pa dan bann aktivite anti-sosyal kot sa i kapab ede kot zot osi zot pe bouz dan en nouvo lakaz ansanm ek zot fanmir.

Mr Speaker, e osi Minister zot in eksprimen ki ler mazorite bann dimoun ki deza pe reste la, i pou osi annan bann lakaz an plis ki pou ede ed bann dimoun dan distrik ki pa pe *actually* reste dan sou distrik Corgat Estate. Akoz nou konnen poudir i annan bokou dimoun dan distrik pe espere pou zot osi kapab ganny zot lozman.

(Interruption)

MR DEPUTY SPEAKER

Mersi bokou Onorab. Ou letan in arive, zis 10 minit. So, nou pou bezwen fini la. Nou ava adonn laparol Onorab Pillay.

HON SEBASTIEN PILLAY

Mersi, mersi bokou. Mon oule prefase par dir pou dir nou rol koman Manm Lasanble, se pou dan Lasanble pou travay an sa ki konsern travay Lasanble e non pa pou regard lot azanda ki nou sipoze annan apre.

Me ou'n pran en desizyon ou ki dan sez. Alors, nou a

respekte ou desizyon menm si nou pa dakor avek. Premyerman nou oule met lo rikord ki sa kalite travay koumsa an tayan an sa ki konsern en Bidze, i pa fer zistis okenn Lasanble nor fer zistis okenn Manm Lasanble an relasyon avek son fonksyon.

Nou pe ganny dir degaze, taye fini avek deba 10 minit zis pou nou kapab al fer lot keksoz ki nou annan demen ki nou kapab kontiny sa travay ki mon pa war sa fer sans. Mon oule osi met lo rikord ki ler ou'n entervenir, ou'n entervenir plis ki 10 minit ou. Alors, sa i ok sa. Me ankor enn fwa ou dan sez, alors sa i ou desizyon.

Premyerman, mon oule fer sir e fer kler ki Seselwa ki la deor pe ekout nou ki zot konpran en keksoz. Ki sa ki'n ganny dir avek zot ler Onorab Georgs in prezant sa Bidze, mon pa krwar Onorab Georges in lir son dokiman. E akoz sa bann keksoz ki in dir avek zot i fotiv e mansonzer, e pa vre.

Premyerman Gouvernman pa'n fer okenn *savings*. Annou met sa lo rikord. Si nou get bann koupir ki Gouvernman in fer, Gouvernman in fer en koupir 329 milyon dan bann proze kapital. Dan sa koupir 329 milyon i annan plis ki 215

milyon e bann larzan ki Gouvernman ti sipoze gannyen koman Grant.

Alors, ou met *Grant* ek *loan* dan Bidze ler ou pa gannyen ou apel sa en *savings*. Me kisia? Par egzanz Minister Finans, 81 milyon ki ti sipoze fer pou son *Integrated Financial Management Systems* i pa'n fer, alors sa i reprezent koman en *savings*. Me annou aret pran Seselwa pou fou bet la deor.

Mon ava dir zot kote Gouvernman in *actually* koupe. Sa i larzan ki pa'n antre e i montre en o nivo inefikasite dan Gouvernman kot i pa'n kapab delivre. E ler ou total tou sa bann koupir, i montre ou klerman ki poudir sa ki Gouvernman pe propoze koman *savings*, i plito plis larzan adisyonnal ki i oule fer zisteman pou li kapab *meet a Bill* fer reklanmasyon R270 milyon Ile Aurore, kot Gouvernman in fini dir avek Seselwa la deor ki li in fini pran *advance*, larzan davans.

E ki en *tender* in fini ganny fer me selman personn pa konnen lekel ki'n ganny tender oubyen kan *tender* ti fer pou sa proze reklanmasyon. Se sa i montre ou poudir en Gouvernman en Gouvernman ki kontinyelman sey koz lalang

avek Lepep Seselwa. E i fer lapenn Mr Speaker, e ler mon tann Onorab Roucou dir pou dir i fyer mwan mon pa fyer lefe ki Moris li in nobou re ganny *Chagos*, me nou Sesel nou'n vann Assumption avek Katari, mon pa fyer mwan.

Mon pa fyer ler nou met en *track* sentetik lo *Stad Linite* pa ni menm 1 mwan pli tar stad sentetik i komans dekole, e nou komans met blok lo la. Mon pa fyer sa. Annou koz larealite avek sa pep, e annou montre sa pep ki pe arive la deor.

Mr Speaker, Onorab Georges in koz ek nou lo en problem dan sa Bidze Siplementer, e sa bann delay dan *recruitment*.

Annefe si i annan en landrwa ki devret poz nou pli gro konsern, se lefe ki Gouvernman in koup R33 milyon kot i pa'n kapab *recruit* travayer across diferan sekter. E sa i pa sa Bidze total, akoz nou ti ganny dir dan sa Lasanble menm par *PS* pou Finans e Minis ki i annan en travay entern ki zot in fer ki pa tou sa larzan ki zot in koupe lo *delays and recruitment* i ganny prezante la.

R33 milyon mon oule ou ekout mwan la mon bann frer ek ser, R33 milyon *delay* in

recruitment, kan ou ki annan kalifikasyon ki pe rod louvraz ou pe ganny dir napa louvraz dan Gouvernman. Ki mannyer sa i kapab alors en Bidze ki montre ki Gouvernman pe fer *savings*?

Be mon al pli lwen ankor, get kot Gouvernman ankor in dir nou fer *savings*. In osi fer *savings* an sa ki konsern pansyon, akoz sif ki in mete in ganny dekale par lefe ki laz pansyon in bouze.

Alor, nou fer *savings* lo laz pansyon, me selman nou napa larzan pou nou ogmant Sekirite Sosyal. Sa i montre nou ankor enn fwa ki priyорите ki Gouvernman i annan. Ler nou regard sa bann sif ki devan nou, mon ava pas sa avek Lepep Seselwa pou zot kapab war zot pou zot menm, nou vvar an sa ki konsern en koupir enportan *Pension Scheme Contribution* Gouvernman in fer en koupir R13 milyon.

An sa ki konsern konpansasyon pou *continuous service*, in fer en koupir 15 milyon. Ou'n fer en koupir pa en *savings*. Napa *savings* ki ou'n fer la. So, ki mannyer ou kapab vin *claim* poudir sa Bidze i reprezent zis *at least* R20 milyon depans?

R20 milyon depans selman ou pep pran 270 milyon pou met dan en konblaz. So, lekel ki pe koz laverite ek Lepep Seselwa?

Souvandfwa US i ganny dir poudir nou pa lir dokiman ki vin devan Lasanble? Me eski LDS in lir son dokiman ki'n vin devan nou Lasanble avan i vin koz ek Seselwa? Ler nou regard tou sa bann proze ki swadizan sipoze materyalize. Par egzanp Lekol La Digue donasyon R72 milyon ti sipoze ganny fer pa'n ganny fer - en lot *failure*.

Marine Police, Stasyon *Marine Police* R41 milyon donasyon ankor pa'n ganny fer. Dan Lasante ankor R90 milyon, e sa i ale lalis i long, long, long. E ler ou azout tousala ansanm, sif preliminer ki ou gannyen se 196 milyon 440 mil ki sipoze reprezent koupir dan *loan* ek *Grants* e sa alor i apel en *savings*. Me i pa fer premye fwa ki Gouvernman LDS i vin dir nou sa.

Gouvernman LDS i Bidze larzan ki i napa, apre i dir ek ou koumsa poudir in fer *savings*. E sa i an nwar ek blan dan sa dokiman, e nou ti'n devret pran letan pou nou pas sa avek Lepep Seselwa.

Prezan annou vin lo serten detay dan sa Bidze ki devret

ankor enn fwa donn nou serten *cause for concern*. Par egzanp, Biro Prezidan i demann ankor R4.4 milyon pou li aste *consumables* pou li pey elektrisite, delo pou li pey pou *maintenance* loto e *levy* lo novo loto.

Me Biro Prezidan in fek ganny *Cadillac*. Oli sa bann *Cadillac*? In ganny plizyer transpor, oli sa bann transpor? Si sa biro a ti kontinyen fer lekstravagans, pa ti kontinyen zis gala vant otour lemonn, al *COP* al partou parey mon'n war en dimoun mete, nou ti ava rod solisyon par egzanp pou anpes annan dife lo *landfill*.

E ladan menm nou vin rod ankor R4 milyon avek Sesselwa, me selman nou war tou leskiz pou pa donn en pansiyoner en dimoun ki pe ganny sekirite sosyal en larzan an plis.

In fact, mwan mon war li tre ipokrit kan nou anmenn en Mosyon dan Lasanble pou defann lentere en pansiyoner, en dimoun aze ki pe ganny sekirite sosyal, *LDS* i vot kont sa Mosyon apre envit zot *State House* e fer parti. Sa i montre direksyon ki sa Gouvernman i oule pran ek nou dimoun.

Mon regard osi dan sa Bidze, lapros lapolis avek Departman Prizon ki pe aste

bann transpor dezyenmmen. Si en Gouvernman US ki ti o pouwwar ti pe al aste 14 transpor dezyenmmen, lamazorite sa bann konpannyen loto ti pou pe sot anler. La tou dimoun i ros plat, personn pa kapab dir naryen tou dimoun in per pou koze.

Dan sa bann transpor ki pe vini i annan ki kapab ganny *provided* par bann *service provider* lokal. Oli *tender* ki'n ganny fer pou swazir sa dimoun ki pou fer aste sa bann transpor dezyenmmen? Oli dokiman ki montre ki in ganny *dispensation procurement* ki pou dir ki sa 2 departman i annan dwa fer sa?

Me sa ki enteresan i se ki ou menm ou ler ou ti dan sez taler, ou'n fer en pledwari avek Lopozisyon poudir ek nou, nou konnen ki mannyer Bidze i pase siport en Bidze en keksoz ki zanmen ou ou'n fer koman en *MNA*. Me ki ler nou ti demann Minis sa kestyon dan Lasanble, i ti reponn nou e al dir nou al demann Minis pou Zafer Entern pa demann li. E ou oule Lopozisyon siport sa Bidze.

E sa i enteresan sa Bidze Siplementer i vin a en moman ki nou e dir ek Sesselwa, li fer sakrifis konnen ki mannyer pou depans son Bidze, me selman li

Gouvernman pa neseser ki i fer sakrifis, pa neseser konnen ki mannyer i depans son Bidze.

E parey Onorab Arissol in dir, Gouvernman i war leskiz pou li kapab fer vini transpor dezyenmmen. Me en sitwayen ki anvi fer vini en transpor dezyenmmen pa kapab.

Sa i montre ou ki zistans Gouvernman *LDS* in arive, e kot in fer en depar konplet lo tou sa bann promes ki ti fer ek Seselwa 2020, se sa ki'n arive. E Seselwa i bezwen konpran sa la deor. E medya i bezwen fer sir poudir ler i prezant son rapor lo deba lo sa Bidze Siplementer prezant li dan en konteks balanse.

La nou'n ki poudir zot in ferm *News Agency*, i normal. Lontan nou konnen zot anvi ferm *News Agency*, zot anvi kontrol medya, kontrol medya ki mannyer zot anvi. I kler sa.

Zot in menm koz dan lepase pa donn larzan *CEPS*, kler sa. Sa i lafason ki en diktatir i evolye dan en pei. E Sesel nou pe pti tap pti evolye dan en diktatir.

(Interruption)

MR DEPUTY SPEAKER

Mersi Onorab, ou 10 minit in arive. La prosenn entervenan i Onorab Vidot. Mersi.

HON AUDREY VIDOT

Mersi Mr Speaker, pou donn mwan laparol. Mr Speaker, semenn pase mon ti fer resorti ki i annan en group dimoun ki pa konsistan e senser dan parol ki zot prese. Se pa lot ki Prezidan Larepublik ek son bann Minis. E mon oule fer rapel parmi sa bann Minis, i annan ki'n deza Manm Lasanble.

Parmi i annan ki ti kontan dir, Ladministrasyon US i bezwen koud son lenz dapre son kantite latwal ki i annan. Sa ki enteresan ozordi, sa ansyen Manm Lasanble Nasyonal atraver ou Mr Speaker, ki Minis Jean-Francois Ferrari son ladministrasyon i kontinyelman diran sa 4an pa parti ek sa bann zoli parol ki zot ti prese.

Mon pe sey konpran akoz son koleg Onorab Georges atraver ou Mr Speaker, sa letan dan Lopozisyon pa ti gid li atraver son bann komanter ki in fer ozordi, pou li prezant sa Mosyon ki devan nou Lasanble. Akoz sa ta promes elekson 2020 ki zot in fer avek pep

Seselwa, i paret ki zot in kontinyelman zis anbet sa pep.

An plis, zot bann Minis i vin avek plizyer zistifikasyon pou Lasanble donn zot sipor pou ki Ladministrasyon i kontinyelman mars byen. E zot ti kre bokou lekspektasyon pou nou bann profesyonnel dan Minister ek bann departman avek lazans. Malerezman *poor leadership* sa ladministrasyon, i kontinyelman montre nou ki zot enkonpetan pou zot kapab kontinyelman diriz sa pei ozordi.

Mr Speaker, dan bann Minister avek bann departman enkli lazans, ki mank travayer pou soulaz bann ki pe travay louvraz an plis e ki pe menm fer louvraz zot kanmarad. Sa ladministrasyon i kontinyelman inyor son priyrite pou regard dan byennet nou bann travayer Seselwa. Pou donn zot sipor e motivasyon neseser pou kapab donn plis e fer plis dan zot lorganizasyon travay.

Ankor mon bezwen dir ki parey promes manifesto *LDS*, i aplikab zis pou bann Dirizan *LDS* e ler i fer zot plezir. Sa Ladministrasyon i negliz lenportans, pou asire ki larzan ki ganny mete pou adres defi ki i annan dan bann Minister ek departman ek lazans i ganny

servi parey ek son lakoz. I regretab ki ankor nou pe vwar *savings* i ganny rikorde lo baz *high staff turnover*. E difikilte pou rekrit pos lo nivo lokal.

Minister Transpor R800 mil, Minister Lanplwa R900 mil, *Seychelles National Youth Council* R500 mil, Gouvernman Lokal R400 mil e Minister Lasante 2.5 milyon.

E bomaten menm nou fek tann enn son bann Minis dan sesyon kestyon, kot pe dir ki zot pe rod de kalite. La apre midi, atraver ou Mr Speaker, Onorab Henrie atraver son komanter pe demann nou pou fer refleksyon.

Be Mr Speaker, refleksyon lontan Seselwa pe fer. Inefikasite sa Ladministrasyon in donn zot 4an pou fer byen refleksyon e reflesir lekel ki pe donn zot sa ta problem, akoz naryen zot pa pe fer. Apre zot a vin dir nou *challenge* partou.

E la mon bezwen demande, ki sa Minis responsab pou siport bann Minister pou kre loportinite pou zanfan Sesel angaz zot dan bann kour ki pou ede adres problem lo rekritman lo nivo lokal ki i pe fer.

Pa zot ti pou vin fer pli byen? E zot bann gran plan ki'n arive avek ki zot ti prezant avek Seselwa? Ki'n arive avek

revizyon dan benefis sa bann lorganizasyon travay pou ki travayer i pa bezwen pe kit par grap parey nou pe war dan serten sa bann Minister? Akoz ler nou dan US, nou demann kestyon Minis dan Ladministrasyon LDS zot dir nou tou keksoz i *ok*, napa problemm. Kan zot konn tre byen problemm in anta.

E olye adres sa bann ta problemm ki egziste anba zot gouvernans, zot kontinyelman *fail* sa bann travayer Seselwa. Alors, mon bann frere ek ser Seselwa, zot kapab konpran akoz ki mon dir zot poudir LDS i mal onnet e zot annan tou rezon pou perdi konfyans dan zot.

Mr Speaker, sa Lasanble Nasyonal i aprouv Bidze pou asire ki Ladministrasyon LDS, i enplimant son bann programm zot plan dapre aksyon ki zot annan pou sa lannen. Mon pa kapab konpran - mon seye konpran akoz ki zot pa kapab onor zot bann promes?

Dan mon distrik Roche Caiman si mon pa ti reste for e konekte avek mon zabitant, si mon pa ti servi mon leksperyans koman en ansyen DA pou met presyon, pou fer bouze travay dan mon distrik,

mon distrik ti pou kontinyelman ganny neglize.

Selman nou vwar zot pe byen aranz zot, e fer kontan serten endividé etranze. Akoz? Zot ankor pe rod larzan pou donn serten antite, ki pa kapab ni menm anmenn en sou dan sa bann milyon ki zot in promet pep Seselwa atraver aksyon koripsyon, olye fer antre sa bann larzan dan kof, nou kontinyen war nou pe tire.

Alors Mr Speaker, si mon pe swiv byen sa Ladministrasyon LDS ki dapre zot Prezidan, Minis ek bann MNA LDS pe fer tou byen sa Bidze Siplementer pe dir avek nou bann pansyoner, *carer*, kontinyen espere 2025 pou ganny sa pti morso gato logmantasyon ki zot in ganny promete. Bann ki lo envalidite, bann travayer dan Servis Piblik kontinyen espere, asize lo sa *bus stop* kot bis pa pase.

E nou pe mazin sa bann milyon ki pe ganny donnen, depanse, pou swadizan ranpli nou kof. Kontinyen nou ava espere en zour kekfwa nou ava war rezulta. Nou pa blyie ki LDS ti ganny elekte pou fer aksyon. E nou pa zis sant, nou pa oule tann zot zis pe sant sanson voler, koripsyon, trenn lipye selman aksyon i ankor zero.

Mr Speaker, mon oule fer resorti ki ler *US* i konplent e montre e demande pou ki nou pa fer gaspiyaz nou kontinyelman war larzan i kontinyelman ganny depanse atraver bann antite tel parey kot Lofis Prezidan i kontinyelman ganny sipor par kont lezot pa gannyen.

Mr Speaker, mon pa pou kapab konklir mon lentervansyon san eksprim mon dezapwentman avek sa Bidze Siplementer kot i pa adres sipor pou *Home Care Agency*.

Sa nivo servis ki sa lazans i bezwen sipor pou li kapab adres son bann defi, zot pa pe gannyen. Apre ilistre sa lenkonpetans sa ladministrasyon atraver sa Mosyon, mon annan sa senp pti mesaz pou mwan dir avek mon bann frer ek ser Seselwa. Nou dan *United Seychelles* nou pe pas en mesaz byen kler. Nou pa pou kapab kontinyelman avek en ladministrasyon ki pa pratik sa ki i prese.

Nou pa kapab kontinyen avek en ladministrasyon ki mazorite *LDS* ki kapab fer zis nenport kwa, zis pou dan zot faver akoz zot ki *rule border*. Sel fason pou nou fer sa, sa bann

dimoun i bezwen ale 2025!
Mersi Mr Speaker.

MR DEPUTY SPEAKER

Mersi Onorab Vidot. Prosen entervenan se Onorab Lemiel.

HON SYLVANNE LEMIEL

Mersi Mr Speaker. Bonn apre midi tou dimoun ki a lekout. Mr Speaker, ozordi nou pe debat lo en Mosyon anmennen par *Leader Zafer Gouvernman*, kot pe demann Lasanble Nasyonal pou Gouvernman aprouv en sonm R473 milyon 1 mil 693. 07 sou.

Koman Bidze Siplementer pou lannen 2024. Ler mazorite Minister, Lazans, e departman, zot annan *savings* ki zot in fer sirtou an sa ki konsern bann lo kote *salaries and wages*. *Wages and Salaries, meaning* ki mazorite bann lazans, departman e Minister zot pa'n kapab fer bann rekritman. Parfwa ou war bann senp pozisyon Mr Speaker, menm zot pa'n kapab ganny petet bann kandida ki dapre zot, zot ti pe rode.

Letan nou pran lo sa kote rekritman, nou regard osi i annan serten Minister - par egzanp ler nou regard Gouvernman Lokal, sa in soz mwan en pti pe Mr Speaker.

R400 mil anba Gouvernman Lokal zot in fer *savings* anba *wages and salaries*. E sa i dir akoz ki bokou *staff* laba;- enn zot pa'n kapab *recruit* e apre osi bokou *staff turnover*. Petet nou merit regarde la, akoz ki bokou *staff* dan sa Minister i kite?

E la i pa zis sa Minister, nou pe war osi Minister Lanplwa ek Zafer Sosyal osi ki annan sa *issue staff turnover*. Petet nou bezwen rode akoz ki bokou *staff* dan sa 2 Minister pe degoute, e kit sa bann Minister pe ale. En lenvestigasyon petet i merit ganny fer pou vwar akoz sa pe arive.

Minister Lasante osi letan ou regarde R2.5 milyon i ganny koupe anba *salaries and wages*, akoz zot, zot dir ki zot in ganny difikilte pou zot atrakte bann bon kandida pou travay.

Petet ti a bon osi nou konnen, ki bann pozisyon ki sa Minister pe ganny difikilte pou rekrite? R900 mil anba *wages and salaries* kot Minister Lanplwa ki mon fek koz lo la. Zot osi akoz bokou *staff turnover*. Nou osi war bokou larzan pe ganny retournen, akoz bokou proze ki Gouvernman ti'n planifie Mr Speaker pa'n ganny materyalize anba proze kapital.

E sa zot in dir akoz zot in ganny retar pou enplimant sa bann proze. Mr Speaker, lenplimantasyon proze in touzour en problemm isi Sesel. Mankman mendev i enn, me sa ki nou'n osi kapab war sirtou pandan sa bann dernyen lannen, Gouvernman in donn bokou lasirans isi dan sa Lasanble Mr Speaker.

E an sa ki konsern proze kapital dan tou distrik in annan bokou, bokou promes. E mazorite mon kapab dir pa ankor ni menm komanse.

E par egzanp proze lakaz Mont Plaisir, Anse Royale ki ti pou ganny fer anba *Qatar project* e i tonm anba sa 72 lakaz ki zot in dir zot ti pe al fer ki la nou vwar ki en sonm larzan adisyonnal ki zot pe demande R1.25 milyon pou sa proze pou zot konstri 72 unit Cap bonm Zan. Ki sa ti pou ganny finanse koman anba en *Foreign Grant*.

Zot in demann larzan ekstra anba la, akoz zot pe dir ki i annan en revizyon dan *foreign exchange*. Me ziska la parey mon dir Mr Speaker, tousala i lasirans ki'n ganny donnen isi dan sa Lasanble ki pa'n akonpli. Nou war osi ki R58.9 milyon anba *foreign loan* in ganny koupe pou proze social

housing. Kot Departman Lakaz ti pou fer an 2024, zot ti pou fer bann lakaz *social housing* e ki sa osi i bann proze ki pa'n ganny materyalize e pa ankor ni menm komanse.

Nou war ki R5 milyon ki ti'n ganny bidzete pou akizisyon later, sa osi mon war in ganny koupe petet lo sa kote ti a bon en pti pe plis leksplikasyon pou konnen. Petet eski i annan okenn larzan petet ki'n deza ganny peye. Nou war 5 milyon in ganny koupe. Me eski i annan okenn peyman petet ki sa Minister in fer anba sa zafer akizisyon later.

Minister Lasante tou le lannen i vin donn lasirans, ki i pou fer renovasyon lo Sant Anse Boudin. E osi konstriksyon *MAT Clinic*. Mon pe koz lo la Mr Speaker se ki akoz koman *chairperson COGA* nou'n vwar ki tousala i bann lasirans.

E an Out nou ti fer nou en legzibisyon ki pandan sa 4an ki bann travay ki Gouvernman in fer e ki bann *achievements* ki lo kote nou COGA nou'n vwar nou'n pas lo bann lasirans ki bann travay ki nou'n fer.

E letan nou ti tonm lo en statistik, ki nou ti dir i annan R413 apepre lasirans, ki nou'n pas lo la. E letan nou ti nonmen i annan 13 lasirans ki'n ganny

akonpli pandan sa dernyen 4an. I paret apre sa legzibisyon in annan serten mekontantman, in annan serten pti grensman. Mon pe panse sirtou lo kote *LDS* ki ou'n tann sa *unofficially*.

Me nou pe ganny menm petet serten pe dir nou, nou merit revwar pete osi nou *either* nou mont or fason kekfwa ki *COGA* pe travay, me sa nou pou diskite byento dan en miting. Akoz mon ti ganny en mesaz sorti kot mon *vice*, ki pe demann nou petet pou revwar travay. I bann travay konkret Mr Speaker, ki nou koman en Komite nou'n fer e nou'n vwar.

E ozordi letan ou pe regard Bidze Siplementer in vini, ou pe war sa kantite larzan ankor ki'n pa'n ganny depanse an sa ki konsern proze parey mon'n dir i bann lasirans ki ti vin ganny donnen. E i montre ou serten laprev ki sa ki nou'n dir ki nou'n koz lo la ki nou'n demonstre, i pa ti zis bann keksoz ki'n sorti dan ler *or* ki nou, nou'n anvi zis dir.

Me i bann realite la ki nou, nou pe dir ki petet Gouvernman pa'n vreman kapab delivre lo bokou keksoz ki zot in vin dir nou zot pou fer. Alors Mr Speaker, letan nou regard an zeneral lo kote sa Bidze

siplemanter ki pe ganny demande.

E osi en pti pe larzan an plis ki zot pe demande pou donn bann diferan Minister, pou ki zot kapab fini konplet serten travay ki zot, zot in dir ek Gouvernman zot oule fer.

Nou espere ki *by* Desanm letan i arive, sa larzan adisyonnel ki sa bann diferan Minister pe demande, zot ava'n kapab akonplir serten sa bann keksoz ki zot pe dir.

E i enportan Mr Speaker, an sa ki konsern rekritman mon krwar tou le lannen dan Bidze Siplemanter nou dir sa.

An sa ki konsern rekritman tou Minister i bezwen annan li en bon plan. I bezwen mon krwar tou dimoun pe fer *RBM* ozordi, tou Minister e i bezwen petet byen davans prepar zot ki sa bann larzan sa ki konsern *recruitment* i pa retournen *or* i pa ganny koupe pou ganny met dan lezot keksoz ki Gouvernman li menm i dir ou i en priyорite pou li.

Mon bann koleg in koz osi lo *issue* kot pansyon i konsernen; nou vwar ki i annan en bon sonm larzan osi ki'n retournen. E la nou vwar ki laz pansyon in sorti 63an in mont 65an. E definitivman Gouvernman pou dir pou dir in

fer en *savings*. Kan sa larzan petet i ti'n kapab, i ti pou vin pou sa bann dimoun ki ti pou pe kapab ganny zot pansyon a zot laz 63an.

E la zot pe bezwen esper sa 65an, e napa en soulazman petet pou sa bann dimoun. E ki zot pou war zot pe bezwen esper ankor plis letan, ankor 2 an. E menm si zot pe plennyen, zot pe dir nou zot in fatige e mon espere ki byento atraver Mosyon petet ki Onorab Audrey ti'n anmennen, menm si in ganny rezete.

Me mon espere ki avek bann koze ki lo nou kote nou pe toultan koz lo la, nou pe toultan met en pti pe presyon Gouvernman i ava tande. E ki en lasistans en pti pe pli rezonnab i ava vin pou nou bann vye dimoun, nou bann dimoun aze ki pe esper en logmantasyon petet lannen prosen. E par kont....

(Interruption)

MR DEPUTY SPEAKER

Mersi Onorab. Sa i fer ou 10 minit. Mersi. Prosen entervenan lo lalis se Onorab Aglae.

HON EGBERT AGLAE

Mersi Mr Speaker. Malgre mon pou proteste pou lafason anba

Order 8 ki ou pe diriz sa Lasanble, lo en Bidze Siplementer kot ou e donn 10 minit, ki Minis li menm li letan i ti fer son bann prezantasyon pou Mid-Year in pran plis ki 45 minit. Me ou ki dir ki pou fer.

Mr Speaker, Bidze siplementer ki devan nou dayer mon oule dir pou dir wi, dan lepase in annan bann legzersis Bidze Siplementer ki letan nou, nou ti dan Gouvernman ti fer. E ki ler zot, zot ti dan Lopozisyon koman LDS/SNP zot ti *boycott* zot ti dir non pa dakor.

Me la ozordi zot war mon kontan pou ki zot war sa leksperyans akoz zot dan sa soulye poudir i annan nesesite pou annan Bidze Siplementer.

Letan mon pe regard bann sif ki Bidze Siplementer pe anmennen pou *compile* sa 473 milyon ki zot pe demande. Mon war serten repetisyon ki pe arrive tou le lannen. Enn Mr Speaker, Gouvernman li menm li i *the biggest spender, ok.* *Biggest spender* e *the biggest contractor* ki annan dan sa pei. Bokou bann kontrakter pe benefisyé avek bann kontra ki Gouvernman pou kapab ganny zot gannypen e agrandi zot biznes.

E la letan mon pe regard bann sonm ki pe ganny mete

ankor enn fwa, i annan ki pa zistifyab akoz letan ou vini ou dir mwan poudir ou pe fer *savings*, kan larzan ki ou sipoze pe depanse ou pa ni ankor pe resevwar me selman ou pe dir pou dir ou'n fer *savings*. Me ou pa'n ganny sa larzan, akoz sa larzan pa ti la. I bann refleksyon ki nou bezwen fer.

Letan mon'n analiz premye 20 milyon Mr Speaker, e Onorab Sébastien Pillay in fer sorti ki i annan R32 milyon an tou kot i konsern *delay* in *recruitment* pou mwan sa i ankor en konsern. E ladan letan mon get sa bann antite ki parfwa letan ou pas ouswa ou koz ek dimoun ki fer resorti bann fristrasyon ki annan dan servis publik.

E bokou bann travayer osi pe konplent pou dir *the workload* ki zot annan i bokou e se sa ki zot pa kapab *meet* zot bann *targets* ki'n ganny set, kot zot bezwen sipor adisyonnel. Vedir i bezwen annan lezot dimoun pou travay akote zot ouswa anba zot pou kapab kontiny sa bann lobzektif ki servis publik i bezwen. E se sa kot *recruitment* i bezwen antre.

Mon krwar kestyon fondamantal se kwa ki pe koz sa bann gran delay in *recruitment*? E letan mon pe

regard bann pwen ki'n ganny mete pou zistifye, i annan ki dir ou *ok* abilite pou ganny sa kalite lo *local market*. Be letan mon pe regard serten sa bann antite, i pa neseserman ki nou bezwen dimoun ouswa sorti deor pou vin fer sa bann kalite travay.

Mwan mon krwar i annan osi serten mannev pou pa pran serten Seselwa ki kalifye, pou ki rezon, mon pa pe dir rezon politik la mwan akoz plizyer dimoun i koz ek ou i dir ou in *apply*, in *apply* in espere i pa gannyen. Me nou annan en problemm. Eski tou sa ki'n *apply* pa pe *meet* akoz i annan dimoun i dir ou larepons ki li i gannyen i dir li i *over qualify* pou sa pozisyon.

Sa dimoun pe rod en travay li. Si i konnen i *over qualify* li i pa ti ava *apply* laba. Ouswa akoz i bezwen en louvraz pou li sonny son fanmir. E bokou sa pe ganny arive apre nou war poudir lafen lannen pe vini, poudir inabilite to *recruit*. Nou bezwen osi regard sa bann Departman *HR* ki egziste dan sa bann Ladministrasyon Piblik, kwa ki zot pe favorize? Seselwa ouswa etranze? Nou bezwen regard byen sa.

Letan mon regard menm Departman Lanplwa li menm li

ki si poze sa lorganizasyon li menm li, ki si poze *oversee the whole employment sector* li menm li osi i annan abilite pou *recruit*. Nou war departman kot i konsern Ladministrasyon Piblik osi, inabilite pou li kapab *recruit*. I pe fer *savings* li osi.

Minister Lasante osi parey, kan nou bezwen annan en kantite travayer ki dan sa domenn, pou travay pou elev nou Sistem Lasante. E dayer mon anvi dir pou dir i vre Mr Speaker, bomaten in dir pou dir sa sesyon ki ti ganny fer ti pe partaz lenformasyon lo Leta nou sistem Lasante.

Wi, mon pou dir *the basic is there*, me sa ki dimoun pe konplent ozordi se sa *service delivery*. E *service delivery* lekel ki donnen? Se imen. Si ou pe pey en dimoun byen ou pe reminer li byen ouswa ou pe donn li ase sipor an term ki pa zis li ki ou pe larg par egzanp nou get lo en *ward* Mr Speaker, ou pou ale ou pou war zis 1 asistan, ou war zis 1 *cleaner* lo en *ward*.

Me eski sa i ase pou li fer tou sa louvraz ki annan pou fer? Nou pa kapab *recruit* ankor pran? E lala ou vini ou dir nou poudir ou'n fer *savings*? I sa bann keksoz ki nou bezwen regarde.

Servis lanbilans ki tarde. Dimoun i ganny aksidan, e la nou fek tandé laba lot fwa aksidan Grand Anse menm zafer menm. Tarde - 30 minit.

So, i bann keksoz ki nou sipoze pe *invest, invest* ladan, *invest* ladan. Mwan mon pe dir lensidan mon pa'n nonm non personn letan in arive, retar ki lanbilans i vini. Mon pa'n nonm non personn mwan, eskize si zot in ofanse.

Mr Speaker, ankor nou regard bann keksoz ki ti kapab ganny aranze pou fer servis amelyore. Retar pou reponn bann *email*. Retar korespondan letan dimoun i anvoy en let ouswa en *request*, en laplikasyon ki zot ganny larepons tro bokou letan i tarde. E sa i fer keksoz ki pa bouze. So, letan mon pe regarde *almost R20* milyon zis sa premye 6 antite pou mwan i bokou. En lot konsern ankor avek sa Bidze Siplementer Mr Speaker, se letan ou pe regarde Lofis Prezidan in demann 4.4 milyon adisyonnell.

E rezon ki'n ganny donnen sete pou cater pou elektrisite, *consumable, motor vehicles*. E mwan dan sa legzersis mon ti demann kler.

State House in ganny mete lo grid pano soler ki ti ganny

inogire en pe letan pase mon krwar 2018 a 2016 pa Onorab Cosgrow ki ti Minis sa letan. Ki mannyer i annan logmantasyon dan elektrisite, akoz i sipoze lo en grid pano soler i bezwen annan en problem ouswa i pa pe marse. Mon pa konnen i devret dir nou sa, akoz i pa zistifyab.

Consumable ou dir pou dir be Onorab Georges in dir bann aktivite ki pa ti'n previ. Me nou napa en plan nasyonal ki kalite aktivite ki pou annan sa lannen. Ki kalite aktivite ki pa'n previ. Sa lannen mon pa'n tann okenn bann gran *dignitaries* ki'n vin dan nou pei. Kwa, kwa ki zot pe *consume* laba anler ki pe monte? Ki kalite parti ki pe ganny fer laba anler?

I bann konsern ki nou bezwen demann nou lekor kestyon. En lot pwen Mr Speaker. Servis piblik i kapab ganny amelyore, e la mon dakor avek Onorab Sandy Arissol letan in dir ki nou bezwen regard bann ler travay. Nou'n anmenn Mosyon dan 6enm Lasamble. *COVID* in montre nou en keksoz, me nou pa'n aprann nou'n re *go back* ankor akoz nou ti kapab *work from home*, lekonomi ti fonksyonnen, ti marse. Malgre ki ti napa sa

kantite kliyan ki ti pe antre dan pei.

Me kwa ki pe anpes nou vin avek bann Polisi kler. Ki mannyer nou kapab amelyor sa zafer *working flexible hours*. Premyerman i kapab redwir lenpak. Nou koz lo konzesyon, me akoz tou dimoun pe desann ansanm bomaten pou arriv travay 8er. Me nou kapab re aranze sa. Eski tou lekol i bezwen ouver menm ler? Eski tou travay i bezwen komans menm ler? I en volonte.

E yer mon'n koz ek en dimoun an montan ki travay dan en departman, i dir mwan koumsa i annan serten departman ki annan volonte pou fer me selman zot siperyer pa pe dakor. Akoz? Sakenn pe vey kanmarad ki i fer, ki i pa fer.

Me letan ozordi nou anba sistenm *RBM*. *RBM* i egzize ki ou ganny en travay, en plan travay kot ou bezwen akonplir.

Ou annan pou ou, li i annan pou li. E si letan ou'n ganny ou travay, ou pa pe *achieve* dan serten peryod letan. E la ou siperyer i bezwen kriy ou, menm si ou kapab pe asize kot ou petet lo en *computer* i annan en keksoz. Teknolozi in evolye en kantite keksoz ou kapab fer *within* en

laptop ouswa menm en telefond ozordi. kwa ki anpes nou fer sa?

(*Interruption*)

MR DEPUTY SPEAKER

Mersi Onorab. Ou 10 minit in arrive. Lot entervenan...

HON EGBERT AGLAE

So, Mr Speaker, en kantite keksoz mon ti kapab dir. Mersi.

MR DEPUTY SPEAKER

... i Onorab Spiro. Laparol pou ou.

HON RACHEL SPIRO

Mersi Mr Speaker. Mr Speaker, mon komans mon lenthervansyon koumsa. Sa ki pa ti bon yer, ozordi i paret i bon akoz nou pe war ki sa ladministrasyon pe retourn an aryer. E bann keksoz ki zot pa ti kapab aksepte detrwa lannen pase ozordi i paret ok.

Akoz menm si mon pa ti dan Lasanble, mon ti swiv Lasanble. E mon rapel tre byen ki zot pa ti agree ki Bidze Siplementer i vin devan zot pou zot vot lo la. E zot ti vwar ki sa ladministrasyon i annan problem.

Me ozordi zot pe anmenn en Bidze Siplementer pou nou vot lo la. Bidze en pei nou

bezwen fer en bon *forecast*, akoz nou pe koz depans ki fer fonksyonnen Servis Piblik.

E nou bezwen asize fer en travay byen fonde, en travay ki realis, en travay ki pran kont tou bann faktor ki pe arive dan en pei depi lenflasyon, flantyasyon dan deviz. E osi sityasyon global ki ep pase dan lemonn otour nou, avan menm nou prepar nou bidze.

I vre ki en Bidze i dinamik, detanzantan pou annan en pe sanzman parski, parla. Me i osi enportan ki bann Minister e Departman, zot esey zot mye pou fer en travay byen ki zot kapab vin demann larzan ki zot bezwen e servi sa larzan byen. Pa vin demann larzan e apre pa servi e preznan nou dir poudir nou'n fer *savings*. Nou bezwen fer depans e apre vin demande ki Lasanble i aprouve pou zot peye.

Sa mon war i en gro problem mal zere, mal planifye tou ansanm. *Leader Zafer Gouvernman* apre midi in prezant nou dan Lasanble avek en Bidze Siplementer, ki i pe demann nou pou aprouve ankor pou zot fini 2024 avek.

E zot pe demann nou Lasanble pou aprouv en sonm environ R473 mil. Epi mon'n tann li dir ki pa tousala, nou'n

fer *savings* par isi par la nou pou bezwen zis 19 milion adisyonnal pou nou kapab arive fini sa lannen.

An menm tan ki in demann nou pou aprouv sa sonm, i pe osi fer nou konpran ki wi i annan *savings*. Me ler mon pe get byen, i pa vreman *savings* ditou, akoz en kantite defayans dan travay sa bann Minister e lazans. Enn, mon realize i dan zot *process recruitment*, e la nou'n arriv ziska 4enm kar lannen i annan *recruitment* ki pa'n ganny fer. E preznan, eski nou pou kapab *recruit* avan lannen fini?

I annan Seselwa la deor ki ep sey rod en travay. E pou en rezon ou en lot i fer laplikasyon i pa ganny louvraz. Selman nou ankor pe rod travayer, pou nou ranpli sa bann *post* ki nou dir nou annan e ki nou ti'n demann larzan pou nou ranpli sa bann *post* pou fer travay Gouvernman marse. Me ki nou'n arive fer? Nou'n *fail* e ozordi dimoun la deor i bezwen lanplwa, Gouvernman li i pa'n kapab *recruit*. Apre nou annan *high staff turnover*.

Mon demande dan sa bann departman e Minister kot i annan *staff high staff turnover* ki pe arive dan zot Minister, ki zot pa pe kapab *retain* zot staff

akoz mon krwar pa Mr Speaker, si sa bann dimoun ti pou anvi kit travay e al asize. I bezwen annan en rezon ki pe fer sa bann dimoun degoute e ale.

Annou get en pti pe dan sa bann antite ki nou pe dir la apre midi, ki pe demann larzan adisyonnell. I annan *Health Care Agency* pe demann en sonm environ 8.8 milyon, pou pey elektrisite pou bann health center e osi La Digue. Mr Speaker, nou'n fer en manman lopital ki ennler ou a krwar i en *white elephant* akoz nou ti devret prevwar ki nou pou annan en depans ekstra lo elektrisite.

E sa i pa zis pou Lopital La Digue, i osi pou Libreri Nasyonal. Nou byen kontan nou'n ganny en zoli batiman me nou ti devret war poudir sa batiman i bezwen *aircon full time* parey Lopital La Digue, pou li kapab reste fonksyonnel, me nou pa'n fer sa nou. E deplis Gouvernman li menm in fer monte elektrisite, ki i pa'n war ki ti pou annan en lenkonvenyans pou sa bann lenfrastriktir ki li in kree e osi lo piblik Seselwa la deor.

Mr Speaker, nou osi war Komisyon Anti-Koripsyon. Komisyon Anti-Koripsyon li in la e in anmenn en batay

asarnen pou li donn nou R50 milyon. Me ki arive ozordi? \$50 milyon. Me selman ki nou'n war? Nou pa'n war ni en Dolar, e ozordi zot pe demann nou 2 milyon pou pey zot legal fees pou sa bann etranze ki zot anploye, ki zot konsiltan, ki zot advisor ki travay pou donn zot konsey legal.

Mr Speaker, be sa bann dimoun i foud nou. Ler zot vin la ankor, zot pa'n kapab akonpli lo sa ki zot sipoze fer. Me selman zot annan lodas pou vin devan Lasanble pou demann ankor larzan pou zot pey legal fees, mon war sa enteresan.

Biro Statistik Mr Speaker, nou pe demann larzan pou pey pou pey pou *recruitment* en etranze kan nou *train* Seselwa e nou annan pa mal *graduate* ki'n ganny *train* dan sa pei.

Me selman nou pa war enn nou bann *graduate* ki kapab *fulfil* sa *post CEO* ki ozordi nou pe dir nou bezwen larzan pou nou peye. Mon war ki nou annan nou en problem en kote, kot nou annan bann *graduate* ki'n ganny *train*, epi zot ganny difikilte pou ganny louvraz akoz nou pe donn en etranze louvraz ki zot ti kapab fer. Mr Speaker, la ankor mon war kote ki nou annan serten defayans.

Defans; Ladefans ti annan en letan ti'n menm dir frenmen Ladefans. Ferm sa nou pa bezwen larme, ozordi nou pe war lenportans nou bann dimoun dan militer. E nou pe rod larzan adisyonné R27.5 pou fer sir ki sa antite i kontinyen fonksyonnen. Sa antite i enportan akoz li ki vey nou *border control*, espesyalman maritim. Nou delo, nou lanmer i ede dan konbat piratri eksétera. Me selman avan i pa ti bon.

La ozordi nou pe war ki zot loperasyon i enportan. Mr Speaker, Lafors Defans i en landrwa kle pou nou. E ozordi mon kontan ki sa ladministrasyon in realize poudir Lafors Defans i enportan.

Zafer Entern; zot pe vin devan nou zot pe demann larzan pou zot aste veikil dezyenmmen pou lapolis e osi pou Departman Prizon. Dezyenmmen, mon demande konbyen letan sa bann transpor pou dire akoz nou konnen avek transpor dezyenmmen nou'n deza aste kabri dan sak nou avek Mala.

E la ankor nou pe dir transpor dezyenmman, ki nou, nou pa war ki mannyer son masin i ete, me selman nou pe

pare pou nou aksepte kabri dan sak.

Selman pou nou Seselwa ordiner la, nou pa oule ki i enport transpor dezyenmman. Ankor en Gouvernman 2 pwa 2 mezir.

Lofis Prezidan Mr Speaker, 4.ekek milyon i pe demande, pou veikil ankor dezyenmman osi pou elektrisite keksoz ki i pa'n prevwar e ki li menm in dakor ki in ogmante elektrisite. Ozordi pou li fonksyonnen I bezwen ankor R4. ekek milyon.

Mr Prezidan, ou vin demann 4. ekek milyon Roupi pou Lofis Prezidan kan tou per diem monte desann ou pe met dan ou pos, dan plas met sa larzan la dan fer fonksyonnen sa Lofis.

Lot antite ki pe demann ankor larzan Mr Speaker, se Departman *DRDM*. Zot pe demann larzan dan prevansyon pou *land slide*, dezas, eksétera. Byen, pa problem pou sa demann, me letan mon pe gete dan tou sa bann antite ki pe demann larzan, pou prevansyon dezas, anba ni *Local Government*, ni lezot antite e ni menm *DRDM* ki pe demann en pti larzan pou rekonstri sa bann biznes ki'n ganny andomaze Cascade, Pti

Paris, sa bann lakour e sa bann dimoun ki'n ganny afekte avek dezas Petit Paris. E la ankor ozordi zot annan problemm avek dife e sa bann biznes i kontinyen ganny afekte; sa bann dimoun i kontinyen ganny afekte.

Mr Speaker, mon pa kapab konpran...

MR DEPUTY SPEAKER

Onorab, wi, ou 10 minit *is up*, so, mon pas lo...

HON RACHEL SPIRO

... mon ankor annan en kantite Mr Speaker, me mersi pou ou letan.

MR DEPUTY SPEAKER

Nou pas lo prosen entervenan e a nou a envit Onorab Woodcock.

HON WAVEL WOODCOCK

Mersi Mr Speaker. Mr Speaker, i kler ler mon pe ekout bann entervenan lo lot kote latab, zot annan zis en lobzektif e sa se pou *mislead* Lepep Seselwa e koz mansonz lo sa Bidze ki par devan nou.

Mr Speaker, en kestyion ki mon bezwen demande, ennler mon krwar nou bezwen get en pti pe *Chairman* bann diferan Komite nou Lasanble, akoz i

annan bokou lenformasyon ki mon santi i sorti dan sa Lasanble, ki vreman *misleading* Mr Speaker.

Ki mannyer depi ler Gouvernman LDS i la pandan sa dernyen 4an, 4 Bidze i vin devan sa Lasanble, plizyer Minis in vin devan Lasanble in fer bann- in donn bann lasirans, bann langazman, bann *undertaking*, bann proze ki zot in prezante atraver zot Bidze.

E ozordi Chairman COGA i vin devan nou Lasanble pou dir nou i annan zis 13 lasirans ki'n onore dan 4an Mr Speaker? Tou sa proze, tou sa *achievement* sa Gouvernman dan sa dernyen 4an si ou fer letour Mahe, Praslin, La Digue sa kantite proze ki'n ganny enplimante.

E an plis ki sa Mr Speaker, bokou sa bann proze ki i pe dir, sa bann *undertaking* ti komans anba zot Gouvernman, ki zot pa ti oule nou konplete ti dir koumsa pa depans larzan lo proze ki nou Gouvernman in konplet sa bann proze pou zot ki zot, zot pa'n kapab konplete Mr Speaker.

13 Lasirans in ganny onore? Mr Speaker, dan sa dernyen 4an napa en Gouvernman ki dan selman 4an in fer sa kantite proze, in

enplimant sa kantite proze ki sa Gouvernman *LDS* ozordi Mr Speaker.

E la ozordi zot oule fer nou krwar akoz serten proze dan Bidze pa ankor enplimante sa lannen, zot oule fer nou krwar poudir nou, nou pa pe travay. Kan zot annan bann proze 15an, 20an, 30an ki zot pa'n zanmen fer ki azordi anba Gouvernman *LDS* tou sa bann proze pe ganny enplimante.

Lopital La Digue, nou'n fer Libreri, i annan bann landrwa ki ti ganny abandonnen an rin la nou pe al re aranz - *Independence House*. Bokou bann facilite ki'n pouri Mr Speaker ki nou Gouvernman ozordi i bezwen met annord enkli bann facilite sport laba Roche Caiman.

Ozordi zot a vin sey anbet sa pep avek bann statistik ki fo Mr Speaker, bann statistik ki zot in envante zot menm Mr Speaker, dan bann statistik Mr Speaker, parey mon dir pou sey *mislead* Lepep Seselwa ki la deor Mr Speaker.

En kantite keksoz ki pe arive la ozordi Mr Speaker, mon pe get dan sa Bidze Siplementer mon siporte. Transfer Lekol Lakademi Maritim anba Minister Lapes, kot sa larzan pou *goods and services* pe

ganny transfer *R9.6 million* anba Minister Lapes.

I en keksoz ki bon Mr Speaker, tou bann *expert* dan domenn Maritim, Lekonomi Ble ki pou annan *oversight* lo en Lakademi pou ede lo devlopman sa lakademi.

Apre tou si i annan en Minister ki sitan egzanpler ozordi, ki pe perform sitan alaoter, se pa lot ki *Ministry of Fisheries* pou tou sa bann facilite; si ou pe get partou dan bann distrik Mahe, Praslin, La Digue kantite facilite lapes ki'n ganny fer ki kler nou kapab war ek nou prop lizye.

Lepep Seselwa deor gete lekel en ladministrasyon ki ozordi in kapab *deliver* lo plizyer bann promes lo bann facilite Mr Speaker, pou benefisyé bann distrik ki sa ladministrasyon *LDS* ki la ozordi Mr Speaker? Napa lot Mr Speaker.

Local Government R2 milyon. Pou distrik *emergency work*. Mr Speaker, bokou bann sant kominoter ti pe pouri pe fer, en bann ti pe tonm lo nou. Grand Anse Praslin pe ganny refer konpletman, Baie Sainte Anne pe ganny refer konpletman, novo- Cascade pe al ganny fer.

Partou Sesel - sa bann pouritir ki sa ladministrasyon

avan in kit avek nou, nou ladministrasyon ozordi pe aranze Mr Speaker. Apre zot a vin *call nou failure* kan se zot ki'n kit tou sa pouritir, sa bann kosonnyen avek nou Mr Speaker.

SLTA 8.8milyon siplemanter, *road marking, cross barrier, bann road devices reflectors* lo semen, travay *asphalting* lo bann semen Mr Speaker, partou semen pe ganny fer. *West coast; Praslin* in arriv Anse Possession byento pou mont bout Anse Lazio ki sepa konbyen lannen nou bann zabitan pe demande pou re sifras sa bann semen.

Get Beau Vallon partou dan tou kwen Mahe, Praslin, La Digue nou war semen pe ganny aranze. Nou pe war bann nouvo sifras pe ganny met lo bann semen e nou war bann semen segonder pe ganny fer partou dan tou kwen distrik.

Praslin nou ganny nou 200 ekek lalimyer, 100 Grand Anse, 100 Baie Sainte Anne dan bann landrwa ki nou zabitan pou plizyer lannen zot pe demande pou pa'n gannyen, ozordi nou ladministrasyon pe *deliver* lo la Mr Speaker.

Mr Speaker, 14.7 milyon *additional budget* pou *Landslide Prevention Major*

Project. Nou tou nou konnen ki ti arive Desanm, bokou distrik ti ganny afekte St Louis, Le Niole, Anse Etoile. E nou Gouvernman i proaktiv - i bezwen siplemanter pou nou dil ek sa bann *issue*, pou fer sir protez bann lakaz zabitan dan nou bann distrik.

Nou pa en Gouvernman ki parey zot. Nou en Gouvernman ki *plan ahead*, nou en Gouvernman ki ana en vizyon, akoz nou anvi rod solisyon pou bann problem, ler i deklare nou pran aksyon nou pa esper 10 an, 5 an. Parey ler sounami ti tap Sesel ziska ozordi i annan peser i ankor pe esper masin bato Mr Speaker i ankor pe esper bann keksoz 30 an, 20 an zot pe espere ziska prezan.

Bokou dimoun, bokou nou zabitan ki ganny promet *for so many years* ziska ozordi zot ankor pe espere, zot pa ankor ganny sa ki zot in ganny promes avek Gouvernman avan Mr Speaker.

Selman si ou pou gete anba *Ministry of Land Housing* sa 2- R181 milyon an gran poursantaz pou *reclamation work* Anse Etoile, Providence, Cascade, Ile Aurore, zone 20 Mr Speaker, e pou plizyer proze lakaz ki ou pe war pe ganny *undertake* partou dan tou

distrik lo Mahe, Praslin, La Digue.

E zot ki zot ti fer Mr Speaker apre konblaz Mr Speaker? Ler zot ti fer konblaz Ile Soleil 38 mil met kare ti ganny donnent avek konsiltan Mr Speaker; pli gro koripsyon ki nou'n war dan listwar, enn bann pli gro koripsyon dan listwar Sesel Mr Speaker. Dan 123 mil met kare 38 mil ti ganny donnent avek en konsiltan pou fer faver konsiltan Mr Speaker.

Sa bann keksoz ki ou war-e ozordi si ou war R2milyon *legal invoice* ki nou bezwen peye, se akoz sa bann *case* koripsyon ki nou Gouvernman ki ozordi Anti- Koripsyon i bezwen *investigate* ki zot in kit avek nou Mr Speaker, sanmenm nou bezwen sa larzan.

Annou pa bliy Ile Eve, sa lannen R13.5 milyon in ganny depanse lo Ile Eve. R13.5 milyon in ganny depanse lo Ile Eve pou met lord e tir tou sa bann dezord ki zot Gouvernman in kit avek nou, ki ozordi nou ladministrasyon pe dil avek Mr Speaker. An plis ki plizyer sa bann lezot *issues* ki nou ladministrasyon pe dil avek Mr Speaker.

Ozordi zot annan lodas vin ziz nou, vin akiz nou ki nou pa pe travay, kan nou pei pandan 2an dan nou ladministrasyon nou fer fas avek kriz ekonomik, en kriz lasante, *still* nou nobou kapab *deliver* lo tou sa bann proze kan zot, zot pa'n kapab fer dan 10an Mr Speaker!

Ozordi zot annan lodas vin kritik nou, vin kraz nou kan nou'n fer bokou plis ki zot avek bokou pli mwens Mr Speaker. Zot pe koz nou *elderly*? Nou pansiyaner, dimoun avek dezabilite, nou bann travayer?

Mr Speaker, i annan R5 milyon pou *SPTC* dan sa Bidze en *subsidy* ou kapab en *SPTC travel concession* parey mon'n dir pou nou bann *pensioners* nou bann dimoun avek dezabilite e *workers special* pou nou bann travayer.

R5 milyon zot pa koz lo la Mr Speaker. Zot sel obzektif zot, se pou rod tou sa bann lipou ki annan Mr Speaker, zot pe rod tou sa bann lipou ki annan Mr Speaker, zis pou rod en leskiz pou dir poudir sa Bidze Siplementer pa bon Mr Speaker.

Kan zot dan lepase zot in demann bann pli gro Bidze Siplementer e nou Mr Speaker, nou pe fer sa dan en fason ki responsab. Nou pa pe fer

gaspiyaz, akoz nou en Gouvernman ki responsab, nou en Gouvernman ki efikas, nou en Gouvernman ki travay, nou en Gouvernman ki *deliver* lo bann promes ki nou annan.

E 2025 nou pou la pou nou kontinyen *deliver* lo sa bann travay. E zisteman Mr Speaker mon pe *look forward* pou nou konvansyon zenn ki pe vini la Dimans le 13 kot bann zenn Seselwa pou sok zot Mr Speaker. Avek sa 2 mo mon dir ou mersi.

MR DEPUTY SPEAKER

Mersi Onorab Woodcock. Prosen Manm lo lalis in dir ek mwan retir son non. Donk, Onorab Loze *you're next*.

HON JOHAN LOZE

Mersi Mr Speaker. Mr Speaker mon pran parol avek protestasyon sa 10 minit, akoz tou bann ki ti vin akont zistwar isi laba lot, lot, lot zot in koz 30 minit ekek, sa ki annan keksoz pou dir i ganny zis 10 minit.

Mr Speaker, *SPTC subside* pou dimoun aze, *subside* pou dimoun avek dezabilite. Mr Speaker, nou ti koz lo la ler nou ti kree, nou ti met an plas sa bann keksoz. Nou ki ti kree, nou ki ti met an plas e nou ti

koz lo la ler nou ti kree e nou ti met an plas.

Sa ki zot pe anvi koz lo la ozordi i apel nou restan. Parske zot, zot pa'n kre naryen, zot pa'n met an plas naryen, zot pe zis koz lo nou restan e zot oule nou, nou retournen nou koz lo restan ki nou, nou'n met an plas?

Mr Speaker, mon a prouv avek ou ki zot pe koz lo nou restan. Letan en dimoun i vini i dir ou koumsa nou'n fer en *Library*, eskiz mwan, eskiz mwan, ou'n depans 80 sepa R90 milyon pou ou *renovate* en batiman ki ti kout 40 milyon pou fer ou'n dir mon ou'n fer sa batiman? Lala zot nivo dekoneksyon ki zot, zot annan. Lala kot zot bite zot.

Mr Speaker, sa dokiman ki devan nou la, en zistwar ki pe ganny akonte, en alors en zour, en zistwar soungoula sa. I annan en pti dikton ki dir ou letan reken ti ganny kree la ti komans ek son labous, apre tou lezot keksoz in ganny mete avek li zis pou siport sa ki son labous in fer ki morde.

Be ou konnen ki lenpresyon mon gannyen ler mon get sa Bidze? Sa Bidze antye la in ganny balanse otour sa R270 milyon Ile Aurore. Komans ek sa zot, se sa ki zot ti

annan, lentansyon i sa. Lentansyon i sa R270 milyon misterye Ile Aurore. Akoz ler ou pe get depans adisyonnal, depans adisyonnal i 473 milyon e zis konponan Ile Aurore i 270 milyon.

Now, annou tir en pe lenz lo sa 270 milyon get li, premye fwa nou'n tann sa zistwar ti la anndan. Minis Rangasamy ti dir nou poudir Ile Aurore in tender sa ki'n ganny tender in fini donn larzan. Lasanble pa ti ganny dir lekel ki ti ganny tender.

Prezan nou kot nou annan Lepep Seselwa kot *we're at an issue* la. Kan ti *tender*? Kote ti *tender*? Lekel ki'n *tender*? Lekel ki'n ganny *tender*? Larzan in antre la R270 milyon pou en *tender* misterye ki personn pa'n zanmen deza tann nonmen. Depi ler Minis in fer sa deklarasyon la, mon'n koz ek en pe dimoun mwan, *ni vu ni connu*.

Selman lenpresyon ki ou pe gannyen la, se ki sa dokiman ki'n vin devan nou, i la zis pou maske sa zistwar. Ou vwar? Parey Lasonpsyon sa, sa i parey Lasonpsyon sa. Akoz sa ki mont Londres pou al negosye larzan i dir pa fer, nou kont pa fer, apre i mont Londres i al negosye avek Katari.

Selman Loze pa sipoze konnen sa li, lekel ki ti mont Londres pou al negosye ek Katari ou vvar. Akoz mwan Loze li msye, selman resaman nou ti ganny dir ki Seselwa i bezwen lir Lalwa ki vin devan zot, lir pou zot menm, war sa la al lo Website Minis Finans lir pou zot menm, tou Kreol i devret lir sa.

Mr Speaker, lo premye paz, mon pou pran zis premye paz en senp pti analiz bet, bet lo mon nivo limite ki mwan mon posede. Lo premye paz ou pou zwenn ou apepre en 13 heads, war dan sa 13 head, 9 ladan *delay in recruitment*. 9 dan 13 *delay in recruitment*. Zis lo premye pasaz.

Prezan mon bann koleg in dekrir sa koman inefikasite, in dekrir sa koman inabilite pou delivre. Mwan mon krwar i pli pir ki sa, mwan mon krwar zot en bann move dimoun, *sorry* Mr Speaker si mon pe *borrow* ou term favori. Mon krwar zot bann move dimoun, zot byen visye e zot ti konnen egzakteman kwa ki zot ti pe fer.

Sa larzan pou *recruitment* in ganny mete dan Bidze avek lentansyon fer egzakteman sa ki pe ganny fer ozordi dan parol Onorab Bernard Georges *to claw back*. Zot pe *claw back* sa

larzan e re deplway li dan en lot depans. I parey batri li *recruitment*, i *store* lenerzi apre ler zot bezwen zot *claw back* sa lenerzi.

Konnen lekel ki ganny *recruited* konmela dan Gouvernman? Bann *SPPF* ki vin bat zot latet, bann *SPPF* ki vin zwe vire ki vin dir *arr* mon konnen mon konn tou ki ti pase laba dan Maison Du Peuple. *HR* deswit i ganny lord anploy li, anploy li deswit la, kre son *post* donn li.

Tou bann *SNP* i ganny kit akote i ganny zet dan bin, bann *SPPF* ki pe zwe rol ek zot, ki pe ganny anploye dan Gouvernman. Zot konn tre byen ki mon pe dir zot, akoz zot ki plennyen, zot ki konplent, zot ki gele. Ki mannyer ou dir sa Onorab Loizeau dan kabinen? Bann konversasyon dan koridor dan kabinen.

Zot ki plennyen sa bann *SPPF* la ki pe polye zot parti parey zot dir. Mr Speaker, *on top of delay in recruitment* i annan en lot batri ki zot pe *store* lenerzi. Sa bann *Capital Projects, Grants*, avek *loans* la ki zot ensiste met dan Bidze ki sak fwa Bidze i vini nou dir zot be si zot pa gannyen, si pa delivre, ki arive si sa pei pa

donn zot? Zot met ekspre zot, zot kontinyelman mete.

E zot met ekspre pou fer zisteman sa. Sa konmsi ou vin kot mwan ou dir mon donn ou R50 ou al aste 2 labyer. Finalman mon dir ou be *sorry* mon napa, ou mont kot ou, ou dir ek ou madanm koumsa mon fer en gro *savings* ozordi mon ti pe al aste 2 labyer R50 me mon pa'n aste mon'n *save* R50. Be mon zomn ou ti napa R50, *to start with*, ou pa ti zanmen annan, ki mannyer in vin en *savings*?

Zot, zot pe *save Grants* ki zot pa'n gannyen zot, zot pe *save* larzan ki pa'n antre, zot pe *save* larzan ki pa ti zanmen egziste ki pa ti zanmen pou zot, zot deklar sa en *savings*.

I will bet you, si okenn Seselwa i sey *manage* son finans lakour, i sey *manage* son fanmir atraver sa bann prensip ekonomik ki zot, zot pe *manage* sa pei ozordi, tou dimoun ti pou pe met laliny kot *ASP*. Tou fanmir Seselwa ti pou pe mor lafen si nou tou nou ti annan sa bann prensip larzan fiktif, larzan non egzistan, *saving* ki vin dan ler.

Be ki kalite *saving* sa ki zot fer zot? E mwan mon pa pou konsey personn swiv zot en, mwan mon pa pou konsey

personn swiv bann prensip ekonomik LDS akoz zot pou al bite. Menm si ou siport LDS pa fer. Pa swiv sa zans ou pou bite.

Mr Speaker, ou konnen kot nou fer *savings* nou konmela? Dan *pensions*. Konmsi preznan, *sorry* sa lekritir i ptipti mon linet pa tro bon.

“Proposed budget cut due to decrease in pensioners”. Eskiz mwan, *decrease in kwa?* *Proposed budget cut due to decrease in pensioners?* Be *pensioners* kot in ale? Kot in ale? In al menm landrwa ki sa bann *savings* dan *Grants* ki zot in fer?

Konmsi zot pe dir *pensioners* i parey zot *Grants* la, li osi i pa egziste. *Decrease in pensioners*. Ou war, lala zot fason fer sanmenm sa mon pe dir Seselwa pa swiv zot, pa swiv *LDS*.

E sa bann *Grants* la, i osi i parey sa *loan* li 196 milyon, R196 milyon. Mr Speaker ,Biro Prezidan li i ti ganny R4 milyon pou en *lift* si mon pa tronpe, la i vini i demann ankor 4milyon pou Biro Prezidan. Pou aste loto dezyenm men, pou aste *consumables*.

Be ler nou'n koup 2 milyon lo *pensioners*, eski moralman nou santi nou byen? Nou pe *decrease* larzan due to

decrease in pensioners selman nou pe ogmant larzan pou *pensioners State House?*

Eski nou santi nou byen korek e moralman lo ray la? Eski koman en pei sa i mesaz ki nou anvi anvoye?

MR DEPUTY SPEAKER

Mersi Onorab. Ou'n ariv 10 minit e mon krwar ou'n fini lo en tonm ki tonm bon pou nou pas avek bann lot entervenan ki dernyen lo lalis pou sa deba se Onorab William.

HON JOHAN LOZE

Mersi Mr Speaker.

HON WAVEN WILLIAM

Mersi Mr Speaker. Bonn apre midi tou dimoun ki a lekout. Mr Speaker, premyerman mon oule remersi Bondye pou son faver e lagras lo nou pei. E pou pridans avek lasazes ki i met a nou laporte.

Atraver sa Mosyon Mr Speaker, konteni sa Mosyon mon pou vot an faver. E sa pa vedir Mr Speaker, letan mon pou vot an faver sa Mosyon ki mon pe vyol Konstitisyon, ouswa vyol drwa Nasyon Seselwa.

Ler mon pou vot lo sa Mosyon mon pou pe asire ki ban depans ki merit ganny fer

ki neseser e enportan pou bann plizyer lazans akonplir zot plandaksyon,

Mr Speaker, eski parti minoriter pe dir ki bann profesyonnel dan Minister Finans zot pe mal travay? Eski parti minoriter pe ankor anvi fer sa pep kontinyen viv dan *denial*? Eski zot ti a swete ki nouvo Gouvernman pa fer naryen e reste lebra krwaze?

Mon dewwar se pa pou bloke, me fasilit sa bann demann atraver sipor mon vot. Akoz isi lo sa kote latab Mr Speaker nou isi pou menm rezon. Mon pou vot an faver sa Mosyon pou fasilit kontinite dan fonksyonnman sa bann diferan lazans parey in mansyonnen dan sa Mosyon.

Mr Speaker Gouvernman dan son plan depans anyel ti prevwar depans en sonm, me si i pa depans tou sa larzan annan pa annan, me lentansyon inisyal sete pou depanse. Me ler ou pa depanse Mr Speaker kestyon eski ou fer en *savings* ouswa non?

Mr Speaker, konfli zero politik pe fer kout lavi monte. Ler barik delwil i monte kou transportasyon i monte e se konsonmater ki sibir atraver lemonn. Mr Speaker, mon pa war naryen mal si bann tel

sonm pa ganny servi, mon dir retenir depans pou sibvansyonn kou lenerzi ki pou monte ankor par rapor avek sa 2 lager.

Mr Speaker, sanses nou pou espekte sa bann menm retorik sorti lot kote latab akoz i sel platform ki zot pou servi pou fer zot diskour *rally*. Comme dir Onorab Cosgrow menm si lisyen pou abwaye barik vid pou ronfle ek mous ver sa karavann pou pase.

E wi, sa Mosyon pou pase ou konnen akoz Mr Speaker? Akoz lo sa kote latab nou pa pou zanmen les tonbe sa pep. Menm si zot pa vote. Mersi Mr Speaker.

(APPLAUSE)

MR DEPUTY SPEAKER

Mersi Onorab William. E avan ki mon donn *mover* Mosyon *right of reply*, parske i annan serten lakizasyon ki'n ganny fer kont *the Chair*.

Mwan mon satisfe poudir ki mon'n swiv *Standing Orders* anba *Order 57(11)* i permet Speaker a nenport moman pandan deba, regle letan ki Manm i koze akoz pou li kapab asire ki *schedule* travay i fini.

E dan en lespas 1erdtan edmi mon krwar ki tou lede

latab in kouver bann pwen e 9 Manm in koze, 6 US, 3 LDS e zot in fer sa dan 90 minit ouswa 1 erdtan edmi.

Alor mon *refute* okenn move lentansyon konmkwa mon ti annan okenn move lentansyon. Onorab Georges, *the right of reply is yours.*

HON BERNARD GEORGES

Mersi Mr Speaker. Mr Speaker, mon ti a kontan parey nou koutim dan sa Lasanble remersye tou dimoun ki'n pran laparol lo sa Mosyon *including* bann ki pa pou siport sa Mosyon.

I en travay ki nou bezwen fer koman en Lasanble, mon regrete ki mon lertervansyon pa'n arive konvenk Manm Lopozisyon ki en Bidze Siplementer set en keksoz ki nou bezwen e ki sa Bidze Siplementer set enn ki neseser.

Me nou pa sirpriz Mr Speaker, akoz zanmen sa Lopozisyon ki dan sa Lasanble in deza siport en Bidze ki nou'n anmennen e mon pa ti espekte ki avek zot koutim, ki zot ti pou siport sa siplementer ki mon pe anmennen la apre midi.

Mr Speaker, mon krwar ki lo nou kote latab nou'n fer sorti rezon akoz en Bidze

Siplementer i neseser, i dezirab e ki sa enn i swetab.

Mon regrete ki Manm Lopozisyon pa'n war zot a en nivo kot zot ti a kapab adres sa Mosyon, adres sa bann sif ki ganny mete dan sa Bidze Siplementer, olye vin koz dan en fason ouvertman politik e fer apre midi en- fer sa deba ki en deba finansyel vin en lot lokazyon pou zot fer politik lo la.

Me nou, nou la pou nou kapab *manage* nou travay; nou pa pou *manage* travay sa bann ki pa anvi. Mr Speaker, permet mwan zis dir 2 ou 3 pti parol avan ki nou pas lo vot.

Premyerman en Bidze set en travay 1an, i pa en Bidze pou 5an i pa en Bidze pou 10an i pa en Bidze pou lavi i pa en Bidze pou 5an ki en Gouvernman en ladministrasyon pran plas i en Bidze pou 1an.

E i normal ki dan sa 1an i annan serten keksoz ki pou ganny fer, i annan serten keksoz ki pou ganny fer parsyelman e i annan keksoz ki pou tou bann rezon ki'n ganny evoke la apre midi pa pou ganny fer.

Alor Mr Speaker, sa bann keksoz pou *roll over* pou al dan en lot lannen. I pa ki akoz zot pa'n ganny fer ki zanmen zot

pou ganny fer parey Lopozisyon i pe sey fer dimoun isi Sesel krwar.

E mon vin lo sa pwen *savings*. Mon'n eseye depi ler *Leader Lopozisyon* in koze ziska ler dernyen Manm lo son kote in koze, pou konpran kisia ki zot pe sey dir lo *savings*.

Mwan Mr Speaker, mon konpran li koumsa; - Etandonnen ki fason pou fer Bidze konmela depi zot lepok se pou met tou *Grants* dan en Bidze. Menm si, menm si ou pa ankor ganny li me ou'n ganny promet me ou met li dan ou Bidze, akoz i en lekspektasyon ki ou pou resevwar e toulstan nou'n met li ladan.

Alor ler ou pa resevwar sa *grant* ki ou pou fer? Ou pou bezwen tir li ou pa kapab dir ou pou kit li la alor, ou pou bezwen tir li. E en *savings* i vin atraver en depans ki ou pa'n fer, osi senp ki sa.

Pou servi legzanp ki'n ganny donnen. Si mon annan R100 dan mon pos, mon al kot laboutik pou mon aste 2 labyer, me lo semen avan mon ariv kot laboutik mon'n deside mon pa pou aste 2 labyer mon remonte, i en *savings* R100 ki mon'n fer.

Me si olye annan R100 dan mon pos, mon annan en kredi kot sa laboutik, parey en

Grant ki ganny fer, mon annan en kredi kot sa laboutik mon desann pou mon al aste 2 labyer lo kredi mon deside pa aste 2 labyer lo kredi mon fer en *savings*.

E ki mannyer nou, nou konpran sa e zot, matematisyen, Lezislater eksetera zot, zot pa arive kapab konpran en keksoz osi senp ki sa Mr Speaker. En *saving* i en larzan ki ou pa'n depanse pwen, rezon ki ou pa'n depans li i en lot keksoz.

E annou vvar rezon ki'n nou'n pa'n depanse. Zot in koz en kantite lo saler ki i annan tro dimoun pa'n ganny anploye. Mr Speaker, sa i montre en diferans fondamantal ant Lopozisyon ki ti Ladministrasyon Parti Lepep e nou.

Diferans ant zot ek nou se ki nou Mr Speaker, nou pa kapab fer en lekivalans ant en plas travay ki egziste ek en dimoun ki pe rod travay. Akoz pou sa dimoun ki pe rod travay ganny sa plas travay fodre son kalifikasyon i fit.

Ou pa kapab dir ki akoz i annan tan dyob ki pe ganny *advertise* e tan dimoun ki pe rod travay ou devret zis balans enn avek lot e pa annan okenn mank lanplwa.

E, me mon konpran akoz zot, zot pe fer sa lekivalans akoz set egzakteman sa ki zot ti fer Mr Speaker e se pour sa rezon ki ler nou'n pran sa pei lekonomi ti lo son zenou.

Akoz pou zot si i annan larzan ki'n ganny bidzete fodre ou depanse; fodre ou depanse menm si i annan dimoun pe rod en plas travay menm si i pa fit avek en dyob, fodre ou met li ladan akoz ou pou asir en vot. Se sa diferans mon bann zanmi ant zot avek nou.

E se sa ki fer ki zanmen zot pou konpran lekonomi ki nou, nou pe fer dan sa siplemanter e zot pe koz lo napa *savings*. Wi, i annan *savings* e i annan *savings* pou rezon ki mwan mon'n dir. Akoz *at the end of the day*, sel larzan ki ou pou bezwen trouve an plis se 19 milyon e non pa 473 milyon tel parey sa Mosyon pe demande.

Alor Mr Speaker, mon anvi dir avek mon bann zanmi dan Lopozisyon apre midi pa vote si zot pa anvi, vit kont si zot anvi. Nou, nou ava fer Lepep Seselwa rapel lannen prosenn ler kanpanny eleksyon i komanse, lekel ki met larzan pou zot kapab viv zot lavi e lekel ki pa met larzan, lekel ki refize donn zot larzan pou zot viv.

Mr Speaker, avek sa detrwa parol mon remersye ankor enn fwa tou dimoun ki'n pran par ozordi, tou dimoun ki'n annan pasyans pou ekout nou. E mon demann avek bann Manm Lasanble konpran lo sa kote latab, vot dan fason ki nou espekte ki zot vote e pa *mind* lot kote si zot pa anvi siport sa Bidze. Mr Speaker, *I beg to move*.

MR DEPUTY SPEAKER

Mersi Onorab. Sa ti drwa de respons lo Mosyon table par Dirizan Zafer Gouvernman Onorab Bernard Georges e avan ki nou pou pran en vot lo sa Mosyon mon a zis repas lo Mosyon pou benefis Manm ek piblik ki a lekout.

Mosyon i lir; -

The National Assembly resolves to approve a supplementary estimate of SR 473,100,693.87 for the year 2024 laid before the Assembly in accordance with Article 154(6)(b) of the Constitution.

So, mon ava demann tou dimoun ki an faver pou endike silvouple? Mersi. Okenn Manm ki kont? Mersi. Mersi Madanm Deputy.

Donk Mosyon ki mon fek lir e ki nou'n fek pran vot lo la rezulta i koumsa; - I annan 22

Manm ki'n vot an faver, okenn
Manm pa'n vot kont e 7 Manm
in absténir ki fer ki sa Mosyon
in pase.

(ADJOURNMENT)**(APPLAUSE)****MR DEPUTY SPEAKER**

Sa in anmenn nou a lafen nou travay pou ozordi. Nou pou adjourn la e nou pou repren travay demen bomaten 9er. Mon ava remersi zot pou zot partisipasyon e pou bann dimoun ki'n swiv nou. Alor mersi bokou e bonn rantre.

